

**Ena Apóstole Mateo májuequenehahi
eta máichararacavahi **ema**
Jesucristo, ticaijare puiti eta
EANGELIO SEGÚN SAN
MATEO**

*Ena achaneana máchucáequeneanaini ema Jesús
eta acane
(Lc 3.23-38)*

¹ Nuvaraha numetacaheya mayehe ema Jesucristo. Éma, vijaneanahi israelítahi, taicha eta mámariéquenérahahi ema viáchucaini Abraham. Énerichuvare, ema Jesús rey-yarehi taicha eta mámariéquenérahahi ema víyarahaini rey David. Eta juca eta nalista ena máchucáequeneanaini ema Jesús.

² Ema víyarahaini Abraham, macachichapa ema Isaac. Ema Isaac macachichapa ema Jacob. Ema Jacob macachichapa ema Judá énapa ena apamuriana maparapenaveana.

³ Ema Judá macachichapa ema Fares émapa ema Zara. (Esu naena ticaijaru Tamar.) Ema Fares macachichapa ema Esrom. Ema Esrom macachichapa ema Aram.

⁴ Ema Aram macachichapa ema Aminadab. Ema Aminadab macachichapa ema Naasón. Ema Naasón macachichapa ema Salmón.

⁵ Ema Salmón macachichapa ema Booz. (Esu maena ticaijaru Rahab.) Ema Booz macachichapa

ema Obed. (Esu maena ticaijaru Rut.) Ema Obed macachichapa ema Isaí.

⁶ Ema Isaí macachichapa ema rey David. Ema rey David macachichapa ema Salomón. (Esu máenaini ticaijaru Betseba, esu mayenainihi ema Urías.)

⁷ Ema Salomón macachichapa ema Roboam. Ema Roboam macachichapa ema Abías. Ema Abías macachichapa ema Asa.

⁸ Ema Asa macachichapa ema Josafat. Ema Josafat macachichapa ema Joram. Ema Joram macachichapa ema Uzías.

⁹ Ema Uzías macachichapa ema Jotam. Ema Jotam macachichapa ema Acáz. Ema Acáz macachichapa ema Ezequías.

¹⁰ Ema Ezequías macachichapa ema Manasés. Ema Manasés macachichapa ema Amón. Ema Amón macachichapa ema Josías.

¹¹ Ema Josías macachichapa ema Jeconías énapa ena maparapenaveana, ena nacatararuanahi námaqueneanahi ena apavasana ticavasanahi te Babilonia.

¹² Te táequenepa eta juca, ema Jeconías macachichapa ema Salatiel. Ema Salatiel macachichapa ema Zorobabel.

¹³ Ema Zorobabel macachichapa ema Abiud. Ema Abiud macachichapa ema Eliaquim. Ema Eliaquim macachichapa ema Azor.

¹⁴ Ema Azor macachichapa ema Sadoc. Ema Sadoc macachichapa ema Aquim. Ema Aquim macachichapa ema Eliud.

¹⁵ Ema Eliud macachichapa ema Eleazar. Ema Eleazar macachichapa ema Matán. Ema Matán

macachichapa ema Jacob.

¹⁶ Ema Jacob macachichapa ema José, ema suímahi esu María, máenahi ema Jesús, ema ticajare Cristo, ema vicuchapaquenehi.

¹⁷ Tacahe, catorcemuriana ena mámariéqéque-
neanainihi ema Abraham. Ema rey David,
émapa náichecuinehi eta natupa. Tacahe, ema rey
David, catorcemurianavare ena mámariequene-
nainihi. Ena nacarataruanahi námaqueneanahi
ena apavasanana te Babilonia, énapa náichecuinehi
eta natupa. Ema Jeconías, catorcemuriana ena
mámariéqueneanainihi. Ema Jesucristo, émapa
náichecuinehi eta natupa.

Eta máuchusira ema Jesús

(Lc 2.1-7)

¹⁸ Ani tacahehi eta máuchusirahi ema Jesu-
cristo. Esu maena María, tráturipahi eta suítauchi-
rayarehi ema José. Vuíchahasera nacachaneca-
cahini. Ticajaripahisera ésu, mávajúechirahi ema
Espíritu Santo.

¹⁹ Ema José, tétavicavahi eta máuriva. Eta
tacahe, vahi tisemaimahi. Váhivare mavara-
hahini máimicatsiriakahini esu María. Mavara-
hahisera macaepaha eta matratune suyehe ésu.
Váhisera mávarahahini náechahini ena achaneana
eta tacayemaquenehi.

²⁰ Ema Viya máimararacahi eta mapanereruhi.
Eta tacahe, tiúcupaicapa ema ángele mametapanahi
te mavapure ema José. Ánipa máicha*:

* **1:20** Ema ángele, eta máechajisirahi ema José, manacahi eta
nayaherepi náechajisira ena israelítana. Ani macahehi: “Piti José,
machicha ema David”.

—Tata José, tímitecanuhi numetapanavi eta juca: Vahi picueñamava eta pítauchirayare esu María. Tájina píchavaimahi. Taicha ticajaripahi ésu, mávajúechirahi ema Espíritu Santo.

²¹ Tacahe, te máuchucapa ema suchichayare, enacayare eta máijareyare JESÚS. Éma ticatiuchayare ena achaneana tayehe eta naviurevanayarehini taicha eta napecaturana —máichapa ema ángele.

²² (Títauchavapahi tamutu eta juca máechajirivanahi ema Viya mayehe ema víyarahaini profeta Isaías.

²³ Ani tacahehi: “Sutiarihiyare esu amaperu esena témunahiricavaya ticajari. Ema suchichayare, yátupiqueneyare eta émaira Viya, tiúcupauchahaviyare ticatiuchahavipanayare” tacahepa.)

²⁴ Tacahe, te téjamiuchavapa ema José eta macavapureirahi, ichaperinehi eta masuapirahi eta máechajirivanahi ema ángele mavaneruhi ema Viya, eta máitauchirayarehi esu María.

²⁵ Váhisera nánecacahini te jena cájeanahi eta sucajarirahi. Tacahe, suínacapa ema suárachichahi. Nanacapa eta máijarehi JESÚS.

2

Náejirapana ema amuya ena reye mágoana

¹ Eta máuchusinehi ema Jesús te avasare ticaijare Belén tayehe eta departamento Judea. Te jena año, ema Aluresi ema tayehehi rey eta Judea. Tásiha, títecapanapa te Jerusalén ena reye mágoana tiásihanahi te tayerehiquene avasare tinapaica te táuchusine eta sache.

² Nacayasesererupaipahi, ánipa nacahe:

—Víti, tímitecahavi eta vitanusirahi ema amuya máuchurehi rey-yarehi eyehe eti israelítana. Taicha vímahahi eta arairu jarairiqui, vémetearuhi máicutiarahi ema Viya eta máuchusinehi ema amuya rey-yare. Titupihapa eta te juca eyehe. Puiti vivarahahi véjirapanayare éma. ¿Távihapuca mávihahi ema amuya? —nacahepa.

³ Te masamairiricapa ema Aluresi, ichaperinehi eta mapaneréqueneháirahi. Vaipa máurisamu-rehíni. Ena achaneana te tajuhe eta avasare, énerichuvare napaneréquenehahi éna apanavare eta juca téchacarehi.

⁴ Tacahe, ema Aluresi máimichuhavacapa namutu ena tuparairucana énapa ena títuruequenehana eta Sagrada Escritura. Mayaserecavacapa:

—¿Távihapuca máuchusihayarehi ema vicuchapaquenehi ticaijareyare Cristo? —macahepa.

⁵ Éna najicapapa:

—Te Belén te tachacaya eta juca viávasa Jerusalén. Taicha tacahehi eta májurehi ema víyahaini profetaini Isaías. Máechajicahi éma eta avasare tímícutijiricavahi eta achanénahini. Ánipa macahe:

⁶ “Píti avasare Belén, tachichavihi eta Judea, picunachacarepánayare píti. Taicha eta máuchusihayarehi piyehe ema ichapequeneharehi eta maháquenucávayare. Éma, téchapajirimurihayare namutu ena vijaneanana israelítana”.

⁷ Tacahe, te masamapa ema Aluresi, máichuhavacapa ena mágoana. Mañajichamuripa,

taicha mavaraha máechaya tájamuhupuca te tépanavainapa náimahapa eta jarairiqui.

⁸ Te máechapa, mavanecavacapa éna te Belén. Máichapa:

—Eyana etanuca ema amuya te Belén. Te étupiacapuca, echava emetacanuyare, apaesa nuyana núti apanavare néjirapanayare —máichavacapa.

⁹ Tacahe, ena mágoana, eta nasamirahi, tiyananavarepa. Tásiha, náimahavarepa eta jarairiqui náehirupahi. Tiyanapa te namirahu. Étapa te Belén eta tatupihaiyahi, te táinahu eta mávihahi ema amuya.

¹⁰ Tétavicava eta náurisamurevahi ena mágoana eta náimairahi eta tatupihairaripa.

¹¹ Títecapánavanepa eta te peti mávihahi ema amuya. Náimahapa éma, ésupa esu maena María. Tásiha, tépuyucanapa natsiucapa ema amuya. Navecuhapa eta námavahuanapahi. Nájaracasichapa eta oro, eta incienso étapa eta táijiyequene perfume.

¹² Te táequenepa eta náejirairahi ema amuya, tichavanayarepa te návasa. Apanapasera eta achene eta nayaníhapahi, taicha ticametacasianapa te navapure vaipa nacuetavajica te mávihahi ema Aluresi.

Éma José ésupa esu María náimijunapa ema amuya te Egipto

¹³ Tacahe, te táequenepa eta nayanirahi ena mágoana, tiúcupaicapa ema émana ángele mavaneruhi ema Viya, mametapanayarehi ema José te mavapure. Ánipa máicha:

—Pécheputa, José. Piyana piáma ema amuya ésupa esu María tayehe eta Egipto. Pinasiyare ánaqui. Tiámainucava te numetacavivare eta pichavirainapa, taicha ema Aluresi títecayare matanucayare ema amuya, mavarairahi macapacayare —máichapa ema ángele.

¹⁴ Tacahesera ema José téchepucapa. Tétupiríca-vanavanepa te jena yati. Tiyananapa námapa ema amuya tayehe eta Egipto.

¹⁵ Nanasipa ánaqui. Tiámainucava te tépenapa ema Aluresi, ticavanahianavarepa mayehe ema ángele eta nachavirayare. Tamutu eta juca títauchavahi eta juca mametarapi ema Viya eta te Sagrada Escritura, ani macahehi: “Te Egipto nímijunaiyahi ema nuchicha. Te táequenepa, níchuhayarepa éma”.

Emá Aluresi máimicapapajicapa ena amuyanaini te avasare Belén

¹⁶ Tacahe, ema Aluresi te masamairiricapa eta nánucuiraripa ena mágoana, tisemarinehi eta navayuasirahi. Máimivanerecapa nacapapajicapana namutu ena amuyana ajairana tiávihanahi te Belén énapa ena tiávihanahi te tachacayahana, ena ticayehearipa apina año énapa ena náuchusirávana. Máepanaequenehapa eta táuchusihahi eta jarairiqui náimahaquenehi ena mágoana.

¹⁷ Tacahe, te Belén eta táitauchiravahi eta májuchaquenehi ema víyarahaini profetaini Jeremías. Ani tacahehi:

¹⁸ “Tétavicavahi eta najapanuiravahi ena es-enana. Ichape eta náiyairahi taicha ena sun-taruana nacapapajisirahi ena nachichanaveana.

Nájina naratahahini nacamatinaahini taicha eta najapanuiravahi ichape” tacahepa.

¹⁹ Tacahe, te jácani año te táequenepa eta máepenirahi ema Aluresi, tiápechavavarepa ema ángele máechajicahi ema José te mavapure ánaqui te Egipto. Ánipa maicha:

²⁰ —Péhepuca, José. Piveha ema amuya ésupa esu maena. Piyana pichava te piávasa Israel taicha vaipa táenamavacare. Tépenaipahi ema tipanereuchainihi ticapacayahini ema amuya —máichapa ema ángele.

²¹ Jéhesare, ema José téchepucapa. Tétupiricavapa, ésupa esu maena ema amuya. Tiyananapa tichavanahi tayehe eta návasa.

²² Tacahe, eta napaisirapahi eta nachavirapa tayehe eta návasa, masamairiricapa ema José eta maviravaipahi aquenuca ema Arquelao, machicha ema Aluresini. Tipicapa ema José machavahini tayehe eta Belén. Tásiha, ema ángele mápechavarepa máechajicahi te mavapure eta matupiruirayarepa te Nazaret te tinapaica Galilea.

²³ Te títecapanapa, ánaqui étapa náejasihahi. Tacahehi eta tátauchiravahi eta táechajirivanahi eta Sagrada Escritura nájureanahi ena profetanaini eta macaijarerayarehi Nazareno ema Jesús.

3

Ema Juan Tícachasiricarahi tépanavapa ticametairu eta máechajiriruva ema Viya nayehe ena vámahicuruhana

(Mr 1.1-8; Lc 3.1-9, 15-17; Jn 1.19-28)

¹ Tacahe, te jácani treinta áñoohi, matiarihivare ema achane ticaijare Juan. Éma, máichuhaquenehi ema Viya eta macametarairuirayare, máetupiricavacayare ena achaneana. Tacahe, masuapahi eta matuparahahi. Tiyanapa vámahicuruhapa. Váipa avasarecuruhainahini. Ticametarairupaipa nayehe ena macutiqueneanahi vámahicuruhana, ticavasanahi te tachausi eta Jordán te tinapaicahi eta Judea.

² Ánipa macahehi eta máimituresirahi:

—Ítsivacha eta epanereruana. Éneuchava mayehe ema Viya, taicha márajapainapa ema aquenu-cayare mavaneruhi ema Viya —máichavacapa.

³ Ánaquiaparipahi eta áñoana acane, ema Viya mametacapa ema víyarahaini profeta Isaías eta mapanereruhi, eta mavanesisarayare ema Machicha te juca apaquehe, ticatiurahiyarehi eta tímitecayarehi. Énerichuvare matiarihiyareva ema apana achane máichuhaquenyarehi ema Viya. Macametarairuyarehi, máetupiricavacayare ena achaneana, náinajisirayarehi eta napanereruana tauriqueneana, apaesa táuri eta najacapirayare ema Machicha ema Viya. Émaripa ema Juan, ema máechajisihaguenehi ema Viya, máetupiricavacayare ena achaneana.

⁴ Ema Juan, vanairucahi me Viya, profetahi éma. Eta mamuirihahi eta náitsameru tajiyaha eta náitátiquene ticaijare camello. Eta máitijuhe, vácapi jayumepi. Eta maniriji manicasare eta tsacara. Eta matítivera eta mápama.

⁵ Tiyananavare nacapayaca ena achaneana ticavasana te Jerusalén, navarairahi

nasamararaca eta máechajisihaguene; énapa ena ticavasana te Judea, énapa ena tiávihanahi tayehe eta cajacure Jordán.

⁶ Tacahe, eta nametauresiravaipa, navarairahivare náinajica eta napecaturana, ema Juan máicachasicavacapaipa te cajacure Jordán.

⁷ Énaripa ena fariséoana énapa ena saducéoana nayanauchahivare ema Juan. Vahi náeneuchavahini, navarahahisera ticaicachasiana. Tacahe, ema Juan máichavacapa:

—¿Tájaha tacayema eta epauchiranuhi, eti tachichanaveanatataji eta quichare? Esamairiricahipuca eta járajapairayarepa eta táíñehiqueneyare ecuñaraqui. Evarahahipuca iúchucuhayare.

⁸ Tiuri puiti, te evarahapuca eta iúchucuha, yátupina tátupiruva eta epanereruana. Ímrecava eta ínajisiraya eta epecaturana.

⁹ Váhivare ecucajamurava eta mámariéqueneháirahehi ema viáchucaini Abraham. Taicha tayanapane mámarihepuca éma, váhisera iúchucuhaimahi te vahi ecuitsivacha eta epanereruana. Ema Viya, tájina máemaitucaimahi éma. Te mávarahapuca, vahi máejecharachaimahi máepiyaca achaneanaina eta juca mari, mavarairainahi yátupina ena mámariequeneanaina ema Abraham.

¹⁰ Ecauneuchava, taicha tiánehipa eta táitecapauchirahaviyare eta ecuñaraqui nayehe ena achaneana máitucarahanahi téneuchavana, váhivare náitsivachahini eta napanereruana. Tímicutijirícavaipa te máechucayarepa ema

achane eta yucuqui máhireana. Ticaechuyarehi tamutu eta tapareana. Tíjuyarehi.

11 Yátupi núti nícachasicahahi te une, te éneuchava mayehe ema Viya. Ávanepaipahisera mácani ema yátupiquene Cristo. Te yátupina ecasiñava mayehe, tícachasicahayareva; tíjaracahayareva ema Espíritu Santo. Téhesera vahi ecucasiñavapuca mayehe, tícuñacahayare tayehe eta táijurequene yucu. Éma, ichapequenehi nuyehe núti. Váiparinehi nácutinasimahi eta máitupajjiasiravahi. Váiparinehivare nácaemuñavaimahi macamusuranuhini núti páuresami.

12 Puiti éma márjapainapa tinerejiricainapa nácani yátupiqueneana téhicana. Máunacainapa éna. Ticutinapa mácani achane te tiácatayajirica eta arusu. Máunacainapa. Tásiha, máquijicapa eta tapiraquiji. Máijuchayarepa te yucu. Eta nacahayare ena máurirahanahi, tíjuanáinapa te yucu, máitavacacayarehi eta namuruira —máichavacapa ema Juan.

Eta macaicachasirahi ema Jesús

(Mr 1.9-11; Lc 3.21-22)

13 Tacahe, títecapavarepa ema Jesús te cajacure Jordán te mávihahi ema Juan. Éma, másihapahi te tinapaica eta Galilea. Mavarahahi ticaicachasiyare mayehe ema Juan.

14 Émasera ema Juan, vahi mávarahahini máicachasicahini. Ánipa macahe:

—Tata Jesús, nútira táuricahi nútivaina pícachasicanu. Nusapihapa núti picaijuhenuhi eta nícachasicaviya —máichapa.

15 Émasera ema Jesús majicapapa:
 —Tájinachucha táichava. Ticamunucarehi nítauchayare eta mavarahaquenehi ema Nucaiyaquene —máichapa.

Tásiha, ema Juan tísapavapa.

16 Te tamutupa eta macaicachasirahi ema Jesús, tiúcupaicapa tayehe eta une. Tásiha, tíjahúchavapa téjiaca eta anuma. Máimahapa ema Espíritu Santo tiúcupaicapaipahi, mavasimahipaipa eta paloma. Tavenesicapa ema Jesús.

17 Tacahe, tiáramicarepa eta mahu ema Viya tásihaquenehi te anuma, ánipa macahe:

—Ema maca ema yátupiquenehi nuchicha némunaruquenehi. Tétavicavahi eta núrissamurevahi máicha —macahepa.

4

Ema Váinaraji Satanás mavaraha macaitsamaraji ema Jesús

(Mr 1.12-13; Lc 4.1-13)

1 Tacahe, ema Espíritu Santo enurujipa máimitucaipahi ema Jesús eta mayaniraya te mávapahi apaquehe. Ánaqui macuchapayarehi eta máitsamarajiyare ema Váinaraji.

2 Tájina manicahini ema Jesús te jena cuarentaquenehi sache, cuarentavare yati eta mayerevahi. Ichapepa eta máecuavahi.

3 Tásiha, ema Váinaraji témeñahavapa mayehe. Mavarahapa macaetemayarehi. Ánipa máicha:

—¿Pécuhapa píti? Tacahe, pivaneca eta juca mari táepiyacava pan, taicha píti machichavihi ema Viya, ¿masí? —máichapa.

⁴ Ema Jesús majicapapa:

—Váhipuca pecha eta táechajiriruvahi eta Sagrada Escritura, ani tacahehi: “Vahi tacarichuimahi eta tinicacare ticaitarecayare ena achaneana. Tacachaneyarehi eta máechajiriruvana ema Viya. Jéhevare, éta ticaitarecarahiyare” macahepa.

⁵ Tásiha, ema Váinaraji mámvarepa tayehe eta tacapicahuquene avasare Jerusalén. Máimiapanapa te táinahu eta Templo.

⁶ Tásiha, máichapa:

—Te yátupina machichavina ema Viya, písapavayare pémirica te apaquehe. Tájina píchavaimahi eta pémirisirayare. Pécharichuhi eta táechajiriruva eta Sagrada Escritura, ani tacahe: “Ema Viya mavanecapa ena mayeheana ángeleana téchapajiricaviana. Tiámavianayare te navahuana, apaesa vahi picucayutetu eta máriana eta te pipaisirayare” tacahepa. Tásiha, németeaca tijaneacavianayare puiti, vahi náisapaimahi picajara te pémirica —máichapa ema Váinaraji.

⁷ Tacahe, ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamarajimahi ema Viya, taicha Piáquenuhi éma” —máichapa.

⁸ Tacahe, ema Váinaraji mámvarepa te táinahu eta anuquehe mari cerro. Máimechapa tamutu eta ichapequeneana avasareana te juca apaquehe ticutirinehi tacachacayajiricacahini taicha eta máitupajijiasiravahicacha ema Váinaraji. Máimechavarepa eta ichapequeneana náimahaqueneana ena achaneana.

⁹ Tacahe, máichapa:

—Núti níjaracaviyare tamutu eta juca avasareana. Pítina náquenuvina ena távacuanahi eta avasareana. Pépuyucanumasera te numirahu. Pitsiucanu apaesa níjaracavisarepa tamutu — máichapa ema Vainaraji.

¹⁰ Émasera ema Jesús majicapapa:

—Pévuisihatataji piti Satanás te juca numirahu. Váhipuca pecha eta táechajiriruvahi eta Sagrada Escritura. Ani tacahehi: “Macarichu ema Viya vépuyumirauchayare. Macarichuvare vicaemata-neacayare” tacahepa. Váhiquene táurica nucaemata-neacavihini — máichapa ema Jesús.

¹¹ Tacahe, ema Váinaraji térajicavapa. Majunijicapa ema Jesús. Tásiha, tiúcupaicanapa ena ángeleana, náechapajiricapa ema Jesús.

*Emá Jesús tépanavapa ticametarairu
(Mr 1.14-15; Lc 4.14-15)*

¹² Tacahe, te jena sácheana, nacaratacapa ema Juan. Námapa te jácani tayerehiquene. Tacahe, ema Jesús, eta masamairirisirapa eta macaeratairahi te cárcel ema macheji Juan, tiyanapa tichava te mávasa Nazaret te Galilea.

¹³⁻¹⁷ Váipasera mánasihini te majurusinehi. Tiyanapa tayehe eta avasare Caperaum. Étapa máejasihahi. Eta juca avasare távihahi te tachausi eta cáquiure Galilea. Eta macametarairuirahi,

tamutuhi mapaica eta tinapaica eta provincia Galilea*

—Éneuchava mayehe ema Viya. Ítsivacha eta epanereruana, taicha tiánehi eta sáchezare tímerecavaya eyehe ema ticatiuchaheyare. Aquenucayare mavaneruhi ema Viya, téchaheyare éma — máichavacapa.

Eta juca títauchavahi eta májureenahi ema víarahaini profeta Isaías, ani tacahehi: “Tíuricacareanainapa ena achaneana cávasanahi te tachausi eta cáquiure Galilea tayehe eta provincia Zabalón étapa eta Neftalí, namutu támairiaca ena ticavasana te apachara eta Jordán. Éna, tiyerehi eta nacatajivairanahi, tacuti eta tavayureva eta tamapicuva. Puítisera máitecapauchavacaripahi ema tímícauchamurihi. Ticatiuchavacayarehi tayehe eta nacatajivairahi. Éma, tétumechavacahivare eta mamícauchiravacahi” tacahepa.

Éma Jesús máichuha ena cuátroqueneana ténicarahiana, máimitureanayare (Mr 1.16-20; Lc 5.1-11)

¹⁸ Tacahe, eta mapaisirapahi ema Jesús te tachausi eta cáquiure Galilea, máimahavacapa ena apinana ajairana, ema ticaijarehi Simón Pedro émapa ema maparape Andrés. Eta náematanerepi

* **4:13-17** Éma profeta Isaías, ánivare macahehi eta máecha-jisihairahi: “...étaripa eta provincia táviha náitecapihahi ena apavasanana”. (Acane eta juca apaquehe, apina eta apana táijareanaini: eta Zabalón étapa Neftalí.) Éta máimitusiravacahi ena achaneana, ánipa maicha ema Jesús:

ena nani, ténicarahanahi. Náquijierecahi eta nayehe tarrafa.

¹⁹ Tacahe, ema Jesús máichuhavacapa:

—Yare, éhicanu. Núti níjaracaheyare eta apana ématanerepiyare. Éti ítucavaparacahi eta jímana; tacaheyare eta ítusiravayareva ena achaneana, machaneranayare ema Viya —máichavacapa.

²⁰ Enevanepa náinajicapa éna eta náenisirahi. Tiyananapa náehicapa ema Jesús.

²¹ Ánaquipanavarepa máimahavarepa ema Jesús ena apinana ticaparapecácanavare: ema Jacobo émapa ema Juan. Téjacanahi te napacure. Matiari-hihivare ema naiya Zebedeo. Náititijiricahi eta nayehe tarrafa. Ema Jesús máichuhavarepa.

²² Enurujiapa náehicavare. Nanaquicavarepa eta napacure, émapa ema naiya. Najunijicavarepa.

Ema Jesús máimitucavacapa ena camuriqueneana achaneana

(Lc 6.17-19)

²³ Eta mapaisirahi ema Jesús tayehe eta avasareana te Galilea, máimitucavacapahi ena achaneana te sávarumuhuana tayehe eta náurujisirarevana. Mavanecapa eta náeneuchiravaina taicha tiánehipa eta sácheyare tímerecavayare ema ticatiuchayare, ema aquenucayare mavaneruhi ema Viya. Énerichuvare ema Jesús macanaracpahivare tamutu eta apanapanequeneanahi jumareana eta najumanapahi ena achaneana.

²⁴ Tacahe, nasamairiricapa ena achaneana ticavasanahi eta tasimutuqueneana avasareana te tinapaica eta Siria. Tásiha, námavacapaipa

ena nacajumaqueneana, apanapanenejiquenehi eta najumana, nacatiruhavanahi. Énaripa ena návaháruanahi ena éreanana, ena tirapapasiana, énapa ena muracaquihana. Namutu ena nani, macanaracavacapahi ema Jesús.

²⁵ Tacahe, camuriana ena achaneana téhicanahi éma. Éna, tiásihana te Galilea, te Judea, te Jerusalén, te avasareana tinapaica eta Decápolis, étapa te apachara eta Jordán.

5

Ena Jesús máimitucahi nayehe ena ticunachacareanahi me Viya

(Lc 6.20-23)

¹ Tacahe, eta máimairavacahi ema Jesús ena camuriqueneana achaneana, tiápanapa tayehe eta anuquehepahi apaquehe taicha tiúripanahi eta nasamararasirayarehi ena achaneana. Téjacaripa éma, énapa ena máimitureana nachayacaipahi.

² Ani tacahehi eta máimiturapianahi:

³ —Ena náimatihí eta tacamunuqueneanahi eta náchanevana, tétavicavahi eta náuricacarevaya taicha máejerare eta najacapirayare eta máechajiriruva ema Viya, machaneranyarehi.

⁴ Ena nani tijapanujiricavanahi, tétavicavahi eta náuricacareva taicha émaripa ema Viya macurisa-murechavacayare.

⁵ Ena nani tisuapajirahianahi me Viya, mánsuanahi mayehé, tétavicavahi eta náuricacareva taicha máíjararuanayare eta arairu apaquehe náicuchihí me Viya.

6 Ena nani, ichape eta najamurachirahi eta náitairesirahi eta matapiravacare te mamirahu ema Viya, tétavicavahi eta náuricacarevaya taicha máijaracayare éma eta navarahaquenehi.

7 Ena nani tijapanurahianahi nayehe ena apamuriana achaneana, tétavicava eta náuricacarevaya; taicha ema Viya, éma apanava majapanuvacayare éna.

8 Ena nani vahi náisapajirícavahíni tahapapicahini eta náehisirahi ema Viya, tétavicavahi eta náuricacarevaya; taicha éna, títecapanainapa te mamirahu ema Viya, náimararacainapa éma.

9 Ena nani ticonsejarahianahi nayeheana ena achaneana, nacaepahairahi eta semanereana, tétavicava eta náuricacarevaya éna; taicha máimereuchainapa ema Viya eta machichairavacahi éma.

10 Ena nani ticatajivanahi eta nacatianacasivahi nayehe ena achaneana te juca apaquehe táichavenehi eta táurivahi eta náitairesirahi, tétavicavahi eta náuricacarevaya; taicha éna aquenucarahanaya majupahanayare ema Viya.

11-12 Eti nuchaneranahi, járajapainapa eta sache eta nacatianasiraheya ena achaneana táichavenehi eta éhisiranuhi. Tipanararachaheanainapa, tépiyaequenehaheanainavarepa. Váhisera ecuarami eta juca. Ene nacahehi eta nacatajivairahi ena profetanaini, ena náinapureanahi machaneranahi ema Viya. Eta tacahe, te nacatianacahepuca, ¡ecurisamurechavachucha, evapinavachucha! ¡Tétavicavahi eta iúricacareva taicha ejacapayare eta ícuchiyare te anuma, taicha ichape eta macunachirahehi ema Viya!

Emā Jesús tímitucahavi eta vicamunucareravayarehi tacutihi eta tacamunucarevahi eta icheve, étapa eta tijarahi

(Mr 9.50; Lc 14.34-35)

¹³ Eti ímiyanavayare eta ecamunucareravahi nayehe ena achaneana, tacutihi eta tacamunucarevahi eta icheve. Vahi tacuepaha eta ecamunucareva. Vahi ecucuti eta tajachira eta icheve, taicha tájina eta táichevainahíni. Tásiha, nájinapa ticamunuimahi. Náepuruinapa namutu.

¹⁴ Tacutiquene éti ecutihi eta tijarahi. Éti, namicahuyarehi namutu ena achaneana eta ímitusiravacaya, apaesa náinajica eta náehisirahi eta tauriqueneana. Ímereuchayahivare eta iúriya, ecutiya eta avasare tiávihahi te tajirumane eta anuquehe mari.

¹⁵ Tacutiquene, vahi ecucuti nácani súnsuana tiyustacanahi jácani lámpara, tásiha nanacapapucaini te tajuhe eta cajune, nayumurusihahini. Nanacayahisera te anuquehe apaesa náimairिकासarepa namutu ena tiávihanahi te peti, tamicaureanayarehi.

¹⁶ Ene ecaheyare éti, ímeredayare eta ejaraivayare nayehe ena achaneana apaesa eta náimairainahi eta táuriqueneana íchaqueneanayare; tásiha nacunachainapa emā Tata Vicaiyaquene tiávihahi te anuma.

Emā Jesús tímitucahavi tayehe eta tasuapacarevahi eta Sagrada Escritura

¹⁷ Vahi étaina tímitecanuhi núti nucaepahahini eta mavanairipiana emā víyahaini Moisés, étaripa eta náimiturapianaini ena profetanaini. Eta

tímitecanuhi núti, níminecapaequenehaheyare eta nájureanahi.

18 Nutupiruva numetacahe: Títauchavaya tamutu eta máechajiriruvana ema Tata. Tímiyanava eta tasuapacareirahi nayehe ena achaneana tamutu eta Sagrada Escritura. Tájina ticaepahaimahi, tayanapane táitavapuca eta anuma étapuca eta apaquehe.

19 Eta tacahe, nácani tépuruanayare eta tavanairipianahi eta Sagrada Escritura, jácani ánichichaquenehi, vahi tisiapanaimahi te anuma. Tavetijipa te náimitucapuca ena apamuriana eta náepuiraya. Nácanisera tisuapanayarehi, tímiturecanahivare eta juca nayehe ena apamuriana achaneana eta náehisiraina; éna, ichapeyare eta nacunachacarevayare eta nasiapiraipa te anuma.

20 Táicha te evaraha ítujicava esiapa te anuma, tacamunuhi tiápajucavaya eta táurivahi eta eyeherepiana éti, ecachuricayare eta nayeherepianahi ena escribánoana, énapa ena fariséoana.

*Ena Jesús tímitucahavi vahi tacunasi te visamure eta visemaneva
(Lc 12.57-59)*

21 Eti écharichucha eta nayeherepiana ena iáchucanaveanaini ani tacahe: “Vahi ecucapaca mácani piparaepiya; taicha mácani ticaparecahi, ticaicuñayarehi”.

22 Nútisera numetacahe eta apana: Mácani tisemahi mayehe ema maparape, énerichuvare ticaicuñayare. Mácani tiúmehahi ema maparape, ticayaserehiyare te namirahu

nácani tuparairucanahi tayehe eta avasare. Tacutiquene mácani ticaecahihi ema maparape, mávacuhaipahi eta ecuñaraqui tayehe eta infierno.

²³ Eta tacahe, te piámapahi eta piámavahu te mamirahu ema Viya, tásiha, péchapanainapapuca eta pitapiravahi mayehe ema piparape.

²⁴ Vuíchaha picuiyaracuha eta piámavahu. Tativanumayare piyaseapanaya eta perdón ema piparape. Pétupiricanumayare tativa eta píchavaquenevahi mayehe éma. Táuricasarepa pichava píyaracuhapanainapa eta piámavahu te mamirahu ema Viya.

²⁵ Tacutiquene te matiarihyarepuca mavaraha mametauchavi te namirahu ena tuparairucana, vahi picucuchapa mametauchavi. Tativayare pétupirica eta píchavaquenevahi mayehe, mapurare vuíchaha picaeratahini mayehe ema juez tayehe eta cárcel.

²⁶ Taicha te náimisiapavipa tayehe eta cárcel, ticajeraequenénapa eta piúchusiraya.

Éma Jesús tímitucahavi vicuneuchavaya eta jácani táimiaquipaica havi tayehe eta pecatu

²⁷ Énerichuvare écharichuhi éti eta náimiturapihi ena iáchucanaveanaini: “Vahi ecuveha esu apana esena”.

²⁸ Puítisera núti numetacahe eta apana: Mácani majamurachahi esu apana esena, ticapecaturaipahi te masamure taicha eta majamurachirahi.

²⁹ Eta tacahe, eta iúquiha váure, te tavarahapuca tímiaquipaicahe tayehe eta pecatu, tavarairahi táimahayare eta tauriqueneana tájiparacana, tiúripa evecuhauquichava iáquiicaya. Taicha

tiúripanahi táejiacava ánichichaina te iáquehe, váhisera tacuimicuñacahe eta te yucu infierno, tamutupahi eta iáquehe.

³⁰ Étaripa eta evahu váure, te tavarahapuca tímiaquipaicaheyare tayehe eta pecatu, tapami-sirahénapapuca íchayare eta tamauriqueneana, tiúripana eyuchatica iáquijica. Taicha tiúripanahi táejiacava eta evahu, váhisera tacuimicasiapahe támutu eta iáquehe tayehe eta yucu infierno.

Éma Jesús manacahi eta máimiturapi nayehe ena tínajicana

(Mt 19.9; Mr 10.11-12; Lc 16.18)

³¹ Énerichuvare ena viáchucanaveanaini náisapahi eta máejerare eta máinajisira mácani achane esu mayena. Ani nacahehi: “Mácani tínajicahi esu mayena, máemepiyarecahi eta ajumeruca táechajisihayarehi eta máinajisiraya esu mayena”.

³² Nútisera numetacahe eta apana: Mácani achane, te máinajicapuca esu mayena, ticapecaturaipahi me Viya. (Váhinénipuca sucaecahihini mayehe ema apana achane.) Énerichuvare te tiápechavahipuca ticaima ésu, tamuriacahi ésu eta maviurevahi ema suima. Tásiha, mácani arairuhi suima, émapa tamuriacahi eta máejeapiravahi taicha eta mavirahi esu esena sucaimaquenehi.

Éma Jesús tímitucavahi eta vahi vijurachaimahi

³³ Énerichuvare esamairiricavare eta náimitucasivahi ena iáchucanaveanaini: “Machu vahi ecuitaucha jácani ejurachirahipuca.

Yátupinasera eta ítauchiraina tamutu eta íjarasiravahi me Viáquenu” nacahepa.

³⁴ Nútisera numetacahe éti: Vahi táuricahini íchahini eta juramento. Vaipa échajisihahini eta anuma taicha éta, mávacurehi ema Viya.

³⁵ Váipavare échajisihahini eta apaquehe taicha éta, macaematanéyahi éma. Váipavare échajisihahini eta Jerusalén, taicha éta, mávacureyarehi ema yátupiquenehi Rey, mavaneruyare ema Viya.

³⁶ Váipavare échajisihahini eta ejurachirahi te echuti, taicha vahi áratahaimahi ehapamachahini, ítivachirahini eta táimahi, tijapupuca, tiquisapuca.

³⁷ Numetacahe: Te tatiarihipuca eta íjarasiravayare, átupiruva ácahe: “Tiuri”. Te váhipuca evarahahi, átupiruva: “Vahi” ácahe. Te émunahacavapuca ejuracha, ema Váinaraji títurucaheripa.

*Éma Jesús tímitucahavi eta vahi vicusema ne nácani ticaetemajiricahaviana
(Lc 6.29-30)*

³⁸ Énerichuvare esamairiricahi eta acane: “Mácani achane téhararecahi mapuchuquichahi ema apana achane, énerichuvare éma napuchuquichayareva ena tuparairucana. Te macavetuquiahechahipuca, énerichuvare nacavetuquiahechayareva ena tuparairucana”.

³⁹ Nútisera numetacahe: Vahi ecujicapa te masema mácani achane váinarajihí. Tiúripána, te náehahepuca nácani te emira, íjaracayare eta apachacaya eta emira.

⁴⁰ Tacutiquene, te natiarihipuca ena timetauchaheana, navaraha naverejicahe eta ecamisa,

vahi ecusema. Váhivare ecujicapairihi. Íjaracavare eta apana eta epacuha.

⁴¹ Ísapayare te nácani navanecahepuca eta enaracureca eta tijitacare. Te navaraha íámina étanaina kilómetro, evapinava eta eservichiravacaina. Vahi ecobrachavacaimahi.

⁴² Mácaniripa tájahapuca mayaseacahe, íjaracayare. Vahi ecueñamiha mácani ticapucahe eta ecayehequeneana.

*Éma Jesús tímitucahavi eta vémunasirayare nácani ticatianacahaviana
(Lc 6.27-28, 32-36)*

⁴³ Énerichuvare esamairiricahi eta acane eta náimitucasivahi ena íáchucanaveanaini: “Émunasirahi nácani témunacaheanahi. Tásiha, ecaticahayarepa nácani ticatianacaheanahi”.

⁴⁴ Nútisera numetacahe: Émunacayareva nácani ticatianacaheanahi. Eyaseaca éma Viya eta nayujarahuina nácani téchajicanahi eyehe. Ímereca eta iúriya nayehe nácani ticaticahaheanahi. Eyujaraucha nácani tiúmehaheanahi ticaetemajiricaheanahi.

⁴⁵ Te ítaucha eta juca, éta tímereuchaheyare eta machichahéirahi éma Vicaiyaquene te anuma. Taicha éma nájina manerejiruina, namutu máemunacavaca: éna achaneana váinarajiana, énapa éna tiúriana. Éma, tíjaracahavi vimutu eta sache vimícahuhi, étapa eta tiquiva.

⁴⁶ Éti, tájina ecunachacarevaina eta me Viya, te nacarichuhi émunaca nácani témunacaheanahi éti. Apanasica éna tisipecaturarahiana náichahi eta juca.

⁴⁷ Tacutiquene, tájinavare ecunachacarevaina eta me Viya, te iúriyare nacarichuhi ena eparape-naveanahi. Apanasica ena máimatirahanahi ema Viya tiúrianahi eta nayehe ena naparapenaveana. Étiserá tatuparacahe ecachuricayare eta iúriya.

⁴⁸ Tétavicavasareya eta iúriya nayehe namutu. Vahi enerejicaimahi ena achaneana. Váhivare eyavanaimahi eta iúriya. Ecutiyare ema Vi-caiyaquene te anuma eta máurivahi.

6

Éma Jesús tímitucahavi eta vahi vicusiñavavaicapa eta víchira eta táuriqueneana

¹ Eta ecáirayare ena páureana, échapavayare. Éma Tata Vicaiyaquene, tájina ticunachahemahi te evarahapuca náimaha ena achaneana eta eca-jirahi, evarairahi ticunachaheanayare. Tájinavare máitsirijicavahini éma eta eyehe.

² Eta tacahe, te ímicatacayarepuca nácani ticamunuvanahi, vahi ecumetajirica. Vahi ecucuti ena apimirana timetajiricanapa te viúrujisirarevana, téhepa te anecapahiana. Eta juca náichahi, navarairahi ticunachacarea-nayarehi nayehe ena achaneana. Nútisera numetacahe: Éna nani ticaheanahi, tájina nacunachacarevaimahi me Viya.

³ Te jácani píjaraca nácani ticamunuvanahi piyehe, vahi picumetajirica. Váhivare picumetaca nácani pémunacasareana.

⁴ Piñajichayare eta píjarasirayare nácani píjaracasiruyare. Tacahe, ema Tata Vicaiyaquene te anuma máimararacahi tamutu.

Jácani píchaqueneana tayumururevana, éma títsirijiequenehayare, tíjaracaviyare eta pícuhihi.

*Éma Jesús tímitucahavi eta viyujarasirayare
(Lc 11.2-4)*

⁵ Te eyujaracahi, vahi ecucuti ena apimirana tiyujaracana te viúrujisirarevana, téhepuca te anecapahiana. Titupihanahi éna eta nayujarasirahi, navarairahi náimararacayarehi ena achaneana. Nútisera numetacahe: Tájinachucha nacunachacarevaimahi me Viya.

⁶ Étisera ani tacaheyare te eyujaraca. Esiapayare te eyehe cuarto, ératacayare eta tapaja. Eñajichavayare eta échajisirayare éma Tata Vicaiyaquene. Éma, tímararacahavihi; masamayarehi eta piyujaracasa.

⁷ Tacutiquene, váhivare ecuapepirica eta ecayemaqueneanayare. Vaipa tácomesahini eápepiricahini eta eyujarasirahi. Vahi ecucuti ena máimatirahanahi éma Viya. Tiúpiemanapa eta nayujarasirahi, náimijachaipa tisamacareanahi mayehe éma Viya.

⁸ Vahi ecucuti éna, taicha éma Viya máimati-ripahi éma jácani vivarahaquenehi viyaseaca.

⁹ Éti, ani tacaheya eta eyujarauchiravaina: Tata Vicaiyaquene, piti piáviha te anuma, vipicauchahi yátupi eta píjare.

¹⁰ Vivaraha ichapeina eta tasuapacarevaina eta pivanairipiana nayehe namutu ena achaneana ani te apaquehe, tacuti eta nasuapiravihi ena ángeleana te anuma.

¹¹ Pájapanuhavi píjaracahavi puiti jena sache eta vicamunuirava eta vinicaqueneana.

12 Pájapanuhavi piperdonachahavi eta viviurevana piyehe, tacuti eta viperdonachira víti ena ticaviurevana viyehe.

13 Vahi picuisapahavi eta vicha eta tamauriquene. Picatiuchahavivare mayehe ema Váinaraji. Taicha píti yátupiquenevihi Viáquenuvihi. Nájina pácuti eta pítupajijiasiravahi. Máichecuaraquire eta pijaraivahi. Amén.

14 Taicha te yátupihi eta eperdonachirahi nácani ticaviurevanahi eyehe, ema Tata Vicaiyaquene te anuma tiperdonachaheyare éti apanava.

15 Téhesera te vahi eperdonachahi ena ticaviurevanahi eyehe, ema Tata Vicaiyaquene váhivare tiperdonachahémahi eta éjecapiravanahi éti.

Éma Jesús tímitucahavi tayehe eta ayuna

16 Tacutiquene, te ayunahepuca, vahi ecajapanuramiraimahi te namirahu ena achaneana. Vahi ecucuti ena apimirana ena tímicaecherachavanahi eta ayunairanahi. Núti numetacahe: Tájinachucha nacunachacarevaimahi me Viya. Éma, váhivare títsirijicavaimahi eta nayehe.

17 Étisera, te ayunahepuca, ímiyanava eta esipauquichiravaya, etatacavavare, apaesa nacuija nacuimatiacahe eta ayunairahehi.

18 Éma Tata Vicaiyaquene tímararacahehi tamutu eta esamureana. Tisamacareyarehi eta eyasearuhi.

Éma Jesús tímitucahavi eta vahi vicuisapava vicasamure eta vímahaqueneanahi
(Lc 12.33-34; 11.34-36)

19 Váhivare tacuavasamurerecahe eta ímahaqueneana te juca apaquehe. Eta juca ticamitiequenehacareana taicha eta tajararesira eta cachusiri, étapa eta táichasivayare. Natiarihivare ena tiámeyechaheanayare.

20 Epanerechaserá eta ecaimahaqueneraya te anuma. Ánaqui jararihi eta táitsivayare eta íchirahi eta táuriqueneana te juca apaquehe. Ánaqui, tájina cachusirina, nájinavare tiámerahina tayehe. Tájina témitiacaimahi.

21 Éti, te ecasamurepuca eta ímahaqueneanahi te juca apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehichapuca eta ícuchiana te anuma, ánaqui evarahayare eyanavaneyare.

22-23 Tacutiquene, ecuneuchava, machu tacuetaviuchava eta ejamurachira eta ímahaqueneana. Ecaratacava, vahi ecuisapa tahapasamurechahe eta ecaimahaquenerahi. Taicha te tahapasamureruhepapuca eta ímahaquene, tétavicavahi eta tamapícuvahi eta te iáchanevana. Téhesera esuapa eta nímiturapiana, tétavicavahi eta tamicauchiraya eta iáchanevana, tímijunijicayare eta emaurivahi, étapa eta ejamurachiravahi eta ímahaqueneana. Eta tacahe, machu ísapava tayanariana eta timapicu eta te iáchanevanasami. ¡Páurehesami éti te ísapavapuca tanasipa!

24 Tacutiquene éti, eta ítaresirahi, vahi táuricahini apinanainahini ena iáquenuana. Taicha émuna-capanayarehi ema émana, tisuapacarepanayare-hivare; tásiha ema apana, apaesarineya eta émuna-

siraya, váipainapa tisuapacaremahi éma. Ene tacahehi eta juca ímahaqueneana, vahi ecuisapa tahapasamurechahe eta plata, machu tahapapirica eta émunasirahi ema Viya, étapa eta ecaemaneasirahi éma.

*Éma Jesús tímitucahavi eta majaneasirahavihi
ema Viya viti machichanaveana
(Lc 12.22-31)*

²⁵⁻²⁶ Étasera nuvaraha yátupina eta ecasiñavairaina mayehe ema Tata Vicaiyaquene. Vahi ecucaañamaracavaicha tayehe eta enicaquenerepi étapa eta emuiriharapi puiti juca ítaresiraichaha. Eta enicaquenerepi, étapa eta emuiriharapi, tájina táeñamavacarevahini. Ímararacarichuhi eta cáyureana. Vahi táevacahini, váhivare táechatijiricahini, táunacahipucaini eta tanicaqueneyare. Émasera ema Tata Vicaiyaquene máechapajiricahi, máijarasirahi tamutu eta tanicaquenerepiana. Evetijipa éti, íápajupanavahi eta éñamacarévhahi me Viya tayehe eta cáyureana.

²⁷ Tájina táuricahíni eta éñamiravahi eta júcana. Éti, nájina tiratahaimahi étijivainahini ecajurucavahini, tayanapane tahapasamurechahehipuca.

²⁸ Tacahe, ¿tájaha tacayema tihapasamurerecahehi eta emuiriharapi? Ímararacarichuhi eta tajurusirahi eta flúreana, vahi tacaañamaracavahini tacaematanehini, táijururecahipucaini.

²⁹ Táitsivahisera, te tépunehapa, tétavicavahi táurinavahi eta taflurene. Nájina tácuti eta nacamuirihaira eta táurinava, émaripa ema víyarahaini rey Salomón eta tajanunusira eta macamuirihairahi.

³⁰ Apanasicahi, ema Viya máijaracahi eta táurinavahi, ánipirichuhinéni eta táitaresirahi. Evetijipa éti eta máechapajirisirahehi, máijarasiraheyarehi eta emuiriharapi eti achaneana. ¿Tájaha tacayema vahi ácasiñavahíni eta mayehe?

³¹ Eta tacahe, vahi ecucaeñamaracavaicha tayehe eta enicaquenerepiana étaripa te echuririacapuca eta une érayare, váhivare eta emuiriharapi.

³² Ena achaneana vahi náimatihini ema Viya, ichapemurihi eta tacañamarasiravacahi eta júcana. Vahi nácasíñavahini mayehe ema Viya, nacuchapahipucahini eta máijararuyarehi éma. Étiserá, écharine eta mararirahahi ema Ecaiyaquene te anuma. Máimatíhi éma tamutu eta ecamunuqueneanahi.

³³ Tásíhasera éti, tativayare íjaracava ecaemata-neacaya ema Viya, ecasamureirahi eta ítauchirayare tamutu eta mavarahaqueneanahi. Tihapa-samurechaheyarehivare eta tátupiruvairaya eta ítaesira, ecurisamurechirayare éma. Máimaharínepa éma. Tíjaracaheyare tamutu eta juca ecamunuqueneana.

³⁴ Eta tacahe, ácasiñava mayehe éma. Vahi tacuimipanerechahe eta íchararacavayare achichu. Puiti ecuchapaipa eta máimicatasiraheyare. Ímiyanava eta ecuchapirayare eta máimicatasiraheya.

7

Emá Jesús tímitucahavi eta vahi vicunemahi

*eta nájecapiravana ena apamuriana achaneana;
vicuneuchavasera víti
(Lc 6.37-38, 41-42)*

¹ Vahi ecunemahi eta nájecapiravana ena apamuriana achaneana, váhivare ecucaecahivaca, machu étaina táimicuñacahe me Viya.

² Te ecunerahipuca nayehe ena apamuriana achaneana, ecaheyare éti eta macunerahénapa ema Viya tayehe tamutu eta éjecapirávanahi éti.

³ Piti ajaira, pítipa piti esena, vahi táurica eta picunerahi eta ánichichaqueneana nájecapiravanahi éna. Tituparacavi pítijivaina picuneuchava eta táichapeva eta péjecapirava.

⁴⁻⁵ Vahi tatuparacavimahi pétupirica eta jácani nájecapiravahi ichipichuana ena piparaepiyana. Tájina piviyahini eta piconsejachihaimahi. Ichapesera eta tatuparasiravihi pétupirica eta péjecapiravanahi píti. Tapaenumava pétupirica eta píchavaquenévanahi, táuricapaini piconsejacha ema piparaepiya tayehe eta máichavaquenévahi.

*Ena ticaecahirahiana, vahi vicuijaraca jácani
téñamacareana*

⁶ Vahi ecuimituca eta máechajiriruvana ema Viya nácani achaneana ticaecahirahiana, taicha váiparinehi náuricaimahi. Machu étaina táemehahe. Váhivare ecuijaraca jácani téñamacareana, machu nácatayayajica.

*Vahi vicuyacuji eta viyaseasiraina ema Tata Vi-
caiyaquene*

(Lc 11.9-13; 6.31)

⁷⁻⁸ Ánivare tacahe eta máechajiriruva ema Jesús:

—Numetacahe: Échajica ema Tata Vicaiyaquene. Eyaseacayare eta ecamunuqueneana. Éma, tijapanurahi. Tisamaheyare, tíjaracaheyareva. Vahi ecuyacuji eta eyaseasiraina. Énerichuvare, te tatiarihinapapuca eta jácani íchiraya ichapehi eta taca jeravayarehi, eyaseacayare máijaracahehini eta ítupajijiasiravaya. Éma, tíjaracaheyare. Te jararihipuca eta táichejimiráuchahe, éma macaevuisinaheyarehi.

⁹ Eta juca tímicutijiricavahi te natiarhipuca ena echichanaveanahi éti, te tiyaseacaheanapuca eta pan nanicayare, váiparinehi táuricaímahi íjaracahini éti eta márijahi. Tímicutijiricava evijaruinahini ena echichanaveana.

¹⁰ Étaripa te tiyaseacaheanapuca eta jima, váhivare táuricaímahi íjaracaimahi eta quichare.

¹¹ Etiarihi éti vahi ecajirahihini nayehe ena achaneana. Iúrihisera nayehe ena echichanaveana. Mavetijicha ema Tata Ecaiyaquene tiávihahi te anuma. Éma, vahi ticavijaruhemahi eta eyaseserepi. Tíjaracaheyarehi tamutu eta táuriqueneana eyasearuanayarehi.

¹² Evaraha eta náurivaina ena achaneana eta eyehe, ¿masi? Tásiha, táuricahi eta íchiraya eta iúri va nayehe. Taicha eta tacahehi eta táimiturapi eta Sagrada Escritura eta eyehe.

Jararihi eta apina achene
(Lc 13.24)

¹³⁻¹⁴ Esamanuchaha. Jararihi eta apina achene. Eta ichape achene, vahi tácajé ra eta náehisira ena achaneana. Camurianapana ena téhicana eta

ticaijuhe tayehe eta ecuñaraqui. Étasera eta achene ánicuchicharichu, ticaijuhe tayehe eta vítare-sirayare, tájina ecuñaraquina. Váhisera camuri-anaina ena téhicana éta. Éti epamicava esiapa tayehe eta achene ánicuchicharichu.

Ena Jesús máimicutichahi ena achaneana tépiyahirahiana, nacuti eta yucuqui máurinisiráha eta tahi

(Lc 6.43-44)

¹⁵ Échapavayare tayehe eta náimiturapiana ena tépiyahirahiana tímijachavana machanerana ema Viya. Tépiyacavánapahi tiúriana tacutihi eta tamansuva eta uvesa. Téhesera te nasamureana, tétavicavahi eta navainarajiva, nacutihi eta ichini.

¹⁶ Ímatiacavacahisera éna táichavene eta náichaqueneana. Nacutihi eta yucuquiana. Eta yucuqui, tímaticarehi eta táhi. Étaripa eta sitavere, váiparinehi tiúchucaimahi eta tacahihini narasahinahipucaini. Tásiha, eta ijicaqui váiparinehivare tacahimahi eta táhi cachicheruhinahipucaini.

¹⁷ Tacutiquene, tímaticarehi eta táhi eta yucuqui tiúrinisi. Tímaticarevare eta táhi eta máurinisiráhana.

¹⁸ Eta yucuqui tiúrinisihi eta táhi, vahi témunahiricavaimahi vahi tacurinisihini eta táhi. Étaripa eta máurinisiráhana, váhivare témunahiricavaimahi táurinisihini eta táhi.

¹⁹ Tamutu eta yucuquiana máurinisiráhana ticaechuyarehi, tíjuyarepa te yucu.

²⁰ Eta tacahe, ímativacayare ena tépiyahirahiana táichavene eta náichaqueneana tamauriqueneana.

Vahi námutuimahi títujicavana tisiapanaimahi te anuma

(Lc 13.25-27)

²¹ Nararihinapa ena achaneana tépiyacavana nuchanerana. Váhisera títujicavanaimahi tisiapanana tayehe eta mávasa ema Viya. Tayanapane náichanuinapapuca “Tata Viáquenu”, vahi tisiapanaimahi. Taicha vahi yátupinahini eta nacaemataneeasirahi ema Tata Nucaiyaquene te anuma.

²² Te táitecapapa eta juicio, camurianayare ena tíchanuanayare: “Tata Viáquenu, víti véchajisihapacacahi eta píjare. Vipiaracavihi te píjare eta viáquijisirahi ena váinarajiana, téhevare te píjare vímerecoahi eta tiáramicareana” náichanuinapapuca.

²³ Nútisera nujicapainapa: “Éti vahi nuchane-rahéna. Nímatisera núti eta íchaqueneanahi tauriqueneana. Évuishi te numirahu” níchainapa éna.

Ema Jesús máimicuticha ena tisuapajirahiana énapa ena masuapajirairahana

(Lc 6.47-49; Mr 1.22)

²⁴ Nácani tisuapanuanahi náitauchahivare eta juca nuvanairipianahi, téchemarahianahi táicha. Nacutiyarehi mácani títucahi tépiyareca peti, manacayarehi eta túmeana yucuqui emuruquiana.

²⁵ Jéhésare, te járajapapa eta muraca técticava, tiámaquiha tiquiva, tisiamaapa eta une, váipasera tacayayahini eta peti, taicha tiúsiapiravacahi.

²⁶ Nararihivare ena tépiyacavanahi tisuapanuana, váhisera náitauchahini eta juca nuvanairipiana. Éna nacutihi ema máitucaraha tépiyareca

peti. Vahi manacaimahi eta túmeana yucuqui, váhivare táusiapiravacahini máicha.

²⁷ Te járajapapa eta muraca técaticava, tiámaquiha tíquiva, tísiamapa eta une, tacajimuyapaicapa eta apaquehe. Tiáquipaicavapa eta peti, tamutu-samipa témitiequeneha —máichavacapa ema Jesús.

²⁸ Te títapiricapa ema Jesús eta máimitusi-ravacahi ena achaneana, ichaperinehi eta náramirahi eta máimiturapiana.

²⁹ Vahi nasamasarénahini. Tétavicavahi eta máitusirahi mayunapaicahi tamutu. Tétavicavahivare eta tasuapacarevahi eta máimiturapiana.

8

Emá Jesús macanaraca ema émana achane leproso

(Mr 1.40-45; Lc 5.12-16)

¹ Te tiúcupaicapa ema Jesús tayehe eta cerro te mávinehi, camuriana éna achaneana téhicanapahi.

² Tacahe, macahepaipa ema émana achane leproso. Témeñahavapa mayehe ema Jesús. Tépuyucapa te mamirahu. Tásiha, máichapa:

—Tata, nucasíñavahi eta piyehe, picanaracacunupaini.

³ Tacahe, ema Jesús majicapapa:

—Nuvaraha nuncanaracavi. Tájinapa píchiravaina puiti —máichapa.

Máemamahacapa. Tásiha, enevanepa tinaracahi ema macajumaquenénihini eta máechajisirahi ema Jesús.

⁴ Tásiha, ema Jesús máichapa:

—Pímaha, nacuija picumetaca eta nútirahi nuncanaracavihi. Piyanavanesera pímerecava

nayehe ena tuparairucana, apaesa náimamacavi. Énainapa timetajiricanainapa eta yátupirahi pinaraca, pipachihairapa. Piyanayareva me Viya. Picamavahuyarepahi eta pihapulupayachirayare taicha eta macanarasiravihi — máichapa ema Jesús.

Éma Jesús macanaraca ema mamusura ema capitán romano
(Lc 7.1-10)

⁵ Tacahe, ema Jesús títecapapa tayehe eta Capernaúm. Matiarihahi ema achane apavasana. Comandantehi éma nayehe ena suntaruana romanoana. Capitán eta mávacure. Tiyanapa mapauchapa ema Jesús.

⁶ Mayaserecapa, ánipa máicha:

—Tata, mararihi puiti te nupena ema amaperu numusura ticajumahi eta áire. Tétavicavahi tacativa masama. Pájapanupaini, picanarasinanupaini éma — máichapa.

⁷ Éma Jesús, majicapapa:

—Tiuri, nuyanayare nuncanarapanayare — máichapa.

⁸ Tásiha, ema capitán majicapapa:

—Tata, vahi picucaañamacava eta pítesiraina eta nuyehe, taicha vahi táuricahini pisiapahini te nupenasami. Németeaca taratarichu picavanairipi eta picanarasiraya ema numusura.

⁹ Taicha núti nusuapahi te tivanecanuana ena anuquehepananahi eta nuyehe. Nútiripa nusuapacarehivare nayehe ena nusuntaruranahi. Te nuvanecavaca, téhevare níchuhavacapuca, tisuapanuanahi. Te

nuvanecapuca ema nuvaneru, enurujipa tisuapanuvane —máichapa.

¹⁰ Te masamapa ema Jesús eta juca, ichape-rinehi márami eta yátupirahi macasiñavairahi eta mayehe. Máichavacapa ena téhicanapahi:

—Nutupiruva numetacahe: Nájina nímaha émanaina vijaneana israelíta mácutihini ema maca achane apavasana eta macasiñavairahi eta nuyehe.

¹¹ Numetacahe puiti: Járापainapa eta sache, náitecapiraya ena camuriqueneana achaneana apavasana tiásihanayare te tamutu avasareana te juca apaquehe. Tisiapanayare eta mávasa ema Tata, te mávihahi ema viáchucaini Abraham, ema Isaac, émapa ema Jacob. Tétavicavainapa eta náurisamurevaya.

¹² Tacahe, tamapuruji eta náimatiequenehairahi ena vijaneanana israelítana eta máechajiriruva ema Tata, váhisera nácasiñavahini eta nuyehe. Eta tiviuchavacayarehi tayehe eta nacaicuñaiyaya eta te tamapicuquene te távihahi eta tájirequenehi yucu. Ticapitiquiahechavanainapa eta tacativayare nasama. Tíyahanainapa —máichapa.

¹³ Tásiha, ema Jesús máichapa ema capitán:

—Piyana pichava te pipena. Tinaracaripa ema pimusura, taicha eta picasiñavairahi eta nuyehe —máichapa.

Tacahe, ema amaperu ticajumahi tinaracaripahi te jena hora eta náechajirisiravahi éna.

*Emá Jesús macanaraca esu máimase emá Pedro
(Mr 1.29-31; Lc 4.38-39)*

¹⁴ Ema Jesús tiyanavarepa te mapena ema Pedro. Máimahapa esu máimase ema Pedro, tica-jumahi eta muraca fiebre. Mapauchapa tayehe eta suívesihahi.

¹⁵ Máemamahacapa, enevanepa táetaviacahi eta fiebre. Tinaracapa. Enurujiapa téchepuca. Tásiha, tépanavapa ésu eta suítátirahi ema Jesús.

*Camuriana ena macanararuanapahi ema Jesús
(Mr 1.32-34; Lc 4.40-41)*

¹⁶ Te yátipa, títecaparácánapaichucha ena achaneana. Námavacapaipa ena nacajumaqueneana, énapa ena návaháruana ena éreanana. Tacarichu te máechajiriruvachucha ema Jesús, macuchuchujicavacapaipa ena éreanana tiávahácanahi ena nacajumaqueneanahi. Macanaracavacapa ena apamuriana tisamanahi eta apana jumareana.

¹⁷ Eta juca títauchavapahi eta táechajisihairahi eta májurehi ema víyahaini profeta Isaías, ani tacahehi: “Masaminahavihivare eta vijumana eta macanarasirahavihi”.

*Tituparacahavi vahi véñamavaimahi eta
víjarasiravahi véhica ema Jesús
(Lc 9.57-62)*

¹⁸ Te máimahapa ema Jesús ena camuriqueneana achaneana nachayacahi, macavanairipipa ena máimitureana natsecava eta nánuesirayarehi te apachara cáquiure.

¹⁹ Tacahe, ema émana escribáno témeñahavapa mayehe ema Jesús. Máichapa:

—Tata máestro, núti apana nuvaraha néhicavi te jácani pivarahaqueneyare piámianu —máichapa.

20 Ema Jesús, ánipa tacahehi eta majicapirahi:

—Tamutu eta sárareana ticapenavaca. Énerichuvare eta cáyureana tamacajipachuvare. Nútisera nuti Manerejirunuhi ema Viya, tájina nuviya nusiapihahini —máichapa.

21 Te apanavarepa sache, ema émana máimiture máichavarepa:

—Tata, nuyaseacavi písapanuhini nuchava te nupena. Nucuchapanumayarehini eta máepeniraya ema ticachichanu, nécaranumaya. Tásiha, nucapayacavipa néhicaviya —macahepa.

22 Ema Jesús majicapapa:

—Péhicanuchucha. Pésamirica náecaracacaichaha ena máecharaireana. Tájina tájaracavimahi eta juca tihapasamurerecavihi —máichapa.

Ema Jesús macaesamirica eta táepacusirahi eta une étapa eta técativava

(Mr 4.35-41; Lc 8.22-25)

23 Te títapiricapa ema Jesús, tiávacuhapa te pacure. Énapa ena máimitureana, náhicapaipa éma.

24 Te itupierecanapa, járajapapa eta muraca técativava. Ichapevaca eta táepacuruhana. Tisiapaipahi eta une tayehe eta pacure. Ema Jesús, tímacapaichucha éma.

25 Tacahe, ena máimitureana tipiararecanapa eta napisirahi. Nacajamicapa éma. Ánipa náicha:

—Tata maestro, picatiuchahavi. Véricainapa —náichapa.

26 Ema majicapavacapa:

—¿Tájaha tacayema epica? ¿Vahi ácasañavapahini eta nutiarihirapahi eta eyehe? —macahepa.

Tásiha, téchepucapa. Macamatinacapa eta técaticava étapa eta une. Enevanepa tésamiricavahi eta táepacusirahi. Tájinapa táichiravainahini.

²⁷ Ena máimitureana ichaperinehi nárami. Ánipa nacahe:

—¡Tétavicavahi eta máitupajijiasiravahi! ¡Jéhesare, yátupiquene eta émairahi machichahi ema Viya! ¡Taicha tamutu tasuapahi, macamatinacahi eta técaticava étapa eta une eta táepacusirahi! —nacahepa.

Ena apinana ajairana návaháruana ena ichape-muriqueneana éreanana

(Mr 5.1-20; Lc 8.26-39)

²⁸ Te títecapapa ema Jesús te apachara eta cáquiure te apaquehe Gadara, tiúchujicanapa te ecari ena apinana ajairana, návaháruanahi ena éreanana. Tétavicava eta náñnehivavacahi. Náehayarehi nácani tiánucuhanapahi. Tacahe, napauchapa ema Jesús.

²⁹ Tipiararecanapa, ánipa nacahe:

—¿Tájaha picha píteca pipauchahavi piti Jesús, Machichaquenevihi ema Viya? ¿Pivarahapa picaetemajiricahaviyare víti? ¡Pájapanuhavi, vuíchaha picuvanecahavi tayehe eta vícaicuñaiyayare! —nacahepa.

³⁰ Tásiha, tatiarihihivare nacachacayahi eta camuriqueneana cúchiana tinihicanahi.

³¹ Ena éreanana nayaseacapa ema Jesús. Ánipa náicha:

—Te piáquijicahaviyarepuca, picatajicahavi. Písapahavi visiapahacavaca eta jena cúchiana — náichapa.

³² Tacahe, ema Jesús máisapapa:

—Tiuri, eyana esiapahacavaca —máichapa.

Tacahe, tiúchucanapa ena éreanana nayehe ena návaháruanainihi. Tiáramemurihanainehi eta cúchiana. Tijunaparacanapa témiririjicanapa te tachaui eta cáquiure. Téririjicanapa.

³³ Ena tijanearecanainihi eta cúchiana tiyananapa tijunana tayehe eta avasare. Timetajiricanapa eta náimairahi, étapa eta nanarasirahi ena návaháruanahi ena éreanana.

³⁴ Tacahe, tiyananapa ena achaneana te mávihahi ema Jesús, náimahapanahi. Te náimahapa éma, nayaseacapa vahi macuíticapahini te návasa, machavahini te másinehi.

9

Ema Jesús macanaraca ema émana achane macajumaquene eta muracaquiha

(Mr 2.1-12; Lc 5.17-26)

¹ Tacahe, ema Jesús tichavapa tiávacuhavarepa te pacure. Tichavapa tayehe te mávasahi Capernaüm.

² Ánaqui náimipauchavarepa ema achane macajumaquene eta muracaquiha. Ema tívecahi te mayehe camilla. Te máimahapa ema Jesús eta nacasiñavairahi eta mayehe, máechajicapa ema macajumaquene. Ánipa máicha:

—¡Pétumechava, nuchicha! Nucaepahainavipa eta pipecaturanaini —máichapa.

³ Natiarihi ena escribánoana. Eta nasamirahi ema Jesús, ánipa nacahe te nasamure: “Ema maca tépiyacava tímijachavahi Viya eta macaepahairahiji eta pecatuana. ¡Tétavicava eta matapirava!”

⁴ Émasera ema Jesús máimatihí eta napaner-ruanahi. Máichavacapa:

—¿Tájaha tacayema eta éjecapirava nuyehe te epanereruanahi? Núti tájina nutapiravaina eta níchirahi eta juca.

⁵ Núti, eta nucaepahairahi eta mapecaturana ema maca, tacutihí eta máejererahi eta nucanarairahi eta máquehe.

⁶ Tiúrisera puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatuana te juca apaquehe. Ímararacanu —tacahe, máichapa ema macajumaquene—. Puiti, nuchicha, nuvanecavi péchepuca. Piveha eta jara piyereruva. Piyana te pipena —máichapa.

⁷ Enevanerinehi téchepuca ema macajumaquenéni. Tiyanapa te mapena.

⁸ Ichaperinehi eta náramirahi namutu ena achaneana natiarihiqueneanahi. Tétavicavarinehi eta nacunachirahi ema Viya taicha eta máitupajijiasirava ema Jesús eta máijarasirahi ema Maiya.

Ema Jesús máichuha ema achane ticaijare Mateo, mayehyare apóstole

(Mr 2.13-17; Lc 5.27-32)

⁹ Te apanapa sache, nuti Mateo néjacahi eta te nucobraresirare eta impuesto. Tacahe, tiánucuhapaipa ema Jesús. Te tímahanupa, tíchuhanupa.

—Yare, péhicanu —máichanupa.

Enevanepa, néchepucahi. Néhicapa éma.

¹⁰ Tacahe, námapa éma te nupena, énapa ena máimitureana. Níchuhavacapa ena nuchamuriana ticobrarecarahianahi eta impuesto énapa ena apamuriana tisipecaturana. Nénicavacayarehi éna. Macachanemurihivare ema Jesús eta vinisirahi.

¹¹ Títecapanavarepa ena fariséoana. Eta náimairahi namutu ena némunarqueneana, eta vicachanerahi ema Jesús, ticaecahirecanapa. Ánipa nacahe nayehe ena máimitureana ema Jesús:

—¿Tájaha tacayema tísapava ema eyehe maestro macachanevaca eta manisirahi ena nánitatajiana ticobrarecarahiana eta impuesto? ¡Ticapecaturarahiana éna! —nacahepa.

¹² Te masamairiricapa ema Jesús eta náechajiriruvana, máichavacapa:

—Ena majumareanahi vahi nácamunuimahi ema médico. Nacarichu ena ticajumanahi nacamunuyarehi ema médico.

¹³ Nútiripa vahi étaina tímitecanuhi nutanucayarehi nácani matapiravareanahi. Nutanucapahi núti ena tisipecaturana, apaesa náeneuchava, náinajica eta napecaturana. Tásiha éti, eyana ecaravahu eta máechajiriruvanahi ema Viya. Ánipa macahe: “Núti nuvaraha yátupinaini eta eJapanuraivainahini. Taicha te vahi, tamapurujiyare eta ecamavahuirahi eta nuyehe” macahepa ema Viya.

*Nayaserecapa ema Jesús tayehe eta ayuna
(Mr 2.18-22; Lc 5.33-39)*

14 Títécapanapa ena máimitureana ema Juan Tícachasiricarahi, nayaserecapa ema Jesús tayehe eta ayuna. Ánipa naicha:

—¿Tájaha tacayema vahi nahayunacha ena pímitureana, vahi nácutihavihini viti máimitureana ema Juan, énapa ena fariséoana?

15 Ema Jesús majicapavacapa:

—Nímicutichinahe puiti. Vahi táuricaimahi ticatisamurevana nácani ticaichuhacasianahi tinicanahi nayehe ena araimana. Tiúrisa-mureanayarehi taicha matiarihini ema arayena. Téhesera te tépenapuca éma, jéhesare ticatisamurevanayarehi. Tacutiquene, vuíchaha táuricaimahi eta ayunanainahini ena nímitureana. Járjapainapasera eta sácheyare, ticaverejicasianayare taicha ticaratacanuanainapa ena ticapacanuanaya núti.

16-17 Esamanuchaha. Eta juca eta nímiturapiana, amairiha arairu. Mavaraha ema Viya arairuyare eta eyeherepianayare eti achaneana. Vahi ticuticacaimahi eta nayeherepiana ena achaneana. Eta ítusira éti eta nímiturapiana, tavaraha ínajica eta ichasi eyeherepiana tauriqueneanahi — máichavacapa ema Jesús.

Ema Jesús macanaraca esu machicha ema Jairo, ésupa esu apana esena sucajumaquenehivare (Mr 5.21-43; Lc 8.40-56)

18 Téchajiricavaichahahi ema Jesús nayehe ena achaneana, títécapanechavare ema émana achane ticaijare Jairo. Tuparairucahi éma. Matupirupa tépuyucapa te mamirahu ema Jesús. Ánipa macahe:

—Tátachicha, surarihi esu nuchicha. Puítirichaha tépenahi. Téhesera te piyana, pinacaini eta pivahu, suchavahini suítarecahini —máichapa.

¹⁹ Tásiha masuapapa ema Jesús. Tiyanapa te mapena ema Jairo, vimutupaichu viti máimitureana.

²⁰ Tásiha, sutiarihivare esu ésuna esena sucaju-maquene. Doce añoripahi eta sucatajivairahi, táichirahi eta suítine. Témeñahavapa te maquecu ema Jesús. Suémamacapa eta tacheyarapi tamatsianahi eta mamuiraha.

²¹ Taicha te supanereru ésu, sucahehi: “Taratarichu jácani te némamaca eta ñimuiraha, éta ticanaracanuyare” sucahepa.

²² Émasera ema Jesús masamarichucha eta suémamajiasirahi, macaicutiarahi eta macanararesirahi. Téquerucavapa. Máimahapa eta supisirahi esu esena. Tásiha, máichapa:

—Vaipa picupica, nuchicha. Pinaracapa puiti táichavenehi eta picasiñairanuhi —máichapa.

Tacahe, tinaracapa esu esena. Vaipa tápechahini eta sujumainihi.

²³ Tiyanavarepa ema Jesús. Títecapapa tayehe eta mapena ema Jairo. Máimahainehi ena músicoana. Tiúrianaipahi eta námirayarehi te ecari esu suépenaquene. Énapa ena achaneana, tijajamurianaripahi eta náiyairahi.

²⁴ Tásiha, ema Jesús máichavacapa:

—Íuchucachaha te aneca. Váhinéni suépenahini esu suca amaperu. Tímacarichucha ésu —máichavacapa.

Énaserá nacaecahirichucha éma, técavanapa.

25 Te tiúchucanapa ena achaneana, tisiapapa ema Jesús te suávihahi esu suépenaquene. Macarata-vauchapa ésu. Macaechepucapa. Tichavapa títarecahi ésu.

26 Te nasamairiricapa ena ticavasanahi eta te Capernaum, náraminehi namutu. Nacatsatsaicapa timetajiricanapa.

Ena Jesús macanaraca ena apinana púchuquiana

27 Tiuri, tichavayarepa ema Jesús te mapena. Eta mapaisirahi te calle, náhecapaipa ena apinana púchuquiana. Tipiaracanapaipahi te máequene.

—¡Tátachicha Jesús, pájapanuhavi picanaracahavi. Vicasiñavi piti yátupiquenévihi Cristo! —náichapa.

28 Váhisera masuapavanehini éma. Te tisiapapa ema Jesús te mapena, ena púchuquiana tisiapanavarepa. Témeñahavanapa eta mayehe. Tásiha, éma mayaserecavacapa. Ánipa máichavaca:

—¿Yátupipuca ecasiñanuhi eta nuncanarasirahayare? —macahepa.

Ena najicapapa:

—Yátupi, tata.

29 Tacahe, ema Jesús máemamacapa eta náuquihana. Tásiha, máichavacapa:

—Tiúri, eta ecasiñairanuhi, enaracayare — máichavacapa.

30 Jéhesare, enevanepa tinaracanahi. Tímairiricanapa. Tásiha, muracapa eta matuparasira vahi nacumetajirica eta macanarasiravacahi éma.

31 Váhisera nácahehini éna. Étarichuhi te tiúchucanapa, timetajiricanapa eta macanarasiravacahi. Tásiha, náechapa namutu te

tachacayarahanahi eta avasare eta juca máichaquenehi ema Jesús.

Ema Jesús macanaraca ema achane upa, macaechajicahi

³² Te viúchucavarepa, nacahepaipavare ena achaneana. Námapahi ema achane. Úpahi éma, taicha mávaháruhi ema éreana.

³³ Tacahe, ema Jesús máquijicapa ema éreana, ema tiávahácainihi. Tásiha, ema achane tinarcapa. Téchajicapa. Ichaperinehivare eta náramirahi ena achaneana eta náimairahi. Ánipa nacahe:

—¡Tétavicava eta máitupajijiasirava ema Jesús! Te viávasa Israel, nájina tiratahaina tíchaina tácutihini eta juca vímahaquenehi —nacahepa.

³⁴ Nararihivare ena fariséoana. Ánipa nacahehi:

—Ema maca Jesús, vémeteaca majupahahi ema Satanás, ema náquenumurihi ena éreanana. Máijararuihí jácani eta máitupajijiasiravahi eta macuchusiravacahi éna —nacahepa.

Ema Jesús majapanuvaca ena achaneana

³⁵ Ema Jesús tamutuhi mapaica eta avasareana étapa eta ánichichaqueneana avasarechichana. Tímiturecapahi tayehe te jácani máitecapihapahi te náurujisirarevana. Ticametarairupahi eta máechajiriruva ema Viya eta náuchucuirayare ena ticasañanahi éma, machaneranayarehi éna. Ticanararecapahivare ena ticatajivanahi ticacatiruhanahi.

³⁶ Camuriana ena achaneana títanajirí-cavanahi. Taicha ticatajivanahi éna, nájina nácasiñahini. Nacutihi eta uvesa te nájina

tijaneacaina. Eta máimairavacahi ema Jesús, ichape eta majapanuiravacahi.

³⁷ Tacahe, ema Jesús máichahavipa viti máimitureana:

—Tétavicavapa eta vicamunuirava ena tímicatacahavianaya tayehe eta juca vématanerepihi.

³⁸ Eyaseacayaresera ema Tata Vicaiyaquene, máijarahavi ena tímicatacahavianayare. Eta juca tímicutijiricavahi mácani achane eta macamunuiravahi ena tímicatacanaya te máechatijicaya eta maharusura —máichahavipa.

10

Ena dócequeneana apostóleana manerejiruanahi ema Jesús

(Mr 3.13-19; Lc 6.12-16)

¹ Tacahe, ema Jesús tíchuhahavipa viti dócequeneana, mayeheanayare apóstole. Tíjaracahavipa eta vítupajijiasiravayare viratahairayarehi vicuchucavaca ena éreanana, vicanarasirayareva ena nacajumaqueneana étapa eta nacatiruhavana.

²⁻⁴ Eta juca víjareana viti apóstoleana*: Ema tínapuca ema Simón Pedro, émapa ema maparapeichu Andrés, ema Jacobo ema maparapeichu Juan,

* **10:2-4** Ena nani apinana ajairana ema Jacobo émapa ema Juan, naparapecacahi, machichanaveanahi ema Zebedeo. Ema Mateo, eta máematanerepinihini, ticobrareca eta impuesto. Ema apana Jacobo, machichahi ema Alfeo. Ema Lebeo, mapapihi eta máijare. Ticaijarehivare Tadeo étapa eta Judas. (Te pivaraha pecha, pítanuca te Marcos 3.16-19 étapa te Lucas 6.14-16.) Ema apana Simón, tímaticarehi éma, nachamurinihi ena revolucionárioana ticaijareanahi “cananístana”. Navaraha náquijica ena extranjeriana romanoana.

ema Felipe, ema Bartolomé, ema Tomás, nútupa Mateo, ema apana Jacobo, ema Lebeo, ema apana Simón, émapa ema Júlasí Iscariote (ema tíjararecahi ema Jesús).

Emá Jesús mavanecavacapa ena dócequeneana apóstoleana napaicayare tamutu avasareana, ticametarairuanayarepahi
(Mr 6.7-13; Lc 9.1-6)

⁵ Tacahe, ema Jesús tévatacavipá viti dócequeneana apóstoleana vicametarairuyarehi. Ánipa máichahavi:

—Vahi ecuyana tayehe eta návasana ena apava-sajuecuana. Váhivare ecuyana nayehe ena samarítanoana.

⁶ Eyanayaresera tayehe eta avasareana návasanahi ena vijaneanana israelítana. Taicha éna nacutihi eta uvesana máquenureana.

⁷ Eyana ecametarairuyare nayehe. Emetacayare eta nútijapairainapa nuti Náquenuyare, nuti nucuchucuhavacayare éna, taicha mavanerunuhi nútí ema Viya.

⁸ Ecanaracavacayarepahi ena leprósoana énapa nácani ticatajivanahi taicha eta apana jumare. Ecaechepucayareva ena nápenaqueneana. Ecuchucayareva ena éreanana. Éti, vahi evachareruinahi eta juca ítupajijiasiravahi, váhivare ecobrachaimahi nácani ecanararuanayare.

⁹ Váhivare íámaimahi eta oro, eta plata, eta reale. Tacuija iama eta enirurucuha te alforja.

¹⁰ Étanarichuvare emuiriha, éta íamayare. Étapa eta éparupeva, étaripa eta eyupairiquiana. Ema

ticaematanerahi, tatuparacahi náenicayarepahi te jácani macaemataneiyapahi. Ene ecaheya éti, títátiheanayare ena tijacapanaya eta ecametarairuirayarepahi.

¹¹ Te ítecapaucha jácani avasare, etanucayare ema achane tiuri, témunarahi. Enasiyare mayehe. Tiámainucava te táitecapa eta iúchusirayareva tayehe eta avasare, epaenumavaya ejunijica eta ítecapihahi.

¹² Te esiapayarepa tayehe eta peti, eyaseacayare ema Viya eta náuricacarevaina ena achaneana ticapenana eta peti.

¹³ Te tiúrianahi ena achaneana ticapenanahi eta peti, ímiyanava eyaseuchayare eta náuricacarevaina. Téhesera te vahi nacuri, váhi eyaseuchaimahi.

¹⁴ Étaripa te váhipuca nacujacapahe te jácani avasare, éta te jácani peti ítecapihayare, váhivare nacubaraha nacusamahe, iúchucavaneyareva. Étatapevachavanúmayareséra eta máteji te ívapeana. Táicutiarayare eta máicuñasirayare ema Viya taicha eta namavarairahi najacapahehini.

¹⁵ Nutupiruva numetacahe, te táitecapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinarajiqueneana ticavasanaini te Sodoma éta te Gomorra.

*Nacatianacainapa ena téhicanapahi ema Jesús
(Lc 12.2-7)*

¹⁶ Esamanuchaha. Núti nuvanecahehi éti eyana epaica. Nararihisera ena achaneana váinarajiqueneanahi étupiaruanayare. Éna nacutihi eta sárare

táíñehiqueneánahi. Étisera ecutiyare eta uvesa eta tamansuvahi. Ítucayare eta ecaichepaisirayare eta navainarajivana. Váhisera ecujicapauchava te návarahapuca náehahe.

¹⁷ Échapava, taicha nararihiyare ena achaneana ticatianacaheanayare táichavenehi eta éhisiranuhi. Ticaratacaheanainapa, écayaserehinapa nayehe ena juéseana. Téstacaheanainavarepa eta te náurujisirarevana.

¹⁸ Tásiha, etiarhiyare éti tíamaheanaya te nami- rahu ena aquenucana, téhevere te namirahu ena Presidenteana gobiernonahi, ecaviurevayare táichavenehi eta éhisiranuhi. Esapihasera éti, ecamapuravainapa échajisianuyare te namirahu éna, apaesa náimatiyare namutu ena achaneana te avasareana eta nímiturapiana.

¹⁹ Tacahe, te jácani námahepauca te nami- rahu ena aquenucana, vahi ecueñamava tayehe eta jácani échajiuchiravayare, ecatiuchiravayare. Échajicayare eta échajiriruvana máijararuheyare ema Espíritu Santo te jena sache.

²⁰ Taicha máimahaheinepa, tímitucaheyare eta échajisiraya. Vahi étijivaimahi eta échajisiraya.

²¹ Natiarihiyareva nácani achaneana tíjararecanaya ena naparapequeneana, navarairahi náimicapaca táichavenénahi eta náehisiranuhi núti. Natiarihiyareva ena nácani náiyana, navarahayareva náijarareca ena nachichanaveana táichavenehi eta náehisiranuhi núti. Natiarihiyareva nácani nachichanaveana nacanarainapa ena náiyana, náimicapacainapa táichavenehi eta náehisiranuhi núti.

²² Namutuyaréni ena achaneana ticatianacaheanayare táichavenénahi eta éhisiranuhi núti. Téhesera ecamichahi tamutu, ímiyanavahi eta éhisiranuhi te táitavapa tamutu, nucuchucuhaheyare núti.

²³ Te napanajicahepuca te jácani avasare iávihahi, táichavenehi eta ecametarairuirahi, ejunayare tayehe eta apana avasare. Jéhesare, nuti Manerejirunuhi ema Viya, nútijapavanénapa. Vuíchaha ecuitahi epaica eta avasareana ne vijaneanana israelítana.

²⁴ Éti nímitureana, ticatianacaheanaya ena achaneana. Vahi epicauchacarémahi nayehe, táichavenehi éhisiranuhi núti. Ticatianacaheyaresera tacuti eta nacatianasiranuhi núti.

²⁵ Tíjarchaheanayare váinarajihe, máurishihepuca, tacuti eta náumehairanuhi núti. Étiserá, evapinavaya eta ecutiranuyare eta nacatianasiranuhi nuti iáquenu, núti eyehenuhi maestro.

²⁶ Váhisera ecupicavaca ena ticatianacaheana. Ema Viya tímararacaheya. Ticunachaheya eta ecamichirahi, evehainapa eta ícuchihi.

²⁷ Tásiha, étumechava eta ecametarairuiraya tamutu eta nímiturapiana te tamutu avasareana. Jácani néchajirivanahi te timapicu, éti ecuchujicayarehi te tijarahi, emicauchiravacaya ena achaneana. Étaripa eta nujajairuhehi te vicarichuhi, epiaracainapa te calle.

²⁸ Vahi ecupica nácani nacapacapuca eta iáquehe, tacarichuchucha náituruequenehayare. Váhisera naratahaimahi nacamitiequeneha eta iáchaneva. Macarichu ema Viya epicayare, taicha

éma máituruequenehahi tamutu. Maratahahi macamitiequeneha eta iáchanevana tayehe eta táíñehiquene infierno, te ecainajiruva táichavenehi eta episirapuca eta nacapasiraheyare.

²⁹ Nímicutichinahe eta cáyurechicha. Éti ímijachapupuca vahi tasivachahini éta. Téñamacareana-hisera me Viya. Éma, téchavacahi eta táitairesirahi, étapa eta táepenirahi.

³⁰ Evetijipa éti, éñamacarepanahi me Viya. Éma, tímatisa eta tatupa eta echutimacana. Téchahe-hiyare éma tamutu eta ítaresirana.

³¹ Eta tacahe, vahi ecueñamavahi éti tayehe eta ítaresirana, taicha tétavicavahi eta emunavahi mayehe.

*Vímereuchavayare eta véhisira ema Jesús
(Lc 12.8-9)*

³² Tímiyanava ema Jesús tímitucahavi. Ánivare macahe:

—Namutu ena tímereuchavanahi eta náehisiranuhi te namirahu ena achaneana, núti apanavare nímereuchavaya eta nuchanerairavacahi éna mayehe ema Tata Nucaiyaquene, ema tiávihahi te anuma.

³³ Nácanisera vahi návarahahini tímereuchavanahi eta náehisiranuhi, núti apanava nímereuchaya eta vahi nuchaneranainahini éna, te mamirahu ema Tata Nucaiyaquene.

*Ena achaneana náepuruvacainapa nácani
téhicanayare ema Jesús
(Lc 12.51-53; 14.26-27)*

³⁴ Éti ímijachaipupuca eta nítésirahi te juca apaquehe, tájina tácyemacarémahi,

tiúricacareyarehi nícha. Váhisera ene tacahe. Níchaveneya núti, ena achaneana tépuruheanaya térajicavanaya eyehe. Eta tacahe, nuvaraha échapirica yátupina eta juca éhisiranuhi.

³⁵ Taicha puiti juca vicaijuheyare, mácani achane, te natiarihi ena machichanaveana, nacatichayarehi ema naiya táichaveneyarehi eta máehisiranuhi éma. Ésuripa esu naena, nacatianacayareva. Ésupa esu chinenaca, sucatianacayareva esu suímase taicha eta suéhisiranuhivare esu apana.

³⁶ Ene nacaheya, nararihiyare ena tachichanaveana eta peti ticatianacana ena náiyana te peti níchavenehi núti.

³⁷ Nácansera tínajicavana eta náehisiranuhi táichavenehi eta nacatianasira ena nachichanaveana, váipa tatuparacahini nuchaneranainahini. Énaripa nácani tínajicavana eta náehisiranuhi táichavenehi eta nacatianasira ena náiyana, énerichuvare vaipa tatuparacahini nuchaneranainahini.

³⁸ Énerichuvare nácani apaesarichu eta navairahi téhicanuanahi, váhivare náijaracavahini táimicapacahini eta náehisiranuhi, vaipa tátuparacahini nuchaneranainahini.

³⁹ Taicha nácani téñamavanahi eta náitaresira, tiávamirahuana eta náehisiranuhi, énajivayare ticamitiequenehanaya. Énasesa nácani yátupi tíjararecavanahi téhicanuana, táimicaparuanaya-repuca eta náehisiranuhi, éna tiúchucuhanayare eta náitaresirayare.

*Jararihi eta vícuchihi te anuma**(Mr 9.41)*

⁴⁰ Ema Viya máitsivachayare nácani tiúriana ena najacapiraheyare nasamahe éti. Taicha eta najacapirahehi, ticaecheranahi eta najacapiranuhivare núti; énerichuvare najacapahivare ema Tata Nucaiquene.

⁴¹ Énerichuvare nácani tijacapanahi ema profeta nuvaneruhi, énapa ena achaneana tiuri eta náehisiranuhi, máitsivachayare ema Tata, máijarasiravacayare eta náicuchi.

⁴² Énaripa ena témunarahianahi nayehe ena nani ánichichaqueneana téhicanuanahi, nacumpiracha eta une táichavene eta náehisiranuhi; énerichuvare jararihi eta náicuchi quene —máichahavipa ema Jesús.

11*Ema Juan Tícachasiricarahi mavanecavacapa ena máimitureana**(Lc 7.18-35)*

¹ Te tamutupa eta máimitusirahavihi ema Jesús viti dócequeneana mayeheana apóstole, tiyanavarepa eta te avasareana tayehe eta Galilea. Taicha mavarahahi máimitucayare ena achaneana eta máechajiriruvana ema Viya.

² Tiuri puiti, ema Juan Tícachasiricarahi, mávinehi te cárcel. Ánaqui masamairiricapa eta máichaqueneanahi ema Jesús. Tacahe, máevatacapa ena apinana máimitureana, nayaserepanayarehi ema Jesús.

³ Te náitecapauchapa, náichapa:

—Ema viáquenu Juan tivanecahavihi viyaserepanaviyare te yátupihipuca pítiripahipuca Cristo ema vicuchapaquenehi, ¿téheserapuca vímiyanavayarepuca vicuchapa? —náichapa.

⁴⁻⁵ Ema Jesús majicapavacapa:

—Nuvaraha ímararacaya eta níchaqueneana puiti. Nucaimairiricavacaipa ena púchuquiána. Nímipaisiraipa ena masariana. Nucanaracavacaipa ena leprósoana, énapa ena túhuquiñana. Nucaechepusiravacaipavare ena náepenaqueaneanaini. Énerichuvare níchuhahi ena páureana náeneuchavaya apaesa náuchucuha. Tásiha, eyana emetaca ema Juan tamutu.

⁶ Vaipa macueñamava ema Juan eta nuyehe. Tétavicavahi eta máuricacarevahi éma, te ticasiñavahi eta nuyehe —máichavacapa.

⁷ Tacahe, tichavanapa ena vanairucanahi me Juan. Tásiha, tépanavavarepa téchajica ema Jesús, máechajisihapa ema Juan. Ánipa macahe eta mametasiravacahi ena achaneana:

—Nuvaraha epanereuchayare ema Juan. Te jácani vuíchaha nacaratacahini éma, te eyanapa te mávapahi apaquehe te mávihahi, ¿tájaha eta epanereruana tayehe eta macametarairuirahi? Éti ímijachaipapuca mamapachichijiriruvaichucha eta máechajisirahi tacutihi te vímararaca ta taflurena eta acutena te tacayamuririjica eta técatícava.

⁸ Ímijachaipavarepuca tavayuaruhi éma tiúrinanácavayarehi eta macamuirihairahi. Écharichuhi éti mácani tiúrinanacavahi, píncanillahi eta máitairesira, váiparinehi tiúchucaimahi te sache,

váhivare tiyanaimahi te mávapahiana apaquehe. Manasiqueneyarehi te jácani tiúrina peti.

⁹ Nuyaserecahe: ¿Tájaha eta ímijachirahi eta mayehe? ¿Ímatihipuca eta profetairahi éma? Núti numetacahe: Matupiruvahi eta macametarairuirahi ema Juan. Mavaneruhi ema Viya eta yátupiquenehi profetahi éma. Nájina mácutihini ena apamuriana profetana.

¹⁰ Ema maca Juan émara máechajisihaquenehi ema Viya eta te Sagrada Escritura, ánipa macahehi: “Nuvanecayare ema títapumirau-chaviyarepahi ema ticametarairuyarepahi, apaesa natsecavapaipa ena achaneana eta najacapiraviyare” tacahepa eta Sagrada Escritura.

¹¹ Núti nutupiruva numetacahe: Ema maca Juan, nájina mácuti nayehe ena achaneana. Tétavicavahi eta macunachacarevahi. Tiápajupanavahisera eta nacunachacarevahi nácani nuchaneranaya, apaesachichapucaini eta nacaicutiarairahi eta mapanereruana ema Tata.

¹² Ema Juan tépanavapa eta máimitusirahi ena achaneana tacamunuirahi eta náeneuchirava me Viya. Nararihiserá ena vahi náuricahini nasamararacahini. Étapa tímicatichahi témecatajívachahi éma. Puíticha tanasihi ticatichanuana núti apanava, témecatajivachanuayanayare.

¹³ Ema víyarahaini Moisés téchajisihanuhi eta te májurehi. Énaripa ena víyarahanaini profetana náechajisihahi eta nítésirayarehi nuti Manerejirunuhi ema Viya.

¹⁴ Puiti numetacahe: Ema Juan émaripahi ema profeta máiteruyarehi mavasiyarehi ema

víyarahaini Elías, eta máinapumirauchiranuyare.

¹⁵ Te evarahapuca ecaicutiara, tavaraha eta epanerechinavaya.

¹⁶⁻¹⁷ Etiarihihisera eti achaneana puiti juca sácheana, eta emasuapajiraivahi, nímicutichahesa ena amaperuana tiútseruanahi. Apapipijichucha eta nacayemaqueneanapahi. Ema apana macahepupuca: “Vépiyacaya eta piéstachicha”. Énasera ena apamuriana vahi náisapavahini. Tásiha, ema apana macahepuca: “Vépiyacaya eta ecari”. Váhivaresera náisapavahini.

¹⁸ Ema Juan, te tímerecavapa, muraca eta máimiturapianahi. Eta manicasareana, vahi tácutihini eta nanicasareana ena achaneana. Nararihisera te emuri ena tépiyaequenehanahi éma. Náimijachahi mávaháruhi ema éreana.

¹⁹ Nuti Manerejirunuhi ema Viya, eta nítecapauchirahepa, nucachanehepaipa eti achaneana eta enisirahi. Etiarihihivare eti épiyaequenehanuhi: “Ímaha ema maca, cánisiuquitataji, cávahárasí. Macachanevacapaipa ena achaneana tisipecaturarahianahi” ecahehi. Eti épiyacavapa épururahi, ticutirinehi yátupinahini échemarahihini. Tétavicavahisera eta éjecapiravahi taicha eta emasuapajiraivahi. Te yátupihihini échemarahi, ímatinuhini eta nucavanahirahi eta me Tata –máichapa ema Jesús.

Eta táicuñayare eta návasana ena achaneana masuapajirairahana

(Lc 10.13-15)

²⁰ Ema Jesús tépanavapa máechajisiha eta táicuñayarehi eta avasareana máichinehi eta

tiáramicareana. Ticaicuñanayarehi ena tachichanaveanahi táichavenehi eta namasuapajiravahi. Váhivare náeneuchavahini, náinajicahipucaini eta napecaturana. Máechajicapa ena achaneana tímicutijiricavahi natiarihinahini te mamirahu. Ánipa macahe:

²¹ —¡Páurehesami eti nujaneanana ecavasanahi te avasare Corazín! ¡Páurehesamihivare eti apamuriana nujaneanana ecavasanahivare te avasare Betsaida! Ichape eta ícuñayare taicha éti ímaharipa tamutu eta tiáramicareana níchaqueneanahi te emirahu, váhisera ávarahahini éneuchavahíni. Ena nani achaneana ticavasanahi te Siria, apavasananahinéni, tétavicavahinéni eta namaurivahi, németeacaserá núti nasapihahipucaini téneuchavana te náimahahini eta níchaqueneanapahi. Enévanenahíni náimerecavahini yátupi eta náeneuchiravainahini.

²² Numetacahevanesera: Te jena sácheyare, muracapanayare eta ícuñayare éti, taicha eta emavarairahi éneuchavahini. Tacachuricayare eta nacaicuñairaya ena achaneana apavasanana ticavasanahi te Siria.

²³ Étiripa eti ecavasanahi te avasare Capernaum, tamapurujihí eta nímitusirahehi étapa eta ímairahi eta tiáramicareana níchaqueneana. Eti ecasiñavavaicahi, ímijachaipapuca eta ticayapaheyare te anuma. Ichapesera eta etsirihacarevayare, taicha épujuquichavayare eta te yucu taicha vahi éneuchavaimahi éti. Taicha te nímerecahíni eta tiáramicareana tayehe eta avasaréni váinarajiquenehi Sodoma, tácutihini eta ímairahi éti, ichapehipucaini eta

náneuchiravainahini, váipapuca macuicuñacahini
ema Viya.

²⁴ Numetacahevanesera: Ichape eta ícuñayare
te táitecapapa eta juíciyare. Tacachuricayare eta
náicuñayare ena ticavasanaini te avasare Sodoma
—macahepa ema Jesús.

*Emá Jesús tiúrisamuréinehi mayehe ema Maiya
(Lc 10.21-22)*

²⁵ Étarichuhi te jena hórahi, ema Jesús ánipa mac-
ahe:

—Tata Nucaiyaquene, tétavicava eta nucuna-
chiravi. Jéhevere píti táquenuvihi eta anuma étapa
te juca apaquehe. Títauchavaipa eta pipanereruhi.
Vahi písapahini náitucahini eta júcana ena tímijacha-
vanahi téchemarahiana. Énapasera píjaracahi ena
nani téhicanuanahi, tájinahinéni náechemaraivai-
nahini. Puiti nasapiharipahi nacachuricahi ena
títupajjiacavanahi.

²⁶ Tétavicavahi eta táurivahi eta pipanereruhi
píti, Tata Nucaiyaquene.

*Emá Jesús máichuhavaca ena navitajiruana,
mavaraha macanaracavaca*

²⁷ Tacahe, ema Jesús máichavacapa ena
achaneana:

—Ema Tata Nucaiyaquene, ema tíjaracanuhi eta
nútiraya néchaya tamutu. Nájina énajivainahini
náimatihini ema Tata. Nucarichu núti néchinavahi
ena níminatiruanayare éma. Taicha núti yátupihi
eta nímatirahi ema Tata Nucaiyaquene; tacuti-
quenehi eta yátupirahivare eta máimatiranuhi
éma.

²⁸ Yare, ecasiñanu emutu eti evitajiruanahi te iáchanevana eti éyarecarahiana eta éjecapiravana. Núti nucanaracaheyare.

²⁹ Ísapava nunacasicahē eta nuyehe yugo. Nuchachanehe apaesa ecaravahu nuyehe, taicha núti mánsunu, tétavicava eta núriva eta nusamure. Éti tétavicavaya eta iúricacarevaya te iáchanevana te ejacapa eta nímiturapiana.

³⁰ Taicha eta nuyehe yugo vahi tácajera. Tipevejiyare esama – máichavacapa ema Jesús.

12

Ena fariséoana náimipicauchahi eta nayeherepiana tayehe eta sávarumuhuana. Émasera ema Jesús máimereuchahi émarichu téchahi eta nayeherepiana ena achaneana eta sache nanarasirayare.

(Mr 2.23-28; Lc 6.1-5)

¹ Eta jena sávaru, ema Jesús tiyanapa tipaica. Tiámahavipa viti máimitureana. Témehicavanapa ena fariséoana. Vétavivijicapaipahi eta isanítiana. Tacahe, eta vipaisirapahi, vécuropaipa viti máimitureana. Tásiha, vivechuquihapaipahi étajavapahi eta trigo. Vivepiraquiropaipa, vépurajacachavapaipahi. Vinicapaipa, taicha tísapacareichucha.

² Énaserā ena fariséoana eta náimararasirapahi, tisemamajuheanapa. Ánipa naicha ema Jesús:

—Pímaha ena pímitureana. Ticaemataneanapaichucha eta navepiraquiropahi eta trigo puiti juca sache tétavicavahi eta tacapicahuirahi. Vahi tísapacaremahi eta juca nacaematanérahī puiti — náichapa.

³ Tásiha, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahi ema víyahaini David eta mapaisirapahi técuhaipa, énerichuva ena téhicanapahi.

⁴ Écharichuhi éti te masiapapa eta mapena ema Viya, tiyaseserecapa eta manicayarehi. Náijaracapa eta pan tacapicahuquenehi nanacasarehi te mamirahu ema Viya. Nanicasarehi ena tiyujaracarahiana, émasera ema David vahi tátuparahini manicahini. Étasera eta máecuavahi, manicapa eta pan, énapa ena macachanequeneanapahi.

⁵ Váhipuca échajicuha éti eta te Sagrada Escritura eta mavanairipi ema víyahaini Moisés eta nayehe ena tiyujaracarahiana téchapajiricanahi eta Templo. Éna, tájina natapiravainahini eta nacaematanerahi te sávarumuhuana.

⁶ Tavetijichapuca puiti nutiarhipahi núti. Ichápequenénupánahi tayehe eta Templo.

⁷ Éti váhivare ecaicutiara eta juca máechajiriruvana ema Viya: “Núti nuvaraha yátupinaini eta eJapanuraivainaini. Taicha te vahi, tamapuruyiare eta ecamavahuirahi eta nuyehe” macahepa. Te ecaicutiarahini, váhiyahini ecaehivaca ena nímitureana, taicha éna tájina natapiravainapahi.

⁸ Tiuri puiti, numetacaheyare: Núti Manerejirunuhi ema Viya, nútirichu néchahi eta sache nanarasiraya ena achaneana —máichapa.

*Éma Jesús macanaraca ema achane tépenavahu
(Mr 3.1-6; Lc 6.6-11)*

⁹ Te apanavarepa sávaru, tiyanavare ema Jesús tisiapahi tayehe eta náurujsirareva.

¹⁰ Ánaqui matiarihi ema achane vaipa tayamuricahini eta mavahu, tépenavahuipa. Natiarihihivare ena fariséoana, natanujiricahi eta ticaviurevayarehi ema Jesús. Nayaserecapa éma:

—¿Táuricapuca vicanaracavaca ena nacajumaqueneana te sávarumuhuana tacapichahuquenehi?
—náichapa.

¹¹ Ema Jesús majicapavacapa:

—Nímicutichinahe puiti. Németeaca májina émanaina achane vahi macujapanuhini eta máitatuquene uvesa, te téchipaicavapuca te pusu te jena sache tacapichahuquenehi. Eta máeñamirahi, tipatsicava mavecuha eta paure sárare.

¹² Núti numetacahe: Ema maca achane tiápajucavahi eta téñamacare tayehe eta uvesa. Tacahe, tísapacaréchucha víchayare eta táuriqueneana te sávarumuhuana —máichavacapa.

¹³ Tásiha, ema Jesús máichuhapa ema achane ticajumavahuhi:

—Nímaha. Picajaruvauchava, pímereca eta pivahu —máichapa.

Tacahe, ema achane eta macajaruvauchiravahi, enevanerinehi tinaraca eta mavahu. Tiúrivarepa tichava, tacutipa eta mavahu sapa.

¹⁴ Tisemanarinehi ena fariséoana eta náimairahi eta máichaquenehi ema Jesús. Tiyananapa. Tinacuchavanapa eta napanerechirahi eta nacapasirayarehi ema Jesús.

Ema Jesús tiyanavarepa tipaicahi

15 Tacahe, ema Jesús, te máechapa eta napanereruhi ena fariséoana, navarairahi nacapaca, tiyanavarepa tipaicahi. Náehicapa ena camuriqueneana achaneana. Énerichuvare, náitecapauchapaipa ena nacajumaqueneana. Macanaracavacapaipa namutu.

16 Mavanecapaipasera ena macanararua-napahi vahi nacumetajirica eta émairahi ticanaraca.

17 Eta juca títauchavapahi eta máechajiriruvahi ema Viya tayehe eta májurehi ema víyarahaini profetaini Isaías.

18 Ánipa tacahehi: “Nuvaraha ímatiya ema vanairucahi nuyehé, nunerejiruhi núti. Tétavicavahi eta némunasirahi, núrismurehivare máicha. Ímatiyare éma taicha mávaháruhi ema Espíritu Santo máijjararuhi éma. Ema nuvanara, tímitucavacayare ena achaneana te tamutu avasareana eta nuvanairipianahi.

19 Éma, tájina máitucaimahi téhacaca. Váhivare tipiararecaimahi, macunachiravahi te cálleana tayehe eta máichaqueneanahi.

20 Mánsohi éma taicha ticayehéhi paciencia. Macamichavacahi namutu. Váhivare macajachaimahi nácani vahi túmeanaina. Tiámainucava te máéjacapa tayehe eta mávacureyare, muracainapa eta mávacureyare.

21 Tásihasesa, namutu ena achaneana te avasareana ticunevanayare eta mayehé, navarairayare máurichayare éma” macahepa ema Viya.

Ena fariséoana téjcapavanahi eta náimijachirahi

*ema Jesús mávaháruhi ema Váinaraji Satanás
(Mr 3.19-30; Lc 11.14-23; 12.10)*

²² Tacahe, ena achaneana námapaipa ema achane púchuqui, úpavare, taicha mávaháruhi ema éreana. Navarahahi macanaraca ema Jesús. Jéhesarehisera ema Jesús macanaracahi. Tiúripa téchejica, tímairiricavarepa.

²³ Ichaperinehi nárami ena achaneana. Tásiha, ánipa nacahe:

—Ema maca Jesús, émapachupuca ema Cristo, ema vicuchapaquenehi mámariequene ema víarahaini David —nacahepa.

²⁴ Énaserá ena fariséoana napanerechahi náepiyaequenehayarehi. Ánipa nacahe:

—Ema maca Jesús, eta macuchusiravacahi ena éreanana, vémeteaca máijararuhi eta máitupajijiasiravahi mayehe ema Satanás, ema náquenumurihi ena éreanana —nacahepa.

²⁵ Ema Jesús máimatihí eta napanereruhi éna. Tacahe, máichavacapa:

—Nímicutichinahe puiti ena machanerana ema gobierno. Éna vahi típutsimurihacacanaímahi apinainahipucaini partido. Te típutsimuriacacanapa, énajicacaipapucaini tiáquipaicacana. Énaripa ena achaneana te avasare, vahi táurica náíputsimuriavahini. Émaripa mácani achane, te camurianahi ena machichanaveana, váiparinehivare típutsimuriavanaimahi náehajiricacahini, énajiricacahini náquipairicacahini.

²⁶ Ene macahehi ema Váinaraji Satanás, váiparinehi máisapahini típutsicacana ena

machamuriana, taicha mavarahahi tisimutuanayarehi éna, tímiyanavanayarehi eta nacaetemajirisirahaviyarehi.

27 Éti ímijachaipa nútirichu machamuri ema Satanás, táichavenehi eta nuratahairahi nucuchucavaca ena éreanana. Tájina vahi étupicavahini éti eta juca epanereruana. Te émahipuca tímicitacanuhi ema Satanás, énerichuhivare éti máimicataruanahivare jácani éma, eta ecuchusiravaca ena éreanana. Epanerechinávanuma.

28 Émaquenehisera ema Espíritu Santo, tíjarcanuhi eta juca nuratahairahi nucuchucavaca ena éreanana. Eta juca étara ícutiaraya éti eta matuparasiranuhi ema Viya eta nútirayare nécha tamutu. Nútiripara nuti ecuchapaquenehi.

29 Nájina tisiapaimahi eta námerecahini te jácani peti matiarihíhi ema túmequenehi. Tacamunuhi nacaratacanumayare, náitiacanumayarehi éma. Jéhesare, náituruyechasareyarepa eta máimahaqueneana. Ene nucahehi núti, túmepananuhi mayehe ema maca Satanás.

30 Te vahi éhicanu, ecaemataneasiranuya, machamurihehi éti ema ticatianacanuhi. Masapiha ímicatacahi éma eta macaetemajirisiranuhi.

31-32 Nutupiruva numetacahe: Eperdonachacareana eti achaneana eta epecaturana, tamutu jácani échajisihaira eta táíñemahiqueneana. Jácani te ecaecahinuhipuca nuti Manerejirunuhi ema Viya. Jararihisera eta epecatura vahi tiperdonachacaremahi. Éti ímijachahi ema Satanás ema tiávahácanuhi. Ichape eta éjecapiravahi, taicha ema tiávahácanuhi núti, émaquenehi ema Espíritu

Santo. Éti epanararacaripa éma. Tásiha, tájina eperdonachacareimahi puiti juca ítaresiraichaha, evetijpa te apana ítaresira —máichavacapa.

*Éma Jesús máimicuticha eta táhi eta yucuqui
(Lc 6.43-45)*

³³ Tímaticare eta yucuqui te tiúrinisihí eta tacahira. Tímaticarehivare eta apana yucuqui, máuriraha eta tacahira. ¡Epanerecha! Núti níchahi eta táuriqueneana nayehe ena achaneana ticatajivanahi. Éta tímereuchanuhi eta mávahásiranuhi éma Espíritu Santo. Téhesera nucaetemarecahini, níchahini eta máematanerepiana éma Váinaraji, jéhevareserapucaini eta tímereuchanuhini eta mávahásiranuinahini éma.

³⁴ ¡Étiserá machichanaveanatataji éma Váinaraji! Váiparinehi ítucaimahi échajisiha eta táurinaqueneana, taicha éti tamaverasiavahi eta evainarajivana. Eta échajiriruvanahi ticaecheràhi eta evainarajiva te esamureana.

³⁵ Nácani tiúriana achaneana, tatupiruvahi eta náechajirisirava taicha tiúrihi eta nasamure. Nácanisera achaneana váinarajiana, vahi tiúrimahi eta náechajirisirava. Tíñemahipivacahi taicha tavayuchahi eta tavainarajiva eta nasamure.

³⁶ Nutupiruva numetacahe: Te táitecapapa eta sache táitecapirayare eta juício, emutu ecaya-serehiyare eta échajisihairana eta tamaeperajiqueneana.

³⁷ Étaripa eta tiviuchaheyare. Téhesera tiúrihipuca eta échajisihairahi, vahi ecaicuñaimahi. Tájina tiviuchahémahi —máichavacapa.

*Éma Jesús macajachavaca éna fariséoana taicha
éta namasuapajiraivahi
(Mr 8.12; Lc 11.29-32)*

³⁸ Tacahe, nayaseacapa éma Jesús éna fariséoana énapa éna escribánoana. Ánipa náicha:

—Tata maestro, vivaraha picuchucaini éta tiáramicare, te yátupipuca mavaneruvahi éma Viya —náichapa.

³⁹ Éma Jesús majicapavacapa:

—¡Eti achaneana váinarajiqueneana! Núti nímatihe. Vahi esuapanuimahi, te nímercapucaini éta tiáramicare. Tásiha, váhinéni étina tatuparaca ímahahini éta tiáramicareana. Ímahayaresera éta tiáramicare tacutiyare éta máichavaquenevahi éma víyahaini profetaini Jonás.

⁴⁰ Taicha éma Jonás masiapajuechahi éta ichapequene jima, mapana sache éta mayerevahi, mapanavare yati. Ene nucaheyare, núti Manerejirunuhi éma Viya, mapanayare sache, mapanavare yati, éta nucaheyare éta nucaecarasirayare.

⁴¹ Éta jena sáchehare téchepucanayare namutu, tiúchucuhanayare éna achaneana ticavasanáinihi acane te Nínive. Tisipecaturarahianahinéni éna. Natupiruvahisera nasuapa éta mametarairu éma Jonás. Téneuchavanavanehi. Tásiha, te jena sáchehare, nacahenapa eyehe éti: “Táuricapa nacaicuñaini éna nani maparajuruana éma Cristo, táichavenéhi éta namasuapirahi éma. Taicha éma, máuriquenepanahi mayehe éma Jonás” nacahénapa.

42 Tacutiquene esu reina Seba eta acane, te susamairiricapa eta máitupajjiasiravahi yátupi ema Salomón. Ésu, tayérehiquenehinéni eta suávasa, tiyanahisera sucapayaca ema Salomón taicha suvarahahi susamayarehi éma. Tacahe te téchepucanapa namutu, ésu suyaseacainapa eta ecaicuña éti máetupicushmanahi puiti. Sucahenapapuca: “Táuricapa nacaicuñahini ena nani máetupicushmana, tájina náetseraruina nasamaripa ema Cristo, ema títupajjiápanavahi mayehe ema Salomón, tásiha vuíchahacaruva nasuapa” sucahénapapuca jácani.

Ema Jesús máimicutichinahi ena masuapajirairahana mayehe

(Lc 11.24-26)

43 Tímiyanava eta máechajisiravahi ema Jesús, ánipa macahe: —Énerichuvare éti ecuti mácani achane máinajiruhi ema émana éreana. Ema éreana tiyana matanucainapa eta jácani masiapihayarehi. Eta mamaichimavira eta mavarahaquene, mapanerechayarehi tichava.

44 Macahénapapuca: “Nuyanayare nuchava, nusiapayareva mayehe ema návaháruinihi”. Te títecapapa ema éreana mayehe ema achane mávaháruinihi, máimahapa ema achane máinajicaripa eta mapecaturana, vuíchahasera máehicahini ema Viya.

45 Tásiha, tiúrisamurepa ema éreana. Tásiha, tíchuarecapa ena siétequeneana machamuriana. Váinarajipanana éna. Nasiapahacainavarepa namutu éna. Jéhesare, tiápajucavapa eta mavainarajiva ema paure achane. Ene ecaheyare

éti, taicha eta emasuapiranuhi —máichavacapa
ema Jesús.

*Suítecapauchapa esu maena ema Jesús énapa ena
maparapenaveana*

(Mr 3.31-35; Lc 8.19-21)

⁴⁶ Tímiturecarichaha ema Jesús nayehe ena
achaneana, títecapanecha esu maena énapa
ena maparapenaveana. Nanasihisera te aneca.
Navarahahi náechajicayarehi éma.

⁴⁷ Natiarihihi ena timetapananahi ema Jesús.
Ánipa nacahe:

—Esu pémunaruquenehi pena énapa ena pipara-
penaveana, nararihi ani te aneca. Navarahahi
téchajicaviana —náichapa.

⁴⁸ Émasera majicapapa:

—Yátupi némunacavacahi esu meme, énapa ena
nuparapenaveana. Nararihisera ani te juca
nuchacaya ena némunaruanahivare, nuparapena-
veanahi.

⁴⁹ Tásiha, tisuvechahavipa viti mayeheana
apóstoleana. Tásiha, macahepa:

—Numetacahe, ena nani ena némunaruana-
hivare.

⁵⁰ Taicha namutu nácani ticaemataneacanahi
me Tata tiávihihi te anuma, énahi ena némunaru-
nahivare —máichavacapa.

13

*Ema Jesús máimicutichinavaca ena achaneana eta
evaraqui tacaevaquenehi te apanapanenejiquene
máteji*

(Mr 4.1-9; Lc 8.4-8)

¹ Te jena sache, tiyanavarepa ema Jesús, macaijuhe te tachaui eta cáquiure. Téjacavarepa eta ánaqui eta máimituresirayarehi.

² Tásiha, camurianapahivare ena achaneana títecapauchanahi éma. Eta navayuchiraripa ena achaneana, tiyanapa ema Jesús tiávacuhapa tayehe eta pacure. Ena achaneana nanasipa te tachaui tiájipahi.

³ Tásiha, camurihi eta máimicutichaqueneanahi eta máimitusiravacahi. Ánipa macahe:

—Matiarihi ema émana achane. Tévanapanahi te máesane.

⁴ Eta mapaisirapahi, témiricapaipa eta evaraqui te achene. Táimahapa eta cáyure, tanicapa.

⁵ Eta mayeherepi éma eta máevasira, máevajajapaica eta apaquehe. Tásiha, eta apamuri evaraqui témiricapa te váhirichu tamitutihini eta máteji taicha máripahi eta apaquehe. Tímarucavanepaneni táicha.

⁶ Téhesera te tíjurepa eta sache, tacapajicapa; taicha váhirichu táuparevacahíni.

⁷ Tacahe, eta apana evaraqui témiricapaipa te tataracu eta itapepare. Tiúrinahinéni eta táimarusirahi, étasera eta itape tacachuricapa eta tajurusirahi. Táemuriachapa eta sucureca.

⁸ Tacahe, eta apamuri evaraqui témiricapaipa te tiúrina máteji. Tiúrinapanahi eta tajurusira. Eta étana, ticahipa tétupicavapanapa. Eta apanavare, ticahipa ánimurichu. Eta apanavare, ticahivare apaesasajiruichu.

⁹ Esamararacanu emutu éti. Te evarahapuca ecaicutiara, tavaraha eta epanerechinavayare.

*Ena Jesús máitametacaquenevacapa ena apóstoleana
eta juca máimiturapihi*

(Mr 4.10-20; Lc 8.9-15)

¹⁰ Tacahe, viti mayeheana apostóleana vémeñahavapa eta mayehe ema Jesús. Viyaserecapa tájahapuca tacayemahi eta máimicutiarachirava-caichucha eta máimitusiravacahi ena achaneana.

¹¹ Tásiha, ema Jesús tijicapahavipa:

—Ena Tata tituparacanuhi nítametacaheyare éti eta juca táequenereruana mapanereruana. Mavaraha ímatiequenehaya éti. Énaserá ena apamuriana achaneana vahi nítametacavacaimahi, náimainavainepa éna.

¹² Éti, te esuapa yátupihí eta nímiturapiana, ema Espíritu Santo tímitucaheya tamutu eta tacayemaqueneanahi. Énaserá nácani vahi návarahahini nasuapa, énajivayare tíchavana ticaverejicasianaya eta nasamaqueneanahi.

¹³ Eta tacahehi eta nímitusiravacahi, nímicutiarachinavacaichucha. Te apaesarichu eta navarairahi náituca, vahi nacaicutiarahini eta juca nímechaqueneanahi. Nasamahi eta néchajiriruvana, váhisera nacaicutiarahini eta nímitusirahi.

¹⁴ Puiti ena nani achaneana nacuti ena achaneana acane, vahi nasupahini ema víyahaini profeta Isaías. Ánipa macahe: “Nímatihe éti. Esamayarenénipuca, váhisera ecaicutiaraimahi. Ímahayarehinénipuca, váhivaresera ímatiequenehaimahi.

¹⁵ Taicha eta esamureana eti achaneana, tétavicavahi eta tamuracava. Vahi evaraha esama. Épiyacavahivare púchuquihe, emavarairahi

esuapahini te esamureana. Tájinapa táichahíni vicuchapahini eta éneuchiravainahíni, evarairapucaini ecasiñavahini me Viya, apaesa macanaracahehini” macahepa ema víyarahaini Isaías.

¹⁶ Étiserá eti nímitureana, tétavicavahi eta iúricacarevahi, taicha esuapahi eta juca ímahaqueneanahi étapa eta esamaqueneanahi.

¹⁷ Nutupiruva numetacahe: Acane ichapemuriana ena achaneana tiúriana énapa ena víyarahaini profetana, tétavicavahi eta navarairahi tímatinuana, náimahavare eta juca níchaqueneanahi ímahaqueneanahi. Navarahavarepa nasama eta nímituresirahi. Váipasera nacapayacahini.

¹⁸ Ácaicutiaraicha eta juca nímicutiarachaquenehi mayehe ema tévacarahi.

¹⁹ Núti níchuhavaca ena achaneana, máchanerayare ema Viya ena téhicanuanayare. Tásiha, natiarihi ena achaneana nasamaripahinéni eta nímiturapianahi, émasera ema Váinaraji vahi máisapahini tánasihini te nasamureana. Enevanehi macamitisicavaca eta náimitucasivanainihi. Éna nacutihi eta máteji muracapahiquenehi te achene.

²⁰ Natiarihivare ena apamuriana achaneana, nacutihi eta máteji máripahi. Te nasamararaca eta nímiturapiana, natupiruvanehi nasuapa, tiúrisamureanainehi.

²¹ Váhisera náratahahini nacaravahuhini yátupinahíni. Vahi nácutihíni eta evaraqui tiúparehi. Ánipirichu eta náehisirahi, taicha vahi nacamichahini jácani nacatajivairanahi. Váhivare túmesamureanainahíni te tatiarihipa eta jácani

naçatichaira ena achaneana táichavenehi eta náehisiranuhi.

²² Natiarihivare ena apamuriana achaneana nacuti eta máteji te távihahi eta itapequijiana. Énerichuvare nasamararacahinéni eta nímiturapiana. Napaneréquenehahinéni, tahapapiricavacahisera eta jácani táichararacavayarehi eta náitairesira. Tavayuacavacavare eta tájiparacana, étapa eta navarairahi tirricochavana. Tamutu eta juca táemetavícahi eta navarairahi téhicanuana. Tamapurujiyarehi eta najacpirahi eta nímiturapiana.

²³ Natiarhisera ena apamuriana achaneana nacutihi eta tiúrina máteji. Éna, tisamanuanahi. Náunacahi yátupi eta nímiturapiana, náimatiequenehairahi. Tájinavare náichiravainahíni eta náehisiranuhi. Ichape eta nacaemataneasirahi ema Viya. Nararihi ena apaesarichu eta nacaemataneasirahi. Nararihivare ena apamuriana, nativarerehapanapa eta nacaemataneasirahi. Tásiha, ena apamuriana, ichapemuripanapa eta nacaemataneasirahi ema Viya —macahepa ema Jesús.

Ema Jesús máimicutiarachina eta sucureca trigo étapa eta ejare

²⁴ Ema Jesús máimicutiarachavare ena achaneana eta máimitusiravacahi:

—Puiti nuvaraha nímitucahe tatiarhiyare eta sáçeyare te táitecapapa eta nacayeserehiraya me Viya ena achaneana. Tacutihi eta máichavaqueneva mácani achane tévacarahi eta tiúrina evaraqui tayehe eta tiúrina máteji.

25 Étasera te tímacapa ema ticayehe eta sucureca, macahepaipa ema macatianaru. Máimisiriqichinapa eta táíñemahiqueneana ejare. Tásiha, tiyanapa.

26 Tacahe, te tímarucainipa eta evaraqui trigo, tiúchucavarepa eta ejare, tacachaneipaipa eta evaraqui.

27 Náraminehi ena machaneranihi ema achane tévacarahi. Tiyananapa nametapana ema náejaháruhi. Ánipa náicha: “Tata, eta jena pévaraquihi, tájina tacasiriqihini eta táíñemahiqueneana ejare. Puítisera tiúchucapa tacachaneipaipa eta pévaraquihi” náichapa.

28 Ema náejaháruhi majicapapa: “Matiarahi mácani ticatianacanihi. Éma tíchahi eta juca, tímisiriquichinanuhi”. Tásiha, ema machanerana náichapa: “¿Pivarahapuca, tata, viyana víti vivepuraha eta jena ejareana?”

29 Éma majicapapa: “Vahi tiúririne, taicha machu táimivepurica eta névaraqui trigo.

30 Tácuticacarichaha eta tajurusirayare. Tiámainucava te tacaehatijipa, nuvanecahénapa éti nuchanerana tativayare evepurica eta ejarejana, ítijicainapa eta tacaijuirayare. Tásiha, evehainasarepa eta trigo, ticaunainapa te tacaunairare”.

*Éma Jesús máimicuticha eta taqui eta mostaza
(Mr 4.30-32; Lc 13.18-19)*

31-32 Éma Jesús máimicutiarachavare eta taqui eta mostaza eta máimituresirahi. Ánipa macahe:

—Puiti nuvaraha nímitucaheya eta apana tayehe eta evaraqui ánichichaquene, étasera te tijurucapa, tíñejiyarehi. Tacaheyare eta tajurusirayare eta nímiturapiana nayehe nácani tijacapanayare. Ímaticuhi éti eta taqui eta mostaza, eta ánichichapanahi tayehe eta apamuriana evaraquiiana. Tásihasera te tímarucapa, tiúnayarehi eta táenaqui, tacutiyahehi eta yucuqui eta táichapeva. Tacachuricayarehi eta apamuriana evaraquiiana. Járjapainapa eta cáyureana. Táepiyacainapa eta tamacajiana te tatavajiana. Ene tacaheyare eta tajurusirayare eta nímiturapiana núti Manerejirunuhi ema Viya.

*Emá Jesús máimicuticha eta levadura
(Lc 13.20-21)*

³³ Énerichuvare máimicutichina eta juca apana máimituresirahi. Ánipa macahe:

—Tacutiquene, eta juca nímiturapiana tímicutijiricavahi eta levadura. Esu súcani esena tiúrihi eta tasisijisira eta suyehe levadura te tamutu eta suépiyaruhi masa, tayanapane apinapucaini arroba eta suyehe jarina, tasihajicahisera. Jéhesare, tiápucayarehi tiuri.

*Camuri eta máimicutichaqueneana
(Mr 4.33-34)*

³⁴ Ema Jesús tamutu máimicutiarachinapahi eta máimituresirahi. Tájina étahena te tímitureca, vahi macunacahini eta máimicutichinaqueneana.

³⁵ Títauchavahi eta juca máechajiriruvanahi ema émana profeta. Ani macahehi: “Tamutu eta nímiturapianayare nímicutichinayarepahi.

Nímicaecherachainapa eta táeñaurevaquenehi te tépanavainapa máepiyacainapa ema Viya eta apaquehe” macahepa.

Ema Jesús máimicaecherachapa eta máimicutichaqueneanahi tayehe eta trigo étapa eta ejare

³⁶ Tacahe, ema Jesús mavanecavacapa ena achaneana nayanapa te napenana. Éma apanava tiyanavarepa tichava te mapena, vítipa viti mayeheanahi apóstoleana. Tacahe, te véjacapa vimutu, viyaserecapa máimicaecherachahini eta máimiturapihi máimicutichaquenehi eta ejare tacachanequenehi eta trigo.

³⁷ Tacahe, ema Jesús máichahavipa:

—Nuti Manerejirunuhi ema Viya nucutihi ema achane tévacahi eta tiúrina evaraqui.

³⁸ Eta apaquehe tacaevaiyahi eta trigo, énahi ena achaneana te juca apaquehe. Eta tiúrina evaraqui, étíhi eti nuchaneranahi núti. Tásiha, eta ejare énahi ena machaneranahi ema Váinaraji.

³⁹ Taicha ema ticatianacanuhi, manacahi eta ejare, mavarairahi máepacuchayarehi eta névaruhi núti. Eta tacaechatijirapa eta trigo, étahi eta táitavirayare eta apaquehe. Nárajapayarepa ena ángeleana, ticurujiricanayarehi.

⁴⁰⁻⁴² Tásiha, te jena sácheyare, nuti Manerejirunuhi ema Viya nuvanecainapa ena nuyeheana ángeleana nacavehasi ena tíchanahi eta máeperajiqueneana énapa ena tímiaquipaicana ena apamuriana achaneana. Tásiha, náquijicavacainapa eta te táijurequenehi yucu. Ticapítiquiahechavanainapa eta tacativayare nasama. Tíyahanainapa.

43 Tásiha, nácani títauchanahi eta mavanai-ripiyanihi ema Viya, tétavicavayare eta najaraivayare tacutiya eta tajaraiva eta sache. Téjacanainapa tayehe eta macatuparahaiyahi ema Vicaiyaquene. Te evarahapuca ecaicutiara, tavaraha eta epanerechinavaya.

Emá Jesús máimicuticha eta entierro

44 Eta nímiturapiana nuti násihaquenehi te anuma tacuti eta tayumururevaquenehi entierro. Te máichimavahi mácani achane eta entierro, tiúrisamureyarehi. Tásiha, máimichavayarehi mayumuruca tayehe eta apaquehe távihahi. Mavacharecayarepa eta apaquehe, mavarairayarehi eta entierro. Tayanapane táimijararecayarepa tamutu eta macayehequeneanainihi.

Máimicutichavare eta perla tasivachaquenehi

45 Énerichuvare eta najacapirahi ena achaneana eta nímiturapiana nuti násihaquenehi te anuma tacuti eta macaematanerahi mácani achane comerciantepahi. Matanucapahi eta tasivachaqueneanahi perla.

46 Te máichimavapa eta perla matanurepahi, tétavicavahi eta tasivachavahi. Mavarahasera mavachareca eta perla, tayanapane táimijararecayarehi tamutu eta macayehequeneanainihi.

Máimicutichavare eta ichape nayutahe

47 Énerichuvare nuvaraha nímitucahe tayehe eta sácheyare eta táitecapirayarehi eta ecuñaraqui. Tacutihi eta ichape nayutahe. Te náechipaecapa te cáquiure, tamutu tavehayarehi eta tasimutu-queneana jímana.

48 Te náimahapa tínica eta nayutahe, navehayarepa nachurupaicapa te tiájipahi tachausi. Nanerejicayarepa eta jímana tiúrinana. Nanacacuhayarepa te ichape maha. Tásiha, náquijicayarepa eta apamuri máurirahanahi.

49 Ene tacaheyare eta táitavirayare eta apaquehe. Nárajapayare ena ángeleana, nanerejicainapa ena achaneana tíchanahi eta tauriqueneanahi.

50 Náijuchainapa te yucu, táetaviuchahi eta táijureva. Ticapitiquiahechavanainapa eta tacativayare nasama. Tíyahanainapa —macahepa emá Jesús.

Emá Jesús mayaserecavaca te nacaicutiarahipuca eta máimiturapianahi

51 Tacahe, emá Jesús tiyaserecavipa. Ánipa macahe:

—¿Ecaicutiarapuca éti tamutu eta juca nímiturapianahi? —máichahavipa.

Tásiha, víti vijicapapa:

—Vicaicutiara, tata —vicahepa.

52 Tácahe, máichahavipa:

—Eta yátupirapa eta ímatiequenehairapa eta nímiturapiana, éti apanavare máestrohénapa. Puiti nutuparacahe ímitucavacaya ena achaneana. Tétavicavaya eta ítamuturusirayare eta ímituresirayare eta mapanereruana emá Viya —máichapa.

*Tichavapa emá Jesús te mávasa Nazaret
(Mr 6.1-6; Lc 4.16-30)*

53 Te tamutupa eta máimicutichirahi emá Jesús eta juca máimiturapiana, viyanapa.

54-57 Vichavapa tayehe eta mávasa. Te sávaru-muhuquenepa, viyanavarepa tayehe eta náuruji-sirareva eta nayujarauchirahi ena achaneana. Tímiturecapa ema Jesús. Ichape eta tahapasamu-rechiravacahi ena achaneana. Váhiserá návarahahini nasuapahini. Náepururichucha éma. Ánipa nacahe:

—Témunahiricava eta máitupajijiasiravapahi ema maca. ¿Távihasica macaravahuinehi eta máichirayare eta tiáramicareana? Vivaraha vímaha víti apanava eta jácani máichaqueneanahiji visamáiririruanahi. Taicha vímatihi ema maca. Carpintérohi éma. Vímativare ema máiyaini, ésupa esu maena María, énapa ena maparapenaveana ema Jacobo*, ema José, ema Simón, émapa ema Judas. Vímativare ena esenana maparapenaveanahivare, ticavasanahi eta ani. ¿Távihasica máitusiavahi eta juca máitucaqueneanahicacha? —nacahepa.

Émasera máichavacapa:

—Tatuparaca epicauchahaviya vimutu viti manvaneruana ema Viya. Étiserá éti nujaneananahi ecavasanahi eta te juca viávasa, étipa eti nuparapenaveana, vahi epicauchanuimahi —máichavacapa.

58 Tásiha, tájina máimerecachichaini eta tiáramicareana táichavenehi eta namasuapajiraivanahi, váhivare nacasiñavahini eta mayehe.

* **13:54-57** Ema maca achane, ticaijarehi Jacobo te náechajiriruva ena israelítana. Te véchajiriruva, ticaijarehi Santiago. Mapaenu-mavahi máehica ema Jesús te táequenepa eta máechepusirahi te máecari ema Viáquenu.

14

*Emá Herodes masamairicapa eta máichaqueneanahi emá Jesús
(Mr 6.14-29; Lc 9.7-9)*

¹ Tacahe, emá Herodes emá aquenucahi tayehe eta Galilea masamairicavarepa eta máichaqueneanahi emá Jesús.

² Tacahe, emá Herodes máimijachahi emá tichavahi téchepuca emá Juan. Tásiha, máichavacapa ena máevanachanahi:

—Emá mácara, émaripa emá Juan Tícachasiricarahi, emá nímicaparuhi. Tichavaripa téchepuca te máecari. Táitusiava máiturucahi macuchuca eta tiáramicareana —macahepa.

³⁻⁴ Taicha emá Herodes mavehahi esu Herodías, esu machinenahi, mayenahi emá maparape Felipe. Máiminajicapa emá suima. Tacahe, emá Juan macajachavacaripa éna eta naviracacairahi. Étapa tímicitichahi emá Juan, sucatichapa esu Herodías. Tásiha, emá Herodes máeratacapa te cárcel emá Juan, macavanaripipa náitiaca te cadena.

⁵ Taicha supamicahi ésu eta máimicapasi-rayarehi. Tipicahisera éma nasemahini ena achaneana. Taicha emá Juan, tétavicavahi eta náemunasirahi ena achaneana. Náimatihí éma, eta vanairucairahi me Viya.

⁶ Tásihasera, títecapapa eta sache máijaremuhu emá Herodes, sutiarihíhi esu amaperu, suchicha esu Herodías. Tiúchucapa tírimaica te mamirahu emá Herodes, énapa ena machimaranahi. Emá Herodes máuricainehi ichape.

⁷ Tacahe, máichapa ésu:

—Nujuracha te pimirahu, eta níjarasiraviya jácani piyasearunuyare —máichapa.

⁸ Tásiha, esu amaperu suyaserecapa esu suena tájahahipuca eta suyasearuyarehi. Esu suena suímitucapa: Piyaseacayare ani píchaya: “Píjaracanu eta ñichuti eñi Juan te curuja” píchayare.

⁹ Tásiha, eta masamirahi eta juca suyasearuihi, ema rey Herodes ichaperinehi eta mapaneresirahi. Tájinapasera máicharacavahini taicha máechajiriruvaipahi majurachaipahi te namirahu ena machimaranahi eta máijarasirayare eta suyasearuyarehi ésu.

¹⁰ Tacahe, macavanairipipa nayuchatipiquenuhapanana ema Juan.

¹¹ Tacahe, námapaipa te curuja eta machutini, náijaracapa esu amaperu. Tásiha, ésu sujacapapa, suíjaracapa esu suena.

¹² Títecapananecha ena máimitureanahi ema Juan. Navehapa eta máquehe, náecarapanapa. Tásiha, tiyananapa nametapanahi ema Jesús.

Ema Jesús máitaparavaca máenicavaca ena camuriqueneana achaneana

(Mr 6.30-44; Lc 9.10-17; Jn 6.1-14)

¹³ Te masamairiricapa ema Jesús eta nacapasirahi ema Juan, viyanapa viávacuhapa tayehe eta pacure. Vicaijuhepa tayehe eta apaquehe mávapahi. Énasea ena achaneana náecharichucha eta viyanirahi. Tiyananapa náehicahi tipaicapanahi.

¹⁴ Te tiúcupaicapa ema Jesús tayehe eta pacure, máimahapa ena camuriqueneana achaneana. Majapanuvarinehi eta máimairavacahi.

Macanaracavacapa ena nacajumaqueneanahi námaqueneanapahi.

¹⁵ Tacahe, viti mayeheana apóstoleana vímahapa eta cáperehíchicharínehi. Vimetacapa éma máevatamuríhahini ena achaneana natiarihiqueneanahi. Víchapa éma:

—Cáperehipa jena sache. Tiyerehivacahi eta pétiana. Táuricapa pivanecavaca ena achaneana nayanapa, navachareca eta nanica; taicha ani tájina naviyavaimahi eta te juca —víchapa.

¹⁶ Ema Jesús tijicapahavipa:

—Vahi nuvaraha nuvaneca nayana. Tájina naviyava eta nácaijuhéhini. Íjaraca étina eta nanica.

¹⁷ Tásiha, viti víchapa:

—Tájina vácayehe eta tinicacare. Jucarihisera cíncochichahi eta pan, apina eta jima.

¹⁸ Ema Jesús máichahavipa:

—Íama ani.

¹⁹ Tacahe, macavanairipipa náejahahapaica ena achaneana te táinahu eta muíjipahi. Mavehapa eta cíncoquene pan étapa eta apina jima. Máesenicapa eta anuma. Mahasulupayachapa ema Viya. Mayuvetucavacapa eta pan, tásiha, tíjaracahavipa víti. Víti víjaracavacapa ena achaneana.

²⁰ Vinicapa vimutu, visatuhevacapa. Tásiha, vicaemacharichahavare doce saye ichapehiana táinicachaichahava eta vémacharajiana.

²¹ Ena tinicanahi eta juca, cinco mil ena ajairana eta náichapemurívahi, énerichuvare ena esenana énapa ena amaperuana.

*Ema Jesús mapaicaeca eta une
(Mr 6.45-52; Jn 6.16-21)*

²² Tiuri, ema Jesús tivanecahavipa viti mayeheana apóstoleana viávacuhayare eta te pacure. Vínapucayarehi viánueca te apachara eta cáquiure. Émasera manasiyarehi máevatamuríhanumayarehi ena achaneana nachava te napenana.

²³ Te tamutupa eta macametavairahi ema Jesús nayehe ena achaneana, tiyanapa tiápanahi tayehe eta cerro. Tiyujaracayarehi tayehe. Éta pa tavinehi eta yati, manasipa macarichuhi eta te cerro.

²⁴ Tacahe, víti te túpierecahaviripahi, tichimarahavipa eta muraca técatícava, viácapaquihaipahi.

²⁵ Te tijarahichichapa, vímahapa ema Jesús mapaicaecapahi eta une eta macapayasirahaviya.

²⁶ Eta vímairahi éma, vipicarinehi. Vími jachapa cunare. Vipiararecapa eta vipisirahi.

²⁷ Émasera ema Jesús téchajicahavipa:

—Vahi ecupica. Nútichucha. Étumechava — máichahavipa.

²⁸ Tásiha, ema Pedro majicapapa:

—Te yátupipuca píti quenehi, piti Tata, pivanecanu núti apanavare nupaicaeca eta une. Nuvaraha nupauchavi — máichapa.

²⁹ Ema Jesús majicapapa:

—Yare, pipauchanu.

Enevanepa tiúcupaicahi te pacure ema Pedro. Tiyanapa mapaicaecapa eta une, macapayacayarehi ema Jesús.

³⁰ Étasera eta máramesirahi taicha eta muraca técatícava, timutserahavapaipa téricapaipa. Tásiha, tipiararecapa:

—¡Picatajicanu, Tata! ¡Néricainapa!

³¹ Enevanepasera macaratavauchapa ema Jesús eta macuchucuirayarehi. Tásiha, máichapa:

—¿Ticamitisicavipapuca eta pipisirahi eta picasiñanuirahi?

³² Te tiávacuhapa ema Jesús émapa ema Pedro tayehe eta pacure, enevanepa tésamiricavahi eta técatícava. Tíhecapa eta táepacucuirahi.

³³ Tacahe, viti apamuriana vicunachainehi ema Jesús eta vímairahi. Vépuyumurihapa te mamirahu. Tásiha, víchapa:

—¡Jéhevare piti Tata, Machichaquenévihí ema Viya! —víchapa.

Ena Jesús macanaraca ena nacajumaqueneana te avasare Genesaret

(Mr 6.53-56)

³⁴ Tacahe, te apanapa sache, viápechavavarepa viánueca eta cáquiure. Vítecapa eta te apaquehe ticaijare Genesaret.

³⁵ Tásiha, ena achaneana ticavasanahi tayehe náimativanehi eta émairahi ema Jesús. Timetajiricacanapa náechapa namutu ena achaneana ticavasanahi te avasareana. Tiyananapa mayehe ema Jesús, námavacapaipahi namutu ena nacajumaqueneana.

³⁶ Nayaseacapa éma eta máisapirainahíni náemamajiaca eta tacheyarapi eta mamuiríha. Tacahe, nácani témamajiacanapahi, enevanepaipa tinaracanapahi.

15

Emā Jesús mametaca ena achaneana etā timaeperajicarahi

(Mr 7.1-23)

¹ Tacahe, títecapanapa ena apamuriana fariséoana tíasihanahi tayehe etā Jerusalén, énapa ena escribánoana. Témeñahavanapa etā mayehe emā Jesús. Ánipa naicha:

² —Pímaha, ena pímitureana vahi náitauchahini etā viyeherepiana. Namaeperajicapa etā náchanevana etā nanisirahi taicha vahi nacasipavahunumahini. ¿Tájaha tacayema vahi napicauchahini etā viyeherepi nanaquiruhi ena viáchucanaveanaini? ¿Étaserapuca tacahehi etā pímitusiravacahi? —náichapa.

³ Tásiha, emā Jesús majicapavacapa:

—¿Tájaha tacayema éti apanavare, vahi ítauchahini etā mavanairipiana emā Viya, tasapihapa epicauchahi etā eyeherepiana nanaquiruhi ena iáchucanaveanaini?

⁴ Emā Viya ani macahehi etā macavanairipirahi etā viyehe: “Pipicauchaya pémunacayareva emā piya ésupa esu pena”. Jucarihi etā apanavanairipi: “Écapacayarehi mácani tíñemahi etā nacayemaquene mayehe emā máiya, ésupa esu maena”.

⁵⁻⁶ Étiserā vahi epicauchahini etā júcana mavanairipiana emā Viya. Taicha te mararihi mácani achane ticamavahupuca me Viya etā máimahaqueneanahi, etā ímitucasivahi éti: “Vaipa tatuparaca emā achane etā máimicatasiraya emā maiya ésupa esu maena”. Tasapihapa, ichape

ticapicahuhi eyehe eta eyeherepiana. Étasera eta mavanairipi ema Viya, vaipa epicauchahini.

⁷ ¡Éti ecaijarehi apimirana! Tatupiruvahi eta máechajiriruvahi ema Viya, téchajisiahehi éti eta te Sagrada Escritura*.

⁸⁻⁹ Ánipa macahe: “Ena nani achaneana, tétserajicanuanahi te najaca; váhisera táetupicavahíni te nasamureana. Téneuchavanahi eta nuyehe, tamapurujihisera eta náeneuchiravahi. Nacaerajicahivare eta nuvanairipiana; tasapihapa náimicapicauchahi eta nayeherepiana táuchurechucha te napanereruana ena náchucanaveánaini” macahepa ema Viya.

¹⁰ Tásiha, máichuhavacapa ema Jesús ena achaneana. Ánipa máicha:

—Nuvaraha esamanu yátupina, apaesa ácaicutiara.

¹¹ Tájina máeperajina eta viáchanevana te vini-capuca eta vimacasipavahuiranumahini. Jácani tasiapaquenehi te vijaca, tájina tamaeperajicahavihini. Vahi étaparacaina. Étasera eta evainarajivana táuchureanapuca te ejaca, étapa eta evainarajipanereruanahi, jéhevare éta timaeperajicahehi —máichapa.

¹² Tacahe, viti mayeheana apóstoleana vémeñahavapa eta mayehe. Vimetacapa:

—Ena nani fariséoana tisemanahi taicha eta juca píchiravacahi —víchapa.

¹³ Émasera máichahavipa:

* **15:7** Májurehi ema víyarahaini profeta Isaías eta juca máechajiriruvana ema Viya.

—Ena nani nacutihi eta ejare, vaipa émaimahi máechahini ema Tata Nucaiyaquene. Ticavepuricasianayaresera éna.

¹⁴ Ésamiricachucha. Vahi ecuimisiapava nayehe, taicha éna, púchuquianahi tayehe eta juca nímiturapiana. Ena púchuquiana, te tichurucacanapuca, tiáquipaicacanayarehi táicha vahi náimahahini eta nayanihayarehi —máichapa.

¹⁵ Tásiha, ema Pedro mayaserecapa:

—Picatajicahavi pímitucahavi apaesa vímatiequeneha eta juca pímicutiarachirahi eta táuchureanahi te vijaca —máichapa.

¹⁶ Ema Jesús máichahavivarepa:

—¿Énerichuvare éti mapanererurehehi?

¹⁷ ¿Váhipuca ácaicutiarahíni eta juca? Tamutu eta juca tasiapaqueneanahi te vijaca vinicasareanahi, tatupiru te viami. Tásiha, te tiúchucapa, apanapa eta táuchusahahi. Vahi timaeperajicahavimahi.

¹⁸ Étasera jácani táuchurehi te vijaca tásihaquenehi te amahe eta visamure. Eta taurivahi eta náechajisirana ena achaneana, étara timaeperajicavacahi éna.

¹⁹ Táicha jácani táíñemahiqueneanahi panerucana, eta tásihaqueneanahi te nasamureana. Ema achane mapanerechahi maveha esu apana esena mayena ema apana achane. Esu esena supanerechahi suveha ema apana achane suima esu apana esena. Ena amaperuana napanerechahi eta natuhusivaya. Nácanivare, tipanerechanahi eta ticaparecana, tiámerecana, tivayua-recana, téchajihiana.

20 Tamutu eta juca panererucana tauriqueneana, te náichahi ena achaneana, éta timaeperajicahi éna. Étasera jácani nanicaqueneana, tayanapanepuca vahi náichahi eta nayeherepi eta nasipavauchirava, vahi tamaeperajicaímahi —máichahavipa.

*Esu ésuna esena apavasana sucasiña ema Jesús
(Mr 7.24-30)*

21 Tacahe, tiámahavivarepa ema Jesús te apana avasareana táunavahi eta departamento Siria, návasa ena apaechajiriruvana.

22 Ánaqui, ticapayacahavipa esu esena. Supiara-capaipe eta supauchirahi ema Jesús. Ánipa suc-ahe:

—Pájapanunu, tata. Píti yátupiquenevihi Cristo, ñivaneruvihí eñi Viya, vicuchapaquenevihi. Esu nuchicha ñávahácahi eñi éreana, tétávicavahi eta sucatajivairahí. Picatajicanu, tata, eta picanarasi-nanuini ésu nuchicha —suíchapa.

23 Émasera ema Jesús vahi majicapahini. Tipaicapaichucha. Vipauchapa viti mayeheana apóstoleana, vimetacapa éma:

—Tata, pévataca suyana esu suna esena apavasana tipiararecapahi te véquene —vicahepa.

24 Tásiha, ema Jesús máichahavipa:

—Jéhevare eta epanereruhi. Ema Tata tivanecanuhi nacarichu néchapajiricayare ena vijaneanana israelítana. Nacutihí éna eta uvesana máquensureana, taicha ticamununuanihi eta nujaneasiraya —máichahavipa.

25 Ésusera esu esena tépuyucapa te mamirahu. Suíchapa:

—¡Tátachicha, picatajicanupaini, pímicatacanu!
¡Picanarasinanuini esu nuchichasami! —suíchapa.

²⁶ Ema Jesús majicapapa:

—Nativa néchapajiricavacaya ena nujaneanana.
Taicha vahi táuricachini ásapihahíni néchapajirica-
hehíni éti apavasanana émetavicachíni ena nu-
janeanana —máichapa.

²⁷ Esu esena sujicapapa:

—Énehinehi tacahehi, tátachicha. Yátupihi vahi
pijaneananuinahini. Pájapanunusera, picatajica-
nuchuchaini. Víti apanava vácasiñavahi eta piyehe
eta vítátijivairaina —suíchapa.

²⁸ Ema Jesús majicapavarepa:

—Páurevi piti nuchicha, ichape eta picasiña-
vairahi eta nuyehe. Puiti títauchavayare eta
piyasearapihi nuyehe. Nucanarasinaviyare esu
pichicha —máichapa.

Jéhesare enevanepa tinaracahi esu amaperu.

Camurianahi ena nacajumaqueneana macanararuanahi ema Jesús

²⁹ Tacahe, tiyanavarepa ema Jesús. Véhica-
varepa víti apanava. Vichavavarepa te Galilea.
Tásiha, vijuchehausichapaipahi eta cáquiure, vi-
caijuheya eta te mávapahi apaquehe anuquerehi,
te távihahi eta céroana. Vinasipanapa eta jena
sácheana eta ánaqui.

³⁰ Tacahe, nacahepaipavare ena camuri-
queneana achaneana te viávihahi víti.
Námaquenepanepahi ena nacajumaqueneana:
ena masariana, énapa ena púchuquiana, énapa ena
úpana, énapa ena túpupáiqueana.

31 Namutu ena nani nacajumaqueneana macanaracavacapaipahi éma. Ichaperínehi eta náramirahi ena achaneana eta náechajisiraipa ena úpana, énapa ena túpupáiqueana tinaracanapaipa, tiúripaipa eta napaisira ena masariana. Tímairiricanapaipa ena púchuquiána. Eta náurisamurevapahi, nacunachapaipa emá Viya.

*Éma Jesús máenica ena cuatro mlqueneana achaneana
(Mr 8.1-10)*

32 Tásiha, emá Jesús tíchuhavipa viti mayeheana apóstoleana. Máichahavipa:

—Nujapanuvaca ena nani achaneana natiarihiqueneanahi ani, taicha mapanaripahi sache puiti eta nacahehi eta viyehe. Tájinahivare naviyahini nanica. Nujapanuvacaicha névatacavacahini, machu náquipaicava te achene taicha eta náecuavana. Vájapanu eta náecuava, vénicavaca — máichahavipa.

33 Tásiha, víti vijicapapa:

—¿Távihapucaini vítusiavahini eta tinicacare eta te juca mávapahi vámahi? ¡Váhivare vítaparahaimahi vénicavaca ena nani camuriqueneana achaneana! —víchapa.

34 Tacahe, emá Jesús tiyaserechavipa:

—¿Áyanachaha eta pan eta íámaqueneanapahi?

Víti vijicapapa:

—Jucarihi siéterine. Ánimurichicharinehivare eta jímachicha —vicahepa.

35 Tásiha, macavanairipipa eta náejahapaimurihahíni namutu te apaquehe.

³⁶ Mavehapa eta siétequene pan, étapa eta jímana. Mahasulupayachapa ema Viya. Tásiha, mayuvetu-cavacapa, tíjaracahavipa víti. Tásiha, víti víjaracavacapa ena camuriqueneana achaneana.

³⁷ Tacahe, vimutu vinicahi, visatuhevacapa. Vicaemacharichahavare. Siétehi eta sáyeana tánicarui eta vémacharajiana.

³⁸ Eta nasimutuvahi ena achaneana, cuatro mílqueneana ena ajairana. Natiarihivare ena esenana énapa ena amaperuana.

³⁹ Te tamutupa eta juca, mavanecavacapa ema Jesús ena achaneana nayanapa nachava te napenana. Tásiha, éma tiávacuhavarepa te pacure. Viyanavarepa. Vicaijuhe eta te avasare Magdalena.

16

Éma Jesús mápechavare mayunacavaca eta nama-suapajiravahi ena fariséoana

(Mr 8.11-13; Lc 12.54-56)

¹ Tacahe, ena apamuriana fariséoana énapa ena saducéoana napauchapa ema Jesús. Eta navarairahi náemejecapavacha éma, nayaseacapa máimerecahini eta tiáramicareana, máimerecavahini te yátuphipuca vanairucahi me Viya.

² Émasera majicapapa:

—Te cáperehichicha, te ímahahi eta táitsirahi eta úcaji, éti ímijacha tímiyanavayare eta tiúriyare eta sácheana.

³ Te yáticarahi, te ímaha eta timapicurume, títsitsimehi, ímijachahi tiquivayare. Éti, ímijachavahi

ímatiequeneha eta tapaisira eta anuma. ¡Tétavicavahisera eta emasuapajiraivahi! Taicha éti ímijachavahi religiósohe, ímijachavavare ímatiequeneha eta mavarahaqueneanahi ema Viya, váhisera ávarahahini ímatiequeneha eta máimeruhehi ema Viya, te juca sácheana nucachanerahehi.

⁴ ¡Eti achaneana váinarajiqueneana! Núti nímatihe. Vahi esuapanuimahi, te nímercapucaini eta tiáramicare. Tásiha, váhira étina tatuparaca ímahahini eta tiáramicareana. Ímahayaresera eta tiáramicare tacutiyare eta máichavaquenevahi ema víarahaini profetaini Jonás —máichavacapa.

Tásiha, majunijicavacapa, tiyanapa.

Éma Jesús máimicuticha eta levadura eta náimiturapiana ena fariséoana

(Mr 8.14-21)

⁵ Tacahe, eta viánuesiravarepa eta cáquiure, vipanerechapaipahi eta vémitisisirapa eta pan.

⁶ Éma Jesús máichahavipa:

—Tímaticarehi eyehe eta levadura eta tapareasirahi eta masa. Tacutirichu eta tapareasirahi eta apimirairavacahi ena fariséoana énapa ena saducéoana. Échapavaicha tayehe, vahi ecuehica éna —macahepa.

⁷ Vítisera viti apóstoleana, eta véñamavairahi, víchacacapa:

—Tímicajachahavihi eta vémitisisirahi eta pan. Eta tacahe, macahehi tayehe eta levadura — víchapa.

⁸ Éma tímatiacahavihi. Tásiha, máichahavipa:

—¿Tájaha tacayema ecahechajiriruvahi eta vahi íamapahini eta pan? ¿Váhhipuca ácasiñavahi eta nuyehe?

⁹ ¿Vuíchahacaru ácaicutiaraini? ¿Vuíchahahhipuca ímatinu? ¿Váhivare échaini eta nucaejapasirahi eta cíncoquene pan nanicaquenahi ena cinco mílqueneana achaneana étapa eta náemacharajiana?

¹⁰ ¿Váhivarepuca écha eta siétequene pan naniruhi ena cuatro mílqueneana achaneana étapa eta náemacharajiana?

¹¹ Nímijachapa ecaicutiarayarehi eta níchirahahi eta échapiravainahini eta nayehe levadura ena fariséoana énapa ena saducéoana. Váhira étainahini néchajisihahíni eta levadura tayehe eta pan — máichahavipa.

¹² Vipaenumavahi véchahi eta máichirahavihi éma eta véchapiravainahini vahi vicucuti ena fariséoana énapa ena saducéoana eta apimirairanahi.

Éma Pedro máimereucha éma Jesús eta émairahi éma Cristo

(Mr 8.27-30; Lc 9.18-21)

¹³ Tacahe, te apanapa sache, viyanavarepa vipaica. Vicaijuhe eta te Cesarea máepiyaruhi éma rey Felipe. Te viánehipa, éma Jesús tiyaserecavavipa:

—¿Tájaha nacayema ena achaneana eta nuyehe nuti Manerejirunuhi éma Viya? ¿Nájahapuca náimijachanuhi éna? —máichahavipa.

¹⁴ Vijicapapa víti:

—Ena apamuriana náimijachavihi ema Juan, tichavahi téchepucahi. Ena apamuriana tímijachavianahi ema víyarahaini profeta Elías, téchepucahi éma. Ena apamuriana tímijachavianahivare ema víyarahaini profeta Jeremías; émapuca ema apana profetaini antívuini, téchepucahi —vicahepa.

¹⁵ Ema Jesús tiápechahavivare tiyaserecahavi:

—Étiyapa ¿nájaha ímijachanuhi núti?

¹⁶ Ema Pedro majicapapa:

—Pítira yátupiquenevihi Cristo, machichaque-nevihi ema yátupiquenehi Viya.

¹⁷ Ema Jesús majicapapa:

—Piti Pedro*, tétavicavahi eta pétupisiravahi taicha manacasamureruvihi ema Tata Nucaiyaquene tiávihahi te anuma. Vahi étáinahini eta máimiturapinahíni piyehe mácani achane.

¹⁸ Núti apanavare nutupiruva numetacavi. Píti picaijarehi Pedro. Píti picutiyare eta mari, tétavicavayare eta pitumevaya. Namutu ena picutiqueneana eta pisuapiranuhi nútirahi yátupiquenehi Cristo, énara nuchaneranayare. Éna apanavare nacutiyareva eta mari eta natumevayare eta náehisiranuhi. Tájina vahi máratahaimahi macaetemavaca ema Váinaraji.

¹⁹ Píti picatuparahayare eta llave tayehe eta anuma, apaesa nasiapa nácani pijacapaqueneanayare píti —máichapa.

²⁰ Tacahe, tituparacahavipa muraca ema Jesús nacuija vicumetaca eta émairahi ema Cristo.

* **16:17** Ema Jesús téchjicahi te máechajiriruva hebreo, máimijarechahi ema Pedro: “Simón, machicha ema Jonás”.

*Emá Jesús máimereucha eta máepenirayarehi
(Mr 8.31-9.1; Lc 9.22-27)*

²¹ Tacahe, emá Jesús tépanavapa timetacahavihi eta táicharacavayare eta máepenirayare. Máichahavipa:

—Nuti nucatuparahahi eta nuyanirayarehi te Jerusalén. Ánaqui nucatajivayarehi ichape naicha ena tuparairucana, énapa ena aquenucarahana, énapa ena escribánoana. Éna, tímicapacanuana-yareva. Mapanayareichuhisera sache nucahe-yare eta népenirayare. Tásiha, nuchavayarehi nécheputa —máichahavipa.

²² Tásiha, máiputsicapa mámahí emá Pedro emá Jesús. Ánaqui macajachapa, máijarasiravahi eta mapanereruhi:

—Núti vahi návarahahini táitauchavahini nacapacavihini.

²³ Tacahe, emá Jesús máichapa emá Pedro:

—Piti téjecapavahi eta pipanereruhi. Pínajica eta juca tauriqueneanahi. Pivarahapuca pihapapicayare eta mapanereruhi emá Viya. Eta juca pipanereruhi tacuti eta mapanereruanahi emá Satanás, énapa ena machanerana —máichapa.

²⁴ Tásiha, máichahavivarepa víti:

—Nácani navaraha náehicanu, tacamunu náinajicava tamutu eta tihapapiricavaca eta náehisiranuhi. Nacaravahuyareva eta nímiturapiana. Nájaracavavare eta táimicapasiraina eta náehisiranuhi.

²⁵ Nácanisera téñamanahi eta náitaresira, tiávami-rahuanaya eta náehisiranu, énajivayare ticamitie-quenehavanaya eta náitaresira. Énasera nácani

yátupiquenehi tíjaracavana téhicanuana, tayana-pane táimicapacainepuca eta náehisiranuhi, éna títujicavanayare tíuchucuhanayare eta náítaresi-ranaya.

²⁶ Énerichuvare nácani tacañamararuanahi eta nacaímahaquenéiraya te juca apaquehe, tájina náímaequenehaimahi, taicha eta tacañamarasiravacahi tahapapiricavacahi tayehe eta náuchucuirayarehini. Taicha vahi máratahaimahi mácani achane mavachachahini eta máuricacarevaya te apana vítaresira.

²⁷ Taicha nuti Manerejirunuhi ema Viya nuchavayarehi. Námainapaipa eta majaraiva ema Tata, nuchachanénapaipavare ena ángleana. Te jena sáchezare, níjaracavacainapa eta náicuchianahi ena nuchanerana te tíurihi eta nacaemataneasiranuhi, te jácani náemataneanapachuhi.

²⁸ Nutupiruva numetacahe: Puítiripa éti, etiarhi enerejicavayare vahi épenavanémahi, ímahanumaya eta nucatuparahairaya aquenucanuirayare nuti Manerejirunuhi ema Viya —macahepa.

17

*Éma Jesús tihapamaichava eta máimahi
(Mr 9.2-13; Lc 9.28-36)*

¹ Tiuri, sáisipa sache eta vinasirahi ánaqui. Tacahe, tinaquicahavipa ema Jesús. Nacarinehi máma ema Pedro, ema Jacobo émapa ema Juan. Tiyananapa eta te étana cerro anuquehepana.

² Eta ánaqui, náimahapa tihapamaichavahi eta máimahi ema Jesús te namirahu éna. Eta mamira,

tétavicava eta tajararasira tacuti eta sache. Eta mamuiraha, tétavicava eta tajanunumesirahi, étapa eta tajapuvahi.

³ Tásiha, tiáramicareanavarepa tímerecavana ena apinana ajairana: ema víyarahaini Moisés émapa ema víyarahaini profetaini Elías. Téchajiricavanaripahi mayehe ema Jesús.

⁴ Tásiha, ema Pedro tímisiapavapa téchajicapa. Ánipa macahe:

—Tata Náquenu, tétavicavapa eta viúricacareva eta viávihairahi eta áni. Tiúrihipucaini vépiya-recahini eta epenahuinapachuhini. Pipenahui-narichuhini píti, mapenainarichuhivaréni ema Moisés, émapaini ema Elías —macahepa.

⁵ Tacahe, téchejicaichaha ema Pedro, tiáramicarepa eta úcaji táepacumurihahi éna. Tétavica-vahisera eta tajanunusirahi eta úcaji. Nasamavarepa eta mahu ema Viya tayehe eta úcaji. Ánipa macahe:

—Ema maca, éma yátupiquenehi nuchicha némunariquenehi. Tétavicavahi eta núrismurevahi máicha. Éma esuapayti, mapenainarichuhivarare —macahepa.

⁶ Eta nasamirahi ena vichamuriana, tipicanarinehi. Tépuyucanapa titsiucapairicanapa.

⁷ Tásiha, ema Jesús témeñahavapa eta nayehe. Máemamasicavacapa. Máichavacapa:

—Échepuca, nuchichanaveana. Vahi ecupica — máichapa.

⁸ Tacahe, te téchepucanapa éna, nájinaripahi éna apinana náimahaqueneanahi. Macarinehi ema Jesús.

9 Te tichavanapa tayehe eta cerro, ema Jesús mametacavacapa vahi nacumetajiricahini eta juca náimahaquenehi. Tiámainucava te máechepucapaini te máecari éma.

10 Tacahe, nayaserecapa ema Jesús:

—Ena escribánoana eta náimiturapihi, náechajisihahi eta machavirayare títareca ema víyarahaini Elías, tínapucayarehi eta máimeresiravayare piyehe piti Cristo. ¿Énapuca téjcapavanahi ena escribánoana? —náichapa.

11 Ema Jesús majicapavacapa:

—Yátupi ema víyarahaini Elías títecapayarehi, máetupiripanayarehi tamutu.

12 Nútisera nutupiruva numetacahe: Títecaripahi ema Elías, váhisera náimatihini ena escribánoana. Váhivare najacapahini éma ena tuparairucana. Nacatianacahi nacapacahi éma. Ene nucaheyare nuti Manerejirunuhi ema Viya, ticatianacuanayarehiva, éneyaréichuvare ticapacuanayare —máichapa.

13 Tásiha, ena vichamuriana náechapa eta máechajisihairahi ema Jesús ema Juan Tícachasiricarahihi.

*Ema Jesús macanaraca ema amaperu mávaháruhi ema éreana
(Mr 9.14-29; Lc 9.37-43)*

14 Tacahe, te tichavanapa éna tayehe eta viávihihi víti énapa ena achaneana, témeñahavapa ema émana achane mayehe ema Jesús. Tépuycapa te mamirahu. Máichapa:

15 —Picatajicanu, tata, pímicatacanu. Picanarasinanuini ema maca nuchicha. Tétavicavahi eta

macatajivairahi. Tacaeharipairica te tanahaca eta majuma. Tatiarihi te táquipaica te une, téhepuca yucu.

¹⁶ Námaripahinéni nayehe ena pímitureana, váhisera náratahahini nacanaracahini éna — máichapa.

¹⁷ Ema Jesús máichahavipa:

—¡Tétavicava emasuapajiraivavaca eti achaneana! ¡Cúverarecachasicáini eta nucamichirahenahini! Iáma ani ema amaperu —máichapa.

¹⁸ Tacahe, ema Jesús, muraca eta máévata-sirahi ema éreana, máinajiacapa ema amaperu. Enevanepa tinaracavanehi éma.

¹⁹ Tásiha, te táequenepa, víti víputsiacavapa ema Jesús, viyaserecapa:

—¿Tájahapuca tacayemahi eta vahi váratahahini vicuchuca ema éreana mayehe ema amaperu? — víchapa.

²⁰ Ema Jesús tijicapahavipa:

—Eta tíchahi éti vuíchaha yátupinahini ácasiñavahini me Viya. Nutupiruva numetacahe: Te yátupi quenelahini ácasiñavahini mayehe éma, eratahayarehini. Váhinéni tácomesahini ichapenahini eta ecasiñavairahi. Tayanapanepuca ánichichainaichu eta ecasiñairavahi, tacutihupucaini eta táquichicha eta mostaza, tamuturihini erataha. Étaripa eta jácani cerro ávarahahini ecayejeca, eratahayarehi. Te íchapuca: “Piyejecava eta te juca. Piyana ánaquipana”. Tásiha, tiyejecavahini éta. Jéhesare, tájina tacucajerarajihini eyehe.

21 Étasera eta juca, muracapanahi ema éreana ema tiávahácahi ema maca amaperu. Eta vicuchusira, tavaraha víchanumayare eta ayuna étapa eta viyujaraca —máichahavipa.

Tiápechavavare ema Jesús máimereucha eta máepenirayarehi

(Mr 9.30-32; Lc 9.43-45)

22 Tacahe, eta vipaisirapahi tayehe eta avasareana eta te táunavahi eta Galilea, tiápechahavivarepa timetacahavi ema Jesús eta máepenirayarehi. Ánipa macahe:

—Nuti Manerejirunuhi ema Viya, járajapainapa eta sácheyare tíjararecanuyare mácani achane nayehe ena ticitianacuananahi. Ticaratacuanayare éna.

23 Ticapacuanayareva. Néchepucayaresera te mapanaquenena sache —máichahavipa.

Tacahe, eta visamirahi, ichaperinehi eta véñamiravahi víti.

Ticavacha eta impuesto tayehe eta Templo

24 Tacahe, te vítecapapa tayehe eta viávasa Capernaúm, natiarihihi ena ticobrarecarahiana eta impuesto tayehe eta Templo. Nárajapapa náechajipanahi ema Pedro. Nayaserecapa:

—¿Mavachachapuca ema eyehe máestro éti eta impuesto tayehe eta Templo? —náichapa.

25 Ema Pedro majicapapa:

—Mavachacha —macahepa.

Te visiapayarepa te peti, ema Jesús máechajicanumapa ema Pedro. Ánipa macahe:

—¿Tájaha picayema, piti Pedro, nájahasica tatuparacahi navachachayare eta impuesto

mavarahaquene ema mácani rey? ¿Énapuca ena machichaqueneana, énapuca ena machanerana? —máichapa.

²⁶ Ema Pedro majicapapa:

—Ena machanerana.

Tásiha, ema Jesús macahepa:

—Tiuri, viti machichahavihi ema Viya. Vahi tatuparacahini vivachachahini víti eta juca impuesto.

²⁷ Vinaquicasera eta impuesto apaesa tacuija tacucayemacare nayehe ena achaneana. Piyana-yare pénica eta jima te cáquiure. Te piáquijiecapa eta pénirave, eta títapuca jima tacaratacaya eta pénirave, tatiarihiyare eta plata te tajaca. Pivehainapa eta reale, tásiha taratahayare tavachacha eta nuyehe parte núti, étapa eta piyehe píti — máichapa.

18

¿Nájahapuca ema apóstole ticapichupana?

(Mr 9.33-37; Lc 9.46-48)

¹ Tacahe, te jena sácheanahi, viyaserecapa ema Jesús:

—¿Nájahapuca ema ticapichupanaya viyehe víti te táitecapapa eta sache aquenucaviraya? — vicanaquicasera eta impuesto apaehepa.

² Tacahe, máichuhapa ema Jesús ema émana amaperuchicha, macatupihapa te vimirahu.

³ Máichahavipa:

—Nutupiruva numetacahe: Ínajicayare eta ecasiñavavaisira. Echávayare ecutiyare ema maca amaperu, apaesa ítujicava esiapa ecachanenu tayehe eta néjasihayare.

4 Nácani navarahahi ticapicahupananayare te jena néjasihayare núti, tacamunu mánsuanayare. Vahi máitucaimahi tiácapauchava.

5 Tacutiquene nácani tijacapanayare ena amaperuana níchavenénahi núti, ena nani yátupihí náimereca eta náemunasiranuhi núti, taicha tímicutijiricavahi nútinahini najacapa.

Ichape eta máicuñayare mácani tímiaquipaica te pecatu éna amaperuana

(Mr 9.42-48; Lc 17.1-2)

6 Tacutiquene mácani tiáquipaicaya ema émana amaperu téhicanuhi, tiúripanahipucaini máepenahini mativainahini éma. Váhirichupucaini macucaicuñahini, taicha vahi macuaquipaichahini ema amaperu tayehe eta pecatu.

7 Taicha muracayare eta náicuñayare nácani tímiaquipaicanayare ena achaneana. Yátupi vahi téjiacavaimahi eta tímiaquipaicaya ena achaneana tayehe eta pecatu. Ichapesera eta náicuñayare nácani ticatapuravanahi eta náimiaquipaisirahi ena achaneana tayehe eta pecatu.

8 Eta tacahe, te táimipecurachahepuca eta evahu, étapuca eta ívapeana, tiúripana eyuchatica, iáquijica; apaesa vahi tacuimiaquipaicahe tayehe eta pecatu. Tiúripana táejiacava eta iáquehe eta esiapirayare te anuma, váhisera tacumutuhi tasiapa te yucu eta iáquehe.

9 Étaripavare eta iúquiha, te táimiaquipaicahepuca tayehe eta pecatu, tavarairahi táimahayare eta tauriqueneana tájiparacana, tiúripana evecuhauquichava iáquijicaya. Taicha tiúripana eta ejacapacarehi éti eta esiapiraya te

anuma tayanapane tájeiacavapuca eta iúquiha. Páurehesamisera éti, te náepujuquichahepuca te yucu infierno, tamutuyare eta iáquehe.

Ena Jesús máimicutiarachinahi te témitiaca étana uvesa

(Lc 15.3-7)

¹⁰ Vahi ecuepuru ena amaperuana. Numetacahavane: Nararihi ena ángeleana tijaneacavacahi éna. Títupajjiacavanahi eta nacatiuchiravacahi ena amaperuana, máicha ema Viya.

¹¹ Nuti Manerejirunuhi ema Viya, eta tímitecanuhi nucuchucuhayare nácani tiávacuhanahi táíñehiquene eta náitaresira.

¹² Esamanuchaha. Nímicutichinaheyare puiti. Matiarihi ema émana achane. Ticayehe eta cien uvesana. Te témitiyechapuca eta étana, ema achane tiyanayarehi matanuca eta táemitiaruhi. Eta máeñamiravahi, manaquicayarepa eta apamuriana noventa y nueve te majanearesihahi.

¹³ Te máichimavapa, tichavapa. Tétavicava eta máurisamurevapaipahi eta mámirapaipahi eta táejaruvahi.

¹⁴ Ene macahe ema Tata Ecaiyaquene éti, ema tiávihahi te anuma. Vahi mávarahahini náemitia-cahini ena nani amaperuana.

Tatuparaca vipardonacha ena téjecapavana eta viyehe

(Lc 17.3)

¹⁵ Te tatiarihipuca eta máejecapiravahi ema piparape eta piyehe, tituparacavi piperdonachayare. Tásiha, piconsejachayare éma, píputsiacayare éma eta pimetasira eta

máejecapiravahi. Te tisuapavihi éma, tájinapa íchiravaimahi. Tiúrinapa eta itaresirana.

¹⁶ Téhesera te vahi macusuapavi, pitanucayare apinanaina ena piyeheanayare testigo apaesa tasuapacarepa eta piconsejarapiyare.

¹⁷ Te vuíchaha macusuapavi, pimetacapa namutu ena pichamurianahi picatupihapa te nami- rahu. Téhesera te váhiquenechapuca macusua- pahe, tímaticaréinapa éma eta mamasuapajiraivahi me Viya. Vaipa ecuimisiapava mayehe, taicha eta mamasuapajiraivahi.

¹⁸ Nutupiruva numetacahe: Te ecurujicacahi, te ímahahi eta mamasuapajiraivahi, emetacayare éma vahi táepahahini eta mapecatura. Tanasi- richuhi. Émaripa ema Viya, máimararacahi eta evarairahi etupirica éma. Téhesera te máeneucha- vapuca, emetacayare éma eta táepahairaripa eta mapecatura. Ema Viya, tiúriripa eta máimaira.

¹⁹⁻²⁰ Énerichuvare te etiarhipuca éti te juca apaquehe apinahehi, mapanahehipuca ecuruji- cacahi te níjare núti, nutiarihiyarechuhivare núti te emuri. Tásiha, te étanaichuhi eta epanereruhi, ticuticacahi eta eyaseserepi te mayehe ema Tata, éma tíjaracaheyare —máichahavipa.

²¹ Tásiha, ema Pedro mapauchapa, mayasereca- yarehi ema Jesús. Ánipa macahe:

—Tata, ¿áyahepuca tatuparaca nuperdonachaya ema nuparape, te máejecapava eta nuyehe? ¿Táuricapuca siéteheyare eta nuperdonachirayare? —macahepa.

²² Ema Jesús majicapapa:

—Vahi tácarichuimahi siétehéinarichuyare eta piperdonachirayare. Tímiyanavayarechucha eta piperdonachiranayare. Vahi pitupachaimahi — máichapa.

Emá Jesús máimicutiarachina emá achane máuriraha vahi máitucaimahi maperdonacha emá maparape

²³ Nuti Manerejirunuhi emá Viya nucuti mácani rey rícoquenehi te mavarahahi máechayare eta nanteveana ena mamusurana.

²⁴ Tásiha, námapaipahi emá tétavicavahi eta manteve. Tisintevepanahi éma.

²⁵ Tásiha, emá achane musu, tájina maviyahini mavachachihahini emá máquenuhi. Tacahe, emá rey macavanairipipa macaijararecasi, namutu esu mayena énapa ena machichanaveana, étapa eta macayehequeneanaini te mapena, apaesa mavachachahini apaesachichainarinehini eta mantevehi.

²⁶ Tásiha, emá achane musu tépuyucapa te mami- rahu emá máquenu. Ánipa máicha: “Tátachicha, picatajicanuhini. Picuchapanuini. Te nítucavapaini, nuvachachapaini tamutu eta nunteve piyehe” macahepa.

²⁷ Jéhesare, emá máquenu majapanupa. Maperdonachapa tamutu eta mantevenihi. Macaiticapa.

²⁸ Vuíchahasera táyerehini eta máchusirahi, mácapajicapa emá apana achane ticantevehi eta mayehe. Macompañeroinihivare. Váhinéni camurinahini eta mantevehi. Macaratachisera, macobrachapa. Masemaracapa macapitinucapa. “Pivachachanu puítirichu” máichapa.

²⁹ Ema achane ticantevehi tépuyucapa te mami-
rahu. Mayaseacapa: “Picatajicanu, picuchapa-
nuchaha. Te nítucavapa, nuvachachavipa”.

³⁰ Váhiqenesera maperdonachahini. Máimica-
siapapa te cárcel, mavarairahi mavachachavane-
yarehini eta mantevehi.

³¹ Tacahe, te náimahapa ena apamuriana
machamurianahi, ticatirinehi te nasamure
eta náimairahi ema nachamuri présuiraipahi.
Tiyananapa nametacahi ema náquenu tamutu
eta máichavaquenévahi ema nachamuri.

³²⁻³⁴ Tacahe, ema máquenuhi máimichuhapa ema
tipresurecainihi. Ichape eta masemanevahi.
Ánipa maicha: “¡Piti máeperajitataji musu!
Váiparinehi péchavahini eta nuperdonachiravihi
eta pinteve ichapequenehi. Taicha eta
piyaseasiranuhi, nuperdonachavihi. Piúriháinehi
pájapanuhini píti apanavare ema pichamusuvahi,
tácutihini eta nuperdonachiravihi núti” máichapa
ema rey. Tásiha, macavanairipipa náicuñaca, étapa
mavachachayarehi tamutu eta mantevehi.

³⁵ Tacahe, ema Jesús te títapiricapa eta juca
máimiturapiana, ánipa macahe:

—Ene máichaheyare ema Tata Nucaiyaquene éti
apanavare, te vahi ecuituca eperdonacha nácani
eparapenaveana nájecaparuvanahi eta eyehe —
máichahavipa.

19

*Ema Jesús tímiturecahi máechajisihahi mácani
achane tínajicahi esu mayena
(Mr 10.1-12; Lc 16.18)*

¹ Te tamutupa eta juca máimiturapianahi ema Jesús, viúchucapa te Galilea. Viyanapa tayehe eta Judea. Viánuecapa eta cajacure Jordán te tinapaicahi te táuchusine eta sache.

² Camuriana ena achaneana tiúrujicavanahi. Ánaqui macanaracapaipavare ema Jesús ena nacajumaqueneana.

³ Tásiha, títecapanapa ena apamuriana fariséoana. Napauchapa ema Jesús. Natanucahi eta tiviuchayarehi éma. Ánipa naicha:

—Vivaraha pimetacahavi ¿te táuricapuca máinajica ema achane esu mayena taicha jácani tájiparacana? —náichapa.

⁴ Ema Jesús majicapavacapa:

—Németeaca vahi ácaicutiarahi eta échajicuirá eta Sagrada Escritura. Te tépanavainapa acane, ema Viya máijaracahi ema achane ésunayareichuhi esu mayenayare. Esu esena émanayareichuvare ema suímayare.

⁵ Ani tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napenana ena ticachichana. Énajivainapa títáticacanayare. Eta navehacacairahi, tímicutijiricavaipa étanarinehi eta náqueheana” macahepa ema Viya.

⁶ Tacahe, tímicutijiricavainapa émanainarichuhini te peti. Étanarichu eta napanereruana. Vaipa táisapacarehini náinajicacahini. Eta tacahe, mácani máinajicahi esu mayena, éma máepuruhi eta juca mavanairipi ema Viya —máichavacapa.

⁷ Tásiha, ánivare nacahe:

—¿Tájahasica tacayema eta mavanairipihi ema víyarahaini Moisés ticaepiyayarehi eta ajureca suyehe esu esena eta máinajisirayarehi ema suima? —náichapa.

⁸ Ema Jesús majicapavarepa:

—Ena iáchucanaveanaini, te jácani eta nasemirahi, náinajicapa ena nayenana. Ema víyarahaini Moisés máisapahi tínajicacana táichavenehi eta tájinairahi eta náimitucacarevainahini, táetaviuchirahi eta namuracasamureva. Váhisera máuricahini ema Viya eta náinajicacahini.

⁹ Puiti nuvaraha numetacahe: Te máinajicapuca esu mayena mácani achane, te tájinapuca suíchiravainahini; tásiha, mavehapa esu apana esena, ticapecaturaipahi me Viya. Tacutiquene, mácani mavehahipuca súcani esena máinajiruhi ema suima, ticapecaturaipavare éma, taicha ésu, matiarihichahahi ema suímaquenehi — máichavacapa.

¹⁰ Tacahe, te víputsiacavavarepa, viti mayeheana apóstole viyaserecapa ema Jesús:

—Te énehipuca tacahehi eta juca, eta vivira viti ajairana esu esena, tiúripanaichuhipuca vahi vicutanuca esu esena —víchapa.

¹¹ Ema Jesús máichahavivarepa:

—Vahi ámutu árataha ímatiequeneha eta juca. Nararihisera tinerejicavanayarehi náimatiequenehayare máicha ema Viya.

¹² Nararihi ena ajairana vahi natanucaimahi esu esena nayenainahini, taicha eta náquehe vahi táichuhahini esu esena. Nararihivare ena ticavecuhianahi, navetijipa éna vaipa náesenicaimahi esu esena. Nararihivare ena apamuriana

tinerejicavanahi vahi natanucahini esu nayenainahini, navarairahi tacuija jácani tahapapicahini eta nacaemataneasiraya ema Viya. Ticunachacarepanayare ena tiratahanayare eta juca nájarsirava yátupiquene nacaemataneacaya ema Viya — máichahavipa.

*Ena Jesús mayujaraucha ena amuyana
(Mr 10.13-16; Lc 18.15-17)*

¹³ Tacahe, ena achaneana námavacapaipa ena amuyana eta mayehe ema Jesús. Navarahahi máemamahacavacayarehi éna, mayujarauchahivaréni. Vítisera viti mayeheana apóstoleana vahi vísapahini. Vicaichepaicapa ena tiámanapahi ena amuyana.

¹⁴ Ema Jesús máichahavipa:

—Ésamiricachucha ena amuyana, náitecaichaha eta nuyehe. Vahi ecucaichepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna —máichahavipa.

¹⁵ Tásiha, máemamahacavacapa ena amuyana, mayujarauchavacapa. Te tamutupa, viyanavarepa te apana avásare.

*Ena achane rico téchajiricava mayehe ema Jesús
(Mr 10.17-31; Lc 18.18-30)*

¹⁶ Matiarahi ema achane amaperu rico. Ma-pauchapa ema Jesús. Mayaserecapa:

—Tata maestro, piti piúriquene. ¿Tájahapucaini eta nícharacavahíni eta nítujisiravaina me Viya máichecuarquirénahini eta nítaresira? —máichapa.

¹⁷ Ema Jesús majicapapa:

—¿Tájaha tacayema pímiyarechanu “Piti piúriquene”? Mararihi ema Viya. Jéhevare

éma, tétavicavahi eta máurivahi. Téhesera te pivarahapuca pécha te apana vítaresira, pisuapayare eta vanairipiana —máichapa.

18 Mayaserecavarepa ema achane:

—¿Tájahasica eta vanairipianahi eta nusuapaqueneya?

Majicapavare ema Jesús:

—Eta juca eta mavanairipiana ema Viya: Vahi picucapareca. Vahi picuveha esu esena apayena. Vahi picuamereca. Nacuija pépiyéqueneruina.

19 Pipicauchayare ena ticachichaviana. Pémunacayareva ema piparaepiyahi, tácuti eta pémunasiravahi píti —máichapa.

20 Tacahe, ema achane majicapapa:

—Tamutu eta juca nusuapahi nítauchahi. ¿Tájahaserapuca eta jácani néjequeruichahahi? —macahepa.

21 Ema Jesús majicapavare:

—Te pivaraha pítaucha tamutu, piyana píjararecaya tamutu eta pímahaqueneana. Tásiha, píjaracavacapa ena páureana. Jáhevare éta, pijacapayare eta pímahaqueneyare te anuma táitsivayare. Te tamutupa eta juca, pítecavanepa péhicanu —máichapa.

22 Te masamapa ema achane eta juca macayemaquenehi ema Jesús, ichaperinehi eta mapaneresirahi, taicha mavayuchahi eta macaimahaquenerahi. Macatiequeneharinehi tamutu. Tiyana tipanererecapaipa.

23 Tacahe, ema Jesús máichahavipa viti mayeheana apóstole:

—Nutupiruva numetacahe: Yátupiquenehi máitujihí eta nájarasiravainahini eta náhisiranuinahini ena rícoana eta nasiapirainahini te anuma.

²⁴ Esamanuchaha. Eta juca tímicutijiricavahi eta vipera camello, máitujihí tánucuhahini te támicuejehe eta parirapa. Ene nacahehi ena rícoana —macahepa.

²⁵ Eta visamirahi viti, viáraminehi. Víchacapa:

—¡Tétavicavahi eta tamáitujicacarevahi! ¡Nájina títujicavaimahi náuchucuhahini!

²⁶ Ema Jesús tímararacahavipa. Tásiha, máichahavipa:

—Nájina émanaina achane émajivainahíni ticuchucuhava. Émasera ema Viya, macarichu marataha ticuchucureca. Taicha tájina máemejerachaquenénahini ema Viya. Tamutu marataha —máichapa.

²⁷ Ema Pedro máichavarepa:

—Vítisera, Tata, vinaquicahi tamutu eta vicayehequeneanahi, vivarairahi véhicavi. ¿Tájahasica eta vímahaquenéya? —máichapa.

²⁸ Ema Jesús majicapavarepa:

—Nutupiruva numetacahe: Járajapayare eta sáchevayare, tacaitsivairayare tamutu arairuya. Tásiha, nuti Manerejirunuhi ema Tata néjacainapa te tajarahiquenehi trono. Tásiha, eti éhicanuanahi éjacainavarepa tayehe eta dócequene trono. Ecavanairipinapa nayehe ena dócemuriqueneana vijaneanana israelítana.

29 Tásiha, emutu eti enaquicanahi eta epenana, ejunijicahivare ena ticachichaheana*, ena eparapenaveana, ena echichanaveana, eta eyehe apaquehe, táichavenehi eta éhisiranuhi puiti, tiápajucavainapa camuripanayare ena ejaneana-nayare étapa eta ímahaqueneanaya. Énerichuvare táurivayare eta ítaresira máichecuaraquirenapa.

30 Maverahesera eti etiarhiqueneanahi puiti, váhirichuhi ecapicahuhini. Te jena sáchezare, ichapepanainapa eta ecapicahuiraya. Ena puiti ticapicahuanahi, te táitauchavapa te jena sáchezare, énapavainapa téquenehanayare.

20

Ena Jesús máimicutichahi ema achane rico tiuri eta mavachachira ena ticaematanezechana

¹ Te jena sáchezare te níjaracahénapa eta ícuchiyare eti nuchanerana, tacuti eta mavachachirahi ema émana achane ticayehe eta ichape quinta úvaquiji nayehe ena ticaematanearahiana. Ema maca mayatiruhi tipaica matanuca ena achaneana ticaemataneanayarehi mayehe. Tírerecanayarehi eta uva.

² Te tíucavapa ena ajairana, mametacavacapa eta mavachachirayarehi étana reale te sache. Tiúrihi eta mavachachiravacahi. Mavanecavacapa tiyanana tayehe eta náireresihayarehi.

* **19:29** Te jácani apanana versiónéana, tatiarihi te juca lista eta táechajiriruva “ena nayanana”. Tájinasera nalistanahini te libro antivupanahi. Eta tacahehi, vímatiequeneha vahi manacahini ema Mateo. Mácani apana achane mavejuchahipuca te Lucas 18.29.

³ Tásiha, macamunuichahava ena apamuriana achane. Te las nuévepa sache, tiyanavarepa te plaza. Máimahainevare ena apamuriana ajairana máematanereanahi.

⁴ Máechajiacavarepa eta náireresirayarehi. Mametacavacavarepa eta táurivayarehi eta mavachachirayarehi. Tiyananavarepa éna, tírerecanahi.

⁵ Te las dócepa sache, tiyanavarepa matanuca ena apamuriana. Títucavavare, máevatomurihavare tírerecanayare. Te las trespa sache, tiápechavavare tiyana títucavavare ena apamuriana, énerichuvare tírerecanayarehi.

⁶ Te las cócropa sache, tiyanavare tiúchuchahi tayehe eta plaza. Títucavavare ena apamuriana ajairana máematanereanahi. Tásiha, máichavacapa: “¿Tájaha tacayema tájina ématanenahini puiti jena sache?”

⁷ Éna najicapapa: “Nájina náechejiacahavihini”. Tásiha, ema máichavacapa: “Eyana éti apanava írereca ánaqui te nuyehe quinta úvaquiji”. Mametacavarepa eta táurivayarehi eta mavachachiraya.

⁸ Tacahe, te yátipa, mametacapa ema mayehe empleado máichuhavacapa namutu, mavachachavacayarepa. Mavarahahi náinapuca nacavacha ena náequenereruanahi ticaemataneana. Nasapihapa téquenehanahi ticavachana ena náinapureanahi.

⁹ Tásiha, ena nasiapaqueneanahi te las cócropa sache, mavachachavacapa ema achane eta étapevacahi eta reale, tacutirichuhi eta navachahi ena ticaemataneanahi tamutu sache. Énapa ena nasiapaqueneanahi te las trespa sache, éneri-

chuvare eta étapevaca reale eta navachahi.

¹⁰ Tacahe, te ticavachanapa ena náinapureanahi tisiapana, náimahapa éna tacutirichuhi eta navachanahi ena náequenereruqueneanahi.

¹¹ Tásiha, tisemanapa mayehe ema náquenuhi.

¹² Ánipa nacahe: “Ena nani náequenereruanahi títecapana, vicutivachavacaichuhi eta navachahi, étanainehinéni hora eta nacaematanerahi. Tacutirichuhisera eta vivachahi víti vínapureanahi. Váhiquene táuricaímahi eta juca, taicha ichapemurihi eta vicamichirahi víti eta táijureva muracaquene eta sache. Táurica vicachuricavacayarehini éna eta navachahi” nacahepa.

¹³ Émasera ema náquenu majicapavacapa: “Váhira nucaetemahémahi éti. Énaripa ena náequenereruanahi, váhivare nucaetemavacaimahi. Tínunahi eta nuvachachirahehi étapevacahi eta reale níjaracahe. Vahi ecusema.

¹⁴ Ésamiricavachucha. Evehachucha eta juca evachahi.

¹⁵ Núti néchinava taicha nuyehericuhi eta plata. Nuvaraha ácuticacahini eta evachana emutu. ¿Éti ecapinarunupapuca eta núrivahi nayehe ena nani?” máichavacapa.

¹⁶ Ema Jesús macahevarepa:

—Ene nacaheyare te jena sácheyare, nácani náequenereruanahi téhicanuana, éna nasapihayare tínapucana. Tásiha, nácani náinapureanahi,

nasapihayare téquenehanayare* –macahepa.

Éma Jesús tíápechavavare máechajisiha eta máepenirayare

(Mr 10.32-34; Lc 18.31-34)

¹⁷ Tacahe, eta vipaisirapahi te achene te vicaijuhepa eta Jerusalén, típutsiacahavipa éma Jesús viti dócequeneana apóstoleana. Máichahavipa:

¹⁸ —Ímaha puiti, viyanainapaipa vicaijuheyare eta Jerusalén. Ánaqui nucaijararecasiyare nuti Manerejirunuhi éma Viya. Ticaratacanuanainapa éna tuparairucana.

¹⁹ Tímicapacuanayare taicha tíjararecanuanainapa nayehe éna suntaruana romanoana. Éna, nájina najapanuquenéna. Ticaecahinuanainapa. Tétacuanayareva. Tétatacuanayareva te crusu. Tásihasea, te mapanaquenéna sache, néchepucainapa te nécari —máichahavipa.

Ésu naena éma Jacobo émapa éma Juan suyaseaca éma Jesús eta macajupahavahini éna suchichanaveana

(Mr 10.35-45)

²⁰ Tásiha, témeñahavapa esu naena éna vichamuriana éma Jacobo émapa éma Juan, suámavacapaipahi éna. Tépuycapa ésu te mamirahu éma Jesús, suyaseacayarehi énaínahini majupahanainahini éna suchichanaveanahi.

* **20:16** Te jácani apanana versiónéana, tatiarihi eta juca táechajiriruvana “porque muchos son llamados, pero pocos son escogidos”. Tájinasera eta juca táechajiriruvanahi te libro antivupanahi. Éta tacahe, vímatiequeneha vahi manacahini éma Mateo. Mácani apana achane mavejuchahi eta juca te Mateo 22.14.

21 Éma mayaserecapa:

—¿Tájahasica ecamunu, nuchicha?

Ésu suíchapa:

—Nuvaraha pácchanéni ena nuchichanaveana tayehe eta péjasihayare picavacureraya. Náejacahini te pichacaya, eñi éñina te pivaure, eñi apana te sapa —suíchapa.

22 Éma Jesús majicapavacapa éna:

—Éti, vahi ímati tájahapuca eta nátajivayare nácani nujupahanayare. ¿Eratahayarepuca ecamicha eta íchavaquenévayare ecatajivairayare, ecutinuyarepuca eta nucamichirayare nútí? —máichapa.

Éna najicapapa:

—Virataha vicamicha —nacahepa.

23 Tásiha, máichapa:

—Yátupi ichape eta ecatajivairaya, vicuticacaya eta nacapasirahaviyare. Étapasera eta éjasirayare eta te nuchacaya, vaipa nútina necha nucaejacahehini. Ema Tata Nucaiyaquene, émahi tinerejicarehi ena nujupahanayare —máichapa.

24 Tacahe, eta visamirahi viti diésqueneana mayeheana apóstole, visemapa nayehe ena apinana.

25 Émasera ema Jesús máichahavipa. Ánipa macahe:

—Écharichuhi éti ena aquenucana tayehe eta avasare, muraca eta nacavanairipira. Énaripa ena tuparairucana, tétavicavahi tisuapacareanahi eta nacavacurerahi.

26 Váhisera ecucahehi éti nayehe ena echamuriana. Mácani tímerecavahi ticapichapana, tacamunuhi máitativacayare ena apamuriana.

27 Te etiarhivarepuca eti evarahahi ínapuca, tacamunuhi ímerecavaya navanaraheyarehi ena echamuriana.

28 Ecutinuyare nuti Manerejirunuhi ema Viya. Vahi étaina tímitecanu nucaitaticasihini. Nútiyarehi nítatihe. Énerichuvare níjaracavayarehi nímicapacava íchavenequeneanainahi éti camuriqueneanaya nucuchucureanaya — máichahavipa.

Ena Jesús macaimairiricavaca ena apinana púchuquiana

(Mr 10.46-52; Lc 18.35-43)

29 Tacahe, te vijunijicavarepa eta avasare Jericó, camurianahivare ena achaneana ticavasanahi tayehe, téhichavianahi.

30 Natiarihi ena apinana ajairana púchuquiana. Téjacanahi te achenechacaya. Te nasamapa ema Jesús eta mánuoirapahi, tipiararecanapa. Ánipa nacahe:

—¡Tátachicha! ¡Pítiqueneripa yátupiquenévihi Cristo! ¡Picatajicahavipaini pájapanuhavi!

31 Natiarihisera ena achaneana vahi náuricahini eta napiarasirahi ena púchuquiana. Navarahapa nacamatinaca. Énasera napiaracaichucha:

—¡Tátachicha! ¡Pítiqueneripa yátupiquenévi Cristo! ¡Picatajicahavipaini pájapanuhavi! — nacahepa.

32 Tacahe, ema Jesús eta masamiravacahi, titupihapa. Máichuhavacapa ena púchuquiana. Mayaserecapa tájahahipuca navarahahi.

33 Éna najicapapa:

—Tátachicha, vivaraha pípuhauquichahavini apaesa vímairiricapaini —nacahepa.

³⁴ Tacahe, ema Jesús majapanuvacainehi. Máemamahauquichavacapa. Enevanerinehi tímairiricana. Tásiha, téhichavianapa.

21

*Títecapapa ema Jesús eta te Jerusalén
(Mr 11.1-11; Lc 19.28-40; Jn 12.12-19)*

¹ Tacahe, te apanapa semana, viyanapa vicaijuhe te Jerusalén. Vétavajicapa tayehe eta avasarechicha Betfagé te tachacaya eta cerro ticaijarehi Olivoquiji. Ánaqui ema Jesús mavanecapa ena apinana vichamuriana.

² Ánipa maicha:

—Eyanayare tayehe eta te jena avasarechicha Betfagé. Ánaqui ímahayare ticaitihahi eta esena burrico, étapa eta tachicha te tachacaya. Evejapuacayare iáminanuyare eta áni.

³ Te natiarihinapuca náeñama, emetacayare eta nucamunuirahi núti. Vahi táyeréimahi vímichavaneyare —máichavacapa.

⁴ Eta juca tamutuhi títauchavapahi eta májuchaquenehi ema mácani víyarahaini profeta.

⁵ Ani tacahehi: “Emétaca ena achaneana ticavasanahi te Jerusalén, apaesa natsecava eta najacampirayare ema nayeheyare Rey. Emétacayare vahi nacupica, taicha tétavicavapahi eta mamansuvapahi, étapa eta máurivahi. Mámapahi eta iúritare-sirayare. Tímaticareyarepahi ema, taicha ticape-rayare eta burricuchicha” tacahehi eta Sagrada Escritura.

⁶ Tacahe, ena vanairucanahi náitauchahi eta nananahi mayehe ema Jesús.

⁷ Námapaipahi eta burricochicha étapa eta tachicha. Nanacamaequechapa eta náepacuhana. Tásiha, ticaperapa ema Jesús.

⁸ Camuriana ena achaneana tiácapanahi náepacapaicapaipa eta namuirihana. Ena apamuriana navehapa eta tapacaji eta cáchipaca. Nanacavare te mayanياهوarehi éma.

⁹ Ena apamuriana tínapumirauchanapahi énapa ena téquenehanapahi tipiaracanapaipa:

—Yare, Tata. Píti yátupiquenevihi Cristo réyvihi viyehe viti israelítana. Ichape eta vicunachiravihi píti. ¡Vanairucaquenevihi me Viya! ¡Asulupaya me Viya te anuma! ¡Viva ema Viáquenu! ¡Viva! —nacahepa.

¹⁰ Tiúchuchujicanapa ena achaneana te Jerusalén. Ichape eta náramirahi ema Jesús eta máitecapirahi. Tiyaserejiricacanapaipa:

—¿Nájaha ema maca achane?

¹¹ Ena apamuriana najicapapa:

—Émara ema profeta ticaijare Jesús, ticavasa te Nazaret te tinapaica te Galilea —nacahepa.

Ena Jesús macuchuchujicavaca ena tíjararecanahi eta sárareana, cáyureana te tajuhe eta Templo (Mr 11.15-19; Lc 19.45-48; Jn 2.13-22)

¹²⁻¹³ Tacahe, te apanapa sache, tiyanapa tisiapa ema Jesús tayehe eta te Templo. Máimahrinehi ena achaneana tíjararecanahi eta sárareana, cáyureana. Ena apamuriana ena tivacharecanahi. Natiarihivare ena títsiriperecarahiana eta naplataneana ena apavasanana. Máichavacapa:

—Ema Tata Nucaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihi eta nayujarasirareya ena achaneana” macahepa. Étiserá eti tiámerahiana, ecasiapavapa eta te juca. Emaeperajicapa eta tacapicahuirahi. ¡Eyana iúchucatataji! —máichavacapa.

Tásiha, macuchuchujicavacapa namutu. Máequehepuichinavacapa eta namesarana étapa eta nasiyana.

¹⁴ Eta mávihairahi te Templo ema Jesús, napauchapa ena púchuquiana énapa ena masariana. Tásiha, éma macanaracavacapaipahi.

¹⁵ Tacahe, ena amaperuana tipiararecanahi eta nacunachirahi éma, ánipa nacahe: “Pítiquenehi yátupiquenevihi Cristo manerejiruvihí ema Viya” nacahepa. Énaserá ena tuparairucana énapa ena escribánoana vaipa náuricahini eta náimairahi tamutu eta juca. Tisemanapa.

¹⁶ Náurujicapa. Navarahapa nacaichepaica eta máichaqueneanahi. Tásiha, náichapa éma:

—¿Tájaha tacayema písapa tipiararecana ena nani amaperuana? ¿Váhiyapa picamatinacavacapaini? —náichapa.

Ema Jesús majicapavacapa:

—¿Tájahasica táichavahi eta juca najirairahi? ¿Váhipuca échajicuha eta Sagrada Escritura eta táechajisihairahi eta juca najirasahi ena nani amaperuana? Ani tacahehi: “Piti, Tata, pinacasamurechavacahi ena amaperuana eta máejerarerayarehi naicha eta najirairayare eta táurinaquene alabanza” —máichavacapa.

¹⁷ Te títapiricapa eta majicapiravacahi, majunijicavacapa. Tiyanapa eta te avasarechicha Betania, étapa máimasinehi. Véhicapaichuhisera víti.

*Ena Jesús májiquiha eta higo taicha máhiriquirehi
(Mr 11.12-14, 20-26)*

¹⁸ Te apanapa sache, te yáticarahichicha, tiyanavarepa ena Jesús tayehe eta Jerusalén. Véhicapai-chuhivare víti apanava. Eta vipaisirapahi, técuhasamurepa éma.

¹⁹ Máimahapa eta yucuqui ticaijare higo te achenechacaya. Tiyanapa mapauchahi. Tájinasera táhinahini. Tapacajianachucha. Tásiha, máichapa ena Jesús eta higo:

—¡Pépiyainapa píti eta máhiriquereviyare! — máichapa.

Eta macaherahi, enevanepa tijiyujipa eta tapacajiana.

²⁰ Eta vímairahi víti, viáraminehi ichape. Viyaserecapa ena Jesús:

—¿Tájaha táichararacavahi eta táijahúchiravahi tiájiqui eta higo? —vicahepa.

²¹ Ena Jesús tijicapahavipa:

—Jéhesare nusamacarehi me Tata. Éti apana esamacareyareva, te yátupina eta ecasiñavairahi me Viya. Tájina émaitucaimahi. Eratahayare ícha, ecutinuya eta níchaquenehi. Eratahayareva ecayejecca eta cerro te apachacaya.

²² Tamutu jácani eyaseserepiyare eta mayehe ena Viya te eyujarasirana, ecajaracasiyare te yátupina eta ecasiñavairahi me Viya — máichahavipa.

Nayaserecapa ema Jesús nájahahipuca tituparac-
ahi éma

(Mr 11.27-33; Lc 20.1-8)

²³ Tacahe, visiapavarepa tayehe eta te Templo. Ema Jesús, tímiturecavarepa nayehe ena achaneana. Tacahe, napauchapa ena tuparairucanahi. Natiarihihivare ena tinerejicavanahi ena aquenucarahana. Ánipa nacahe:

—Píti, vahi vitupararuvinahini víti eta píchira eta júcana. ¿Nájahasica tímitucavihi? ¿Nájaha tituparacavihi eta juca píchaqueneana? —náichapa.

²⁴ Ema Jesús majicapavacapa:

—Núti apanavare nuvaraha nuyaserecahe. Ejicapanuyaresera apaesa numetacahe eta nucatuparahairahi eta níchirahi eta júcana.

²⁵ ¿Nájahapuca tivanecahi ema Juan eta máitesirahi máicachasirisirahi? ¿Émapuca ema Viya tivanecahi, émajivapuca eta máitesirahi? — máichavacapa.

²⁶ Váhisera náituruequenehahini eta najicapirayarehi. Tiácapaemajiricacanapa. Ánipa nacahe:

—¿Tájahasica vicayemayare eta vijicapirayare ema maca? Te vémunahacava vícha: “Mavaneruhi ema Viya”, éma macahénapapuca: “Tásiha, ¿váhiyapa esuapahini éma?” Téhesera vácahepuca: “Émajivaichucha eta máitesirahi”, ticauyayaceripa titupisicahaviana eta te márijahiana ena achaneana, taicha namutuhi náimijachahi ema Juan profetaquenehi yátupiquene, mavaneruhi ema Viya —téchajiricacanapa.

²⁷ Tásiha, náichapa ema Jesús:

—Vahi vecha víti —nacahepa.

Tacahe, máichavacapa éma:

—Énerichuvare núti, vahi numetacahémahi nájahapuca ema tituparacanuhi.

²⁸ Nuvarahasera nímicutiarachinaheyare. Nararihi ena apinana ticaparapecacana. Ticavanahipa ema émana mayehe ema naiya. Ánipa máicha: “Nuchicha, piyana picaematane puiti jena sache. Pírerecaya eta uva” máichapa.

²⁹ Ema machicha majicapapa: “Vahi nuvaraha nucaematane puiti juca sache”. Te tiyerepa, tiyanapanéni ticaematanehi.

³⁰ Tásiha, ema naiya mavanecavarepa ema émana machicha, mayanahini macaematanehini éma apanavare. Tásiha, ema amaperu majicapapa: “Tiuri, nuyanayare” macahepa. Váhinéni mayanahini.

³¹ Puiti nuyaserecaheyare: ¿Nájaha ema tisuapajirahihi mayehe ema maiya? —máichavacapa ema Jesús.

Éna najicapapa:

—Ema tínapuca, éma tisuapajirahihi.

Tásiha, ema Jesús máichavacapa:

—Nutupiruva numetacahe puiti. Nasapihayare ticachuricaheanayare tisiapana te anuma ena túhusianainihi énapa ena tisipecaturarahianainihi. Éti vahi esiapaimahi.

³² Taicha vahi esuapahini eta máimiturapiana ema Juan Tícachasiricarahini, váhivare ávarahahini étupiricavahini eta ítaresirana. Nararihisera ena tisipecaturarahiana, ichape eta nasuapirahi. Étisera, tétavicava eta emasuapajiraiva,

tayanapane ímahahi masuapacarevahi éma — máichavacapa.

Ema Jesús máimicutichina ena pártirárioana máurirahana

(Mr 12.1-12; Lc 20.9-19)

³³ Ema Jesús máichavarepa:

—Esamanu eta juca apana nímiturapiya. Nímicutichinaheyare. Matiarahi ema achane. Ticaevaruhi camuri eta uva te máesane. Manaruchapa eta masucure. Máepiyacavarepa eta nacaticaresihayare eta tachi eta uva. Máepiyacavare eta torre, nápanihayare eta najaneasirayare eta máevaru.

Tásiha, máijaracapa ena achaneana, pártirárioanayarehi. Tásiha, tiyanapa ema achane te apana avasare.

³⁴ Tacahe, te títecapapa eta caje tayairahi eta uva, máimivanerecapa ena mamusurana nayaseapanavacayarehi ena pártirárioanahi eta tatucachaqueneyarehi éma.

³⁵ Énaserá ena pártirárioanahi tisemauchavannarichucha. Nacaratacavacapa, náehapa ena vanairucana. Nacapacapa ema émana. Ema apana nayucaracapa te márijahiana.

³⁶ Tásiha, ema achane máimivanerecavarepa ena apamuriana. Camuripananapa. Váhiquenesera náijarahini, náehavacavarepa. Nacapacavacapa ena apamuriana.

³⁷ Tacahe, émajacaruvapa máevataca ema machicha. Máimijachaipahi émapapucaini napicauchahini.

38 Te náimahapa ema machicha ema ticayehe eta úvaquiji, ánipa nacahe: “Émainapapuca ticayeheyare ema maca. Yare, vicapaca apaesa tánasipa viyehe tamutu. Tájina máicharachavimahi ema achanénavaji”.

39 Tacahe, nacaratacapa ema machicha, nacuchucapa eta tayehe eta isaniti, nacapacapa.

40 Puiti, nuyaserecaheyare: ¿Tájahapuca máicharachavayare ema ticayehe eta úvaquiji ena pártirárioanahi máurirahana? —macahepa ema Jesús.

41 Éna najicapapa:

—Éma tise-mainapa. Vaipa májapanuvacaimahi. Macapapanavacayarepa ena pártirárioanainihi. Májaracainapa ena apamuriana pártirárioanayareva, nácani tipicaurahianahi, nájjaracahini eta mayehe parte —náichapa.

42 Tásiha, ema Jesús máichavacapa:

—Jehe tiúrihi eta ejicapiranuhi. Nuvarahasera epanerechinavapaini eta tacayemahi eta Sagrada Escritura, apaesa ácaicutiara éti. Ani tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaitecapahi eta te táicuchihi eta tatuparahahi. Tacapicahuquenehi puiti. Táitusiava, tétavicavahi eta vicunachirahi víti ema Viya” tacahehi eta Sagrada Escritura. Nuvaraha ecaicutiaraya.

43 Puiti numetacahe: Táichavenehi eta emasua-pajiraivahi, vaipa étiparacaimahi tayehe eta manairipi ema Viya. Ena tisuapajirahianahi, éna

ticavacureanayare te jena sácheyare. Énainapa téchanayare eta vanairipiana.

⁴⁴ Puiti, núti nucutihi eta ichape mari náepuruquenehi. Eti épurunuanahi, iáquipaicavayare évetutujicayare. Tichimaracahenapa eta muraca ecuñaraqui taicha eta emavarahairahi éhicanu — máichavacapa.

⁴⁵ Étasera eta nasamirahi ena tuparairucana énapa ena fariséoana, tisemanarinehi taicha tímatiacavanapa eta énairahi tayunacavaca eta máimicutichiravacahi ema Jesús.

⁴⁶ Navarahapa nacaratacayarehíni. Tipicacavanachuchasera nayehe ena achaneana taicha namutu nacunachahi ema Jesús eta émairahi vanairuca me Viya.

22

Ema Jesús tímicutichava mácani rey te máichuhavacapa ena machimaranaya, máichayarehi eta ichape piesta

¹ Ema Jesús máimitucavare ena achaneana eta apana máimicutichaquene. Ánipa macahe:

² —Ema Viya, macutihi mácani rey te máimiye-nachayare ema machicha, máichayarehi eta ichape piesta.

³ Mavanecapa ena mavanarana náichuhapanavaca ena machimaranaya. Váhisera návarahahini nayanahini éna.

⁴ Tásiha, ema rey máevatacavare ena apamuriana mavanarana. Ánipa máichavaca: “Eyanavare étipava ímitatajiricavaca ena níchuhaqueneanahi, náitecavanepa. Nucapecaripahí eta vaca

nirureyare nésinaruanahi. Tiúrinapa tamutu eta juca tinicacare. Énanecha nucuchapahi náitecavanepa” macahepa.

⁵ Énaserá ena máichuhaqueneanahi vahi nasuapahini. Nájina nayanahini. Ema émana tiyanapa te máesane. Ema apana máimahapana eta mayehe tienda.

⁶ Ena apamuriana nacaratacapa ena vanairucanainihi, náehavacapa, nacapacavacapa.

⁷ Tacahe, te máechapa ema rey, tise mapa. Mavanecapa ena masuntaruana nacapapanavaca ena ticapahianahi. Náijuchavare eta tamutu eta napenanaini.

⁸ Tásiha, máichavacavarepa ena apamuriana mavanaranahi: “Tiúripa tamutu eta juca tinicacareana. Váipasera nuvaraha náiteca ena náinapureanahi níchuhaqueneanainihi.

⁹ Eyana te tamutu cálleana. Íchuhavacayare namutu nácani ecainunaqueneanayare” máichavacapa.

¹⁰ Tacahe, ena mavanaranahi tiyananapa, náchehupanevacapa. Nacurujicavacapa namutu nácani nacainunaqueneanapahi: nácani achaneana tiúriana énapa ena súnsusurujuana. Camurianahi. Tínicanarinehi eta te távihayarehi eta piesta.

¹¹ Tacahe, ema rey tisiapapa, máimahayarehi ena machimaranahi. Máimahapa ema émana achane ema matiarihiquenehi vahi manacahini eta namuirihasa te ticaichuhasiana.

¹² Tacahe, máichapa: “Ajaira, ¿tájaha tacayema vahi pinacahini eta múiriare níjararuheanahi

tayeheyarehi puiti juca piéstayarehi?” Émasera ema achane vahi majicapahini.

¹³ Tacahe, ema rey mavanecavacapa ena mavanarana: “Eveha ema maca. Ítijivaucha, ítiápechavare. Íyaracuhapana te timapicu tayehe eta máiyauchiaavayare macapitiquiahechiavayare” macahepa ema rey.

¹⁴ Ema Jesús máichavarepa:

—Numetacahe puiti: Camurianahi ena níchuaqueneanapaipahi. Ánimurianarichusera ena títaurahianayare —macahepa ema Jesús.

Navaraha náemejecapavacha ema Jesús tayehe eta impuesto

(Mr 12.13-17; Lc 20.20-26)

¹⁵ Tacahe, eta nasamirahi ena fariséoana, tisemanarinehi. Tiyananapa ticurujicacanapa, navarahaipa náemejecapavachayarehi apaesa étainahipucaiini taviuchahini ema Jesús.

¹⁶ Tacahe, navanecapa ena nachamuriana énapa ena políticoana. Nayaserepanahi ema Jesús. Te náitecapauchapa, ánipa nacahe:

—Tata maestro, vímatihi eta tatupiruvairahi táurivahi eta juca pímiturapianahi. Yátupihi eta pímitusiravacahi eta táurinaquene achene ticaijuhe me Viya. Váhivare pipicacaracavahini eta péchajisihairahi eta náichavaquenévanahi nácani achaneana, tayanapanehi aquenucahi.

¹⁷ Vivarahahisera viyaserecaviyare eta pipaneruhi: ¿Táuricahipuca vivachacha eta viyasehana impuesto mayehe ema Presidente Emperador romano? Taicha víti, machanerahavihi ema Viya, ¿masi? —náichapa.

18 Émasera ema Jesús máimatiacavacapa eta taurivapahi eta napanereruana. Tacahe, máichavacapa:

—¡Apimirahetataji! ¿Tájaha tacayema evaraha ímiaquipaicanu?

19 Nímahaseji, iáminanu étapena eta reale — máichavacapa.

20 Eta nájarasirapa, éma máichavacapa:

—¿Nájaha ticaijare eta juca? ¿Nájahavare ticavasi-
simahi eta juca mirare eta te juca reale? —
máichavacapa.

21 Éna najicapapa:

—Mayehe ema Presidente Emperador —
náichapa.

Tacahe, éma máichavacapa:

—Tiuri, táuricahi íjaraca ema Presidente Emperador eta juca mayeherichuhi éma. Tásiha, íjaracavare ema Viya eta mayeherichuhivare éma — máichavacapa.

22 Te nasamapa ema Jesús eta majicapiravacahi, ichaperinehi titsirihacavanahi. Náramipa eta máitupajijiasiravahi. Tiyananapa tichavanahi.

Nayasereca ema Jesús náicharacavayarepuca ena náepenaqueneana eta náechepusirayare (Mr 12.18-27; Lc 20.27-40)

23 Étarichu te jena sache, nacahepaipahi ena saducéoana. Ena nani saducéoana, apanahivare eta náimiturapiana. Éna, vahi nasuapa eta náechepusirayare ena náepenaqueneana. Tiyananapa náimahapanahi ema Jesús. Natanucahi eta táetseraruvayarehi náicha. Ánipa nacahe:

24 —Tata maestro, ema víyarahaini Moisés, manaquicahi eta máechajiriruvahi eta viyehē: “Te máepenaēquenehahipuca ema achane esu mayena, tásiha nájinahipuca manaquiequeneruvainahini machichainahini; te matiarihhipuca mácani maparapehi, mavehayare esu machinenaequenéni, apaesa émainapuca macachicha eta suyehē, máitsivainahi ema maparapéni”.

25 Tacutiquene te juca vitaracu, natiarihinihi ena siétequeneana ticaparapejiricacana. Tacahe, ema náechavimuri títauchavapa. Máepenaēquenehāpasera esu mayena. Nájinahi machichainahini.

26 Tacahe, ema maparape máitauchavare esu machinenaini. Énerichuvarēsera máepenaēquenehavare, nájinavare máchichainahini. Ema émana maparape máitauchavare ésu. Énerichuvarē máepenaēquenehavare. Namutupa ena siétequeneana navehahi ésu, tásihasera náepenaēquenehapaipa, nájina émanainahini macachichahini eta suyehē.

27 Te táequenepa, tépenapa esu esenaini.

28 Tacahe puiti, te apanapapuca eta náitaresirayare ena nani, ¿nájahapuca ena siétequeneana ema yátupiquenehi suímaquenehi esu esena, taicha ena siétequeneana namutuhi suímanarihi? —náichapa.

29 Tásiha, ema Jesús majicapavacapa:

—Éjecapava éti. ¿Tájaha tacayema vahi ácaicutiarahini eta táimiturapi eta Sagrada Escritura? ¡Váhivare evarahahini esuapahini eta tamutuirahi marataha ema Viya!

³⁰ Ánaqui te apana náitairesiraya, vaipa nácamunuimahi esu esena. Énaripa ena esenana, váipavare nácamunuimahi ema ajaira. Nacutinapa ena ángeleana tiávihanahi te anuma eta namaepenacacairahi.

³¹ Éti váhivarepuca ácaicutiara eta yátupirahi eta vahi táepenahini eta náchanevana ena náepenagueneana. Váhipuca ácaicutiara eta máechajiriruva ema Viya. Ani macahehi éma:

³² “Nútira yátupiquenenuhi Viya, macasiñaquenehi ema Abraham, ema Isaac émapa ema Jacobo” macahepa ema Viya. Nutupiruvahi numetacahe: Ema Viya, éma téchahi eta náitairesirana ena téhicanahi, tayanapane tépenanaripa. Eta náchanevana, tímiyanavarichucha títareca te mamirahu. Éti, ichape eta éjecipiravahi —máichavacapa ema Jesús.

³³ Tacahe, eta nasamirahi ema Jesús, ichape-rinehi eta náramirahi ena achaneana eta máimiturapihi.

Eta tisuapacarepanahi te mavanairipiana ema Viya

(Mr 12.28-34)

³⁴ Tacahe, ena fariséoana eta náimairahi macamatinasiravacahi ema Jesús ena saducéoana, ticurujicacanapa éna.

³⁵ Tásiha, tiyananapa náemejicapavachayarehi ema Jesús. Ema émana ticainapucavapa, máestrohi éma tayehe eta nayeherepiana. Mayaserecapa éma:

³⁶ —Tata maestro, nuvaraha pimetacanuini ¿tájahapuca eta vanairipi tisuapacarepanahi

tayehe eta mavanairipiana ema Viya? — macahepa.

³⁷⁻³⁸ Ema Jesús majicapapa:

—Eta máechajiriruva ema Viya te Sagrada Escritura, ani tacahehi: “Yátupina eta émunasiranuina nuti Iáquenu. Iúnaca te esamureana. Yátupina eta ecachanevairanuina núti. Epanerecha eta nímiturapiana tamutu sácheana, yátiana”. Étara eta juca eta vanairipi tisuapacarepanahi. Éta tativayare ítauchayare, tínapuca tayehe eta apamuri vanairipiana.

³⁹ Eta apana táehiruhi eta juca, ánvare tacahe: “Pémunacayare ema piparaepiyahi, tácuti eta pémunasiravahi píti”.

⁴⁰ Eta juca apinaquene vanairipi, éta máehicahi ema víyahaini Moisés tayehe eta apamuriana mavanairipianahi éma. Énaripa ena apamuriana profetana, étarichuvare náehicahivare éna tayehe eta náimiturapianahi.

Yátupi ema Cristo mámaríéquenénihí ema rey David, Víyahivare éma

(Mr 12.35-37; Lc 20.41-44)

⁴¹ Tacahe, eta náurujiasiraichaha ena fariséoana te machacaya ema Jesús,

⁴² máichavacapa:

—Puiti, nuvaraha nuyaserecahe eti: ¿Tájaha tacayema eta epanereruana éti mayehe ema Cristo ema ecuchapaquenehi? ¿Tájaha eta ícutiarayare eta ímatirayarehi éma te máimerecavapa? —máichavacapa.

Éna najicapapa:

—Vímatinapa éma taicha tiúchucayare mámariequenyare ema víyaraháini rey David —nacahepa.

⁴³ Majicapavarepa:

—Yátupihi ema Cristo achanequenehi eta máimahi taicha mámariequenyarehi ema víyaraháini David. Nuvarahasera epanerechaya eta juca máechajiruvahi ema David te májurehi Salmo, ani macahehi:

⁴⁴ “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirañu ena ticitianacavianahi” macahepa.

⁴⁵ Ema David, eta máimijarechirahi ema Cristo “Tata Náquenu”, ¿tájahapuca eta macayemaquenehi? Núti németeaca Víyahivare ema Cristo. ¿Tájaha íchahi éti? —máichavacapa.

⁴⁶ Eta nasamirahi eta juca, nájina nájaracavahini najicapahini. Eta tacahe, nájina napatsicavahini nápechahini nayaserecahini.

23

Ema Jesús máimereuchavaca eta nájecapiravana ena fariséoana énapa ena escribánoana

(Mr 12.38-40; Lc 11.37-54; 20.45, 46)

¹ Tacahe, ema Jesús máichavacapa ena achaneana vítipa viti máimitureana. Ánipa máichahavi:

² —Ena escribánoana énapa ena fariséoana tímjachavana catuparahana eta navepaisirayarehi eta mavanairipiana ema Moisés.

³ Tacahe, éna esuapayare. Ítauchayare eta navanairipiana. Váhiserá ecuehica eta

nayeherepiana taicha ena apapipijichucha eta napanereruana.

⁴ Tacutiquene tipamicaheana ítauchaya eta camuriqueneana nayeherepiana. Éti, tájina eta eJapanucarehíni nayehe. Nájinapa tiratahaimahi títaucha. Apanasica éna, vahi náratahahini náitauchahini tamutu.

⁵ Tímijachavanahi tamutu náitaucha, navarairahi ticunachacareanayarehi nayehe ena achaneana. Tisiñavavaicanahi eta nájajusiravahi religiósana. Nanacahi te nanahuana eta ajureca navejurehi eta te Sagrada Escritura. Tacutiquene eta nacamuirihaira tísapepeacavanahi píncanillanahi. Ticamatsivacahi eta nacamuirihaira.

⁶ Ena nani, te ticaichuhasiana eta nanisiraya, éna tinerejisinavanahi eta tíurinapanána eta náejasihaya. Navarahahivare ichape eta napicau-chiraya ena achaneana te náurujisirarevanahi.

⁷ Tétavicavahi eta navarairahi ticapicahuana. Navarahahivare ticacajamicasianayarehi te jácani nácapajisiha ena náimitureana téhepahi calle.

⁸ Étiserá vahi ecujamuracha eta nacajamisirahe-nahini ena achaneana, étainapapucaini nacuna-chirahenahini. Taicha éti eparapejiricacahi, ecuticacahi te mamirahu ema Viya. Nucarichu núti yátupiquenénuhi eyehenuhi Maestro, nuti Cristo.

⁹ Váhivare “Tata Nucaiyaquene” ecuquicha nácani achaneana te juca apaquehe. Taicha mararihi ema yátupiquene Écaiyaquene, ema tiávihahi te anuma.

¹⁰ Váhivare tísapacarémahí eta náimijarechahe,

“Tata nuyehé jefe”, taicha nucarichuhi núti yátupi-
quenénuhi jéfenuhi eyehe.

¹¹ Nuvarahasera ítátijiricacayare. Nácani
títátirahiana, éna ticunachacarepananayarehi
eta eyehe.

¹² Énerichuvare nácani mánsuanahi, éna ticuna-
chacarepananayare me Viya. Nácanisera ticasi-
ñavavaicanahi ticunachavanapuca, tímitsiriáva-
nayare me Viya —macahepa.

*Éma Jesús mayunacavaca eta nájecapiravanahi
ena escribánoana énapa ena fariséoana*

¹³ Tacahe, títecanapa ena escribánoana énapa
ena fariséoana. Tásiha, éma Jesús máechajica-
vacapa éna, mayunacavacahi. Ánipa macahe:

—¡Éti escribánoana étipa eti fariséoana! ¡Mura-
cayare eta ícuñayare taicha eta apimirairahehi!
¿Tájaha tacayema ímijachavahi étí echa eta
tapaja eta anuma? Vahi ísapa nasiapahini ena
achaneana, nácani tivarahana tisiapana. ¡Étiripa
vahi ítujicavaimahi esiapa!

¹⁴ Jucarihi eta apana tiviuchahehi.
Tatuparacahi ejapanuyare ena tépenaimana
te váhipuca narataha navachachahini eta
nantéve. Étiserá everejicavacahi tamutu eta
nacayehequeneana. ¡Apimirahehi! Épiyacavahi
religiósohehi, íchahi iúpiemahi eta eyujarasira
te namirahu ena achaneana, evarairahi vahi
tacuimicaecherachava eta emaurivanahi.
Ichapeyare eta ícuñayare táicha.

¹⁵ ¡Jucarihivare eta apana tiviuchahehi, étí es-
cribánoana étipa eti fariséoana! ¡Muracayare eta

ícuñayare taicha eta apimirairahehi! Éti, tétavica-
cavahi eta éñamavairahi eta íturuca ena téhicana
eta ímiturapiana, eyanirahi te avasareana tiyere-
hiana. Tasapihahi ímitucavacahi eta nacutiheraya
eta evainarajivahi. Tiápajucava eta namaurivahi
ícha. Eta tacahe, ecachanevacayare éna te yucu
infierno.

16 Jéhevare éti ecaijare páurehe. Ichape eta
ícuñayare taicha eta ímiaquipaisiravacahi ena
ecutiqueneana púchuquiana. Éjecapavahi tayehe
eta juca ímiturapihi. Ímituca eta tájinahi eta
taviuchaimahi nácani najurachahi eta Templo.
Étasera te najuracha tayehe eta oro eta tiávihahi
eta te Templo, ticaviurevanainapa ícha éti.

17 ¡Tétavica-
cavahi eta emaecharaireva eti
púchuquiana! Eta Templo, étara tipicauchacare-
panahi tayehe eta oro tiávihahi tayehe.

18 Iápechavavare eta éjecapiravahi tayehe eta
apana ímiturapi. Éti íchavare: “Te náichapuca
nácani eta promesa, najurachapuca tayehe eta
náijuchirare eta sárareana, tájinaipavare ticaviu-
rémahi. Téhesera najurachahi tayehe eta nanaqui-
ruvahi te táinahu eta náijuchirarehi, étasera ticaviu-
revanaripa” íchahi éti.

19 ¡Tétavica-
cavahi eta emaecharaireva eti
púchuquiana! Eta náijuchirarehi eta sárareana,
étara tipicauchacarepanahi tayehe eta
enaquiruvanahi. Éta tímipicauchahi eta
enaquiruvanahi.

20 Taicha nácani tijurachanahi tayehe eta
náijuchirarehi, vahi tácarichuhini napicauchayare
éta, napicauchayarehiva tamutu eta námavahuana

tiávihanahi te náijuchirarehi.

²¹ Tacutiquene nácani tijurachanahi tayehe eta Templo, vahi tácarichuhini náichahini eta juramento tayehe eta Templo. Najurachahivare mayehe ema Viya tiávihahi tayehe.

²² Énaripa ena tijurachanahi tayehe eta anuma, najurachahivare mayehe ema Viya, taicha eta anuma étahi eta mávasa, étaipa eta máejasihahi ema téchahi tamutu.

²³⁻²⁴ ¡Jucarihivare eta apana tiviuchahehi eta tamuracavaya eta ícuñayare, éti apimirana! Éti ímijachavahi íminecapaequeneha ena ecutiqueneana púchuquiána tayehe eta títucacareana. Ímijachavahi yátupiquenehi eta religiósohéirahi eta epamisiravahi eta ítauchira eta vanairipi eta ecamavahaira me Viya eta diésmuri tayehe eta sucurecana. Ecunachacarehi taicha éta. Váhiserá epamicavahini eta táuriqueneana ticunachacarepanahi me Viya. Tatuparacahe emutu ájapanurahi; ecatiuchavacayarehi ena macatiuchavarahanahi; yátupina eta ítauchiraya tamutu eta íjarasiravahi; yátupina eta ecasiñavairaina me Viya. Tatuparacahehivare ecamavahu eta me Viya eta diésmuri. Éti éñamavahi eta ítauchirahi eta ánichichana, étasera eta tisuapacarepanaqueneanahi táuriqueneana, tasapihahi vahi esuapahini*.

²⁵ ¡Tétavicavahi eta apimirairahehi! Éti ímijachavahi yátupiquenehi religiósöhehi, ecañamaracavahi eta ímijaniravaya ítaucha eta eyehe-

* **23:23-24** Ani tacahe eta mayeherepi ema Jesús te máecha-jiriruva: “Eti ecatijsica eta chupi; ejiricasera eta camello”.

repiana. Étasera eta esamureana, tétavicavahi eta tachipejivavacahi taicha eta ecaetemaraivana étapa eta íjarasiravahi icha tamutu eta ejamurairaviana.

²⁶ ¡Tétavicavahi eta epuchuquiva eti fariséoana! Tamapurujihí eta religiósohéirahi. Tacamunuhi tativa esipaca eta esamureana, apaesa yátupinasarepa eta iúrivayare, tipachinainapa eta ítare-siraya.

²⁷ ¡Tétavicavahi eta ecatajivairaya, táichavenehi eta apimirairahehi, eti escribánoana étipa eti fariséoana! Éti ecuti eta covacha. Tiúrinahi te táinahu, téhesera te amahe távihahi eta máeperejiqueneana.

²⁸ Tacahehi eta ítairesirahi éti. Ticutimahinehi iúrihi te namirahu ena achaneana. Étasera te esamureana táurujsiavahi eta evainarajivana, tacutiquene eta apimirairahehi.

²⁹ ¡Páurehesamichapucaini eti escribánoana étipa eti fariséoana! ¡Ichapemuriquene eta eviurevanahi! Eti, ímijachavaipahi puiti ecunachacarehi eta evarairahi échapajirica eyeheheacahi eta náecariana ena profetanaini matapiravarequeneanahi, nacaparuanahi ena iáchucanaveanaini éti. Épiyacavahi yátupiquenénahini eta iúrivahi.

³⁰ Tásiha, ánivare ecahe: “Te vitiarihinari pahini víti eta acane te ticaparecanapa ena viáchucanaveanaini, vahi vicuimicasiapavahini tayehe éta” ecahepa.

³¹⁻³² Étijivapa ímereuchavahi eta apimirairahehi, taicha puiti éti epanerechahi ecapacanuya, tacutihi eta napanereruanahi ena iáchucanaveanaini.

Tásiha, ecuticacayare eta naviurevahi ena iáchuca-naveanaini.

³³ ¡Éti tachichanaveanatataji eta quichare, tétavicavahi eta evainarajivahi! ¡Váhiquene ticaiticahémahi eta ícuñaya te infierno!

³⁴ Nímicaecherachayare eta evainarajivahi. Nuvanecayare napauchahe ena nuchanerana. Éna, timetacaheanayare eta mapanereruana ema Tata. Tímitucaheanayareva tamutu eta nímiturapiana. Nasapihayare vahi esuapaimahi éna. Éna, yátupihí náituca. Émepururecayaresera éti eta náitupajijiasiravahi éna. Esapihainapa, éti ecapacavacainapa éna; ena apamuriana émétatacayare te crusu. Tásiha, ena apamuriana éstacavacainapa te iúrujisirarevana. Éhicarairicavacainapa te jácani avasareana najunaiyayarepahi.

³⁵ Tásiha, eta ecapasiravacainapa ena nuvanermanahi, étinapa tamuriacayare eta naviurevanahi namutu ena ticapacanahi ena achaneana matapiravarequeneanahi. Ema Abel máinapuiruhi nacaparuhi, máetaviuchainihi eta máuriva. Émapa ema máequenereruhi Zacarías (machichainihi ema Berequíás), ema nacaparuhi te tamirahu eta Templo. Camurianahisera ena apamuriana náumurivanainihi.

³⁶ Nutupiruva numetacahe puiti: Étinapa tamuriacayare tamutu eta náepeniranahi. Títecapainapa eta ícuñayare eti achaneana ítarermanahi puiti —macahepa ema Jesús.

Éna Jesús ticatisamurevahi táichavenehi eta na-

*masuapajiraivahi ena achaneana ticavasanahi te
Jerusalén*

(Lc 13.34-35)

³⁷ Tacahe, ema Jesús tiápechavava máechajicavacapa ena achaneana. Ánipa macahe, taicha eta macatisamureravahi:

—¡Tétavicavahi nucatisamureravahi ícha étisami eti tachichanaveanahi te juca viávasa Jerusalén! Ena iáchucanaveanaini, éna ticapapajicanahi ena profetana mavaneruanahi ema Tata. Puiti étipavapa evaraha ecutiya ena iáchucanaveanaini. Ichapemurihinéhi eta níchuirahéhi éti, iúrujiacanhini, tácutihini eta varayu te tacurujimuriha eta tachichanaveana eta te tapava. Váhisera ávarahahíni.

³⁸ Ímahainapasera puiti eta íchararacavayare. Ticaquipaicasiyare tamutu eta epenana, étiripa ticuchucaheanainapa.

³⁹ Numetacahevane puiti vaipa iápechavaimahi ímahanu, tiámainucavainapa te ítsivachapa eta epanereruana, evarairayare ejacapanu. Ecahénapa: “Ichape eta vicunachiravihi píti vanairucaquenévihí me Viya” ecahénapa.

24

*Ema Jesús máimereucharipa eta táquipaisiravaya eta
Templo*

(Mr 13.1-2; Lc 21.5-6)

¹ Tacahe, ema Jesús tiúchucapa tayehe eta Templo, tiyanayarepaini. Vítisera viti máimitureana vémeñahavapa eta mayehe. Eta

viáramirahi, vímechapa eta táurinaqueneana mari tayehe eta anuquehe peti te Témplosami.

² Émasera ema Jesús tijicapahavipa:

—Tamapurujiyare eta juca táurina eta pétisami ímahaquenehi puiti. Nutupiruva numetacahe: Járájapayare eta sáchezare ticaquipaicasiyare tamutu eta juca Templo. Téjanerepaicainapa tamutu eta juca táurinaqueneanahi ímahaqueneanahi puíti —máichahavipa.

Tatiarhiyare eta ecutiarareanaya te tánehipaicha eta táichecuraya

(Mr 13.3-23; Lc 21.7-24; 17.22-24)

³ Tásiha, viyanapa tayehe eta cerro Olivoquiji, víputsicavapa. Te vítecapapa, téjacapa ema Jesús. Tásiha, víti máimitureana viyaserecapa:

—Vivaraha pimetacahavi. ¿Tájamuhupuca eta náimiaquipaisirayare eta Témplosami? ¿Jararihiya-repuca eta ecutiarareyare eta piápechiravayare píteca, étapa eta táitauchirayare eta táequenereruhi mapanereru ema Viya? —víchapa.

⁴ Tásiha, ema Jesús máichahavipa:

—Ecuneuchavaicha yátupina, machu navayuacahe, taicha nárajapayare ena tépiyacavanayarepahi tímivasichavanayare nuyehe.

⁵ Nacaheyarepahi éna: “Nútiripa Cristo”. Nasapiha navayuacayare ena camuriana achaneana.

⁶⁻⁷ Énerichuvare esamairiricayare eta táehacairayare eta ichapequeneana avasareana. Ticanarajiricanainapa eta te avasareana tayerehiqueneana, énerichuvare ticauyacarenapa guerraina eyehe éti.

Váhisera ecuarameca eta esamairirisiraya, taicha ene tacaheyare eta táepaniravayare eta ecutiarareanayare. Vuíchahasera étaimahi eta táichecuiyare. Énerichuvare tatiarihiyareva eta ichape ecuhamuhuyareva te avasareana. Tatiarihiyareva eta ichape tayamurisirananya eta apaquehe te jácani távihanapahi táetupiaruyare.

⁸Tamutu eta juca ecutiarareanayare eta táepaniravayare eta nátajivanayare ena achaneana.

⁹Tásiha, eti nuchaneranahi, ticatianacahanainapa ena achaneana, táichaveneyare eta éhisiranuhi. Tipanajiricaheanainapa te tamutu avasareana. Ticaratacaheanayareva. Ticapacaheanayareva.

¹⁰Tásiha, nararihinapa camurianaya ena tínajicavanayare eta náehisiranuhi. Tásiha, ticatianacahanainapa éti yátupiquene eta éhisiranuya. Tíjararecaheanainapa éti.

¹¹Natiarihinavarepa nácani tépiyacavanayare mavaneruana ema Tata. Tamutusera eta náimiturapiana náepiyahiraivayarechucha, camurianayare ena navayuaruanayare.

¹²Énaripa ena arajuruana, tétavicavainapa eta namasuapajiraivaya, vaipa napicauchaimahi ema Viya. Camurianayare éna vaipa témunarahanáimahi.

¹³Étiserá nuchaneranahi, te ecamichahi tamutu, ímiyanavahivare eta éhisiranuhi te táitavapa tamutu, nucuchucuhaheyare núti.

¹⁴Énerichuvare, eti nuchanerana ecametarairuyare te tamutu avasareana, taicha nuvaraha náecha namutu ena achaneana. Ímitucavacayarehi eta najacapacarevahi me Tata namutu

ena téneuchavanahi, étapa eta apamuriana nímiturapiana. Te ítecapapa te tamutu eta avasareana, nápechavayare nuchava.

15 Numetacahevaneyare eta apana. Járajapayare eta sache táíñehiqueneyare. Tímercavaya ema achane váinarajiquene, máechajisihaquenehi ema víyarahaini profeta Daniel. Mavanecayare ena machanerana náechipejisirayare eta tacapicahuquenehi Templo, nacuchucavacayare ena téhicanahi ema Viya. (Nácani navaraha nacaicutiara eta juca, tacamunuhi ticaravahuanayare eta májurehi ema víyarahaini Daniel.)

16 Tásiha, te ímahapa eta juca, esamairiricapapuca, táuricapa etatajipa ejunavane, éti etiarihiqueneanahi te Judea. Ecaijuheyare eta te cérroana, étaina eyumursiavaina.

17 Nácani tiávihanahi te nayehe canchón te nasamairiricapa eta juca téchacarehi, táuricapa najunavanepa. Vaipa táuricahini nasiapanumahini te napenana, navehahini jácani náñamaqueneanainihi.

18 Nácani tachimararuanayare te vamáhi eta téchacarehi, táuricapa vaipa nacuchava tayehe eta avasare, tayanapane náñamahi eta nayereruvana.

19 ¡Páureanasami nácani esenana tachimararuanayare, nácani ticajarianahipuca, nácani esenana ticachichanahi eta amuya tiájicachaha!

20 Eta tacahe, eyaseacayare ema Viya tacuija

táichejicahe^{*}; váhivare tacuchimaracahe eta ichape tiquiva te achene te eyanapapuca ejuna.

21 Te jena sácheanayare, tétavicavayare eta nacatajivairayarehi ena achaneana. Tájina tácutimahi eta táíñehivayare eta nacatajivairayare, te táepaniravahi eta náitairesirahi ena achaneana te juca apaquehe. Te táequenénapa eta tíñehi, tájinainapa tácutimahi.

22 Nájina tacaitiruimahi eta nacatajivairayarehi ichape. Macaichecavaneyaresera ema Viya eta masemavahi ema maca achane váinarajiquene, mavarairahi ema Viya macuchucuhavaca ena machanerana manerejiruana, majapanuque-
neanahivare. Taicha te vahí macucaicheca ema Viya, máitamurihahipucaini macapapajicavaca namutu ena achaneana ema maca achane.

23-24 Énerichuvare te tánehipaicha eta juca, natiarihinapa ena tivayuarahiana tépiyacavanayare Cristo tímivasichavanainapa núti. Natiarihivare ena tímicutijiricavanayare profetana mavaneruinahini ema Viya. Áninapa nacaheyare: “Yare, éhicayare ema Cristo. Matiarhipahi te juca vitaracu”. Ena apamuriana ánivare nacaheya: “Náepiyahiraivahi éna. Ema Cristo mávihahi te viávasa víti”. Étisera vahí ecusua-pavaca. Eta navarairahi tivayuacaheanaya eti machanerana ema Tata, náituruequenehayare naicha eta ichapequeneana tiáramicareana ecutiarareanayare. Camurianasamiyare ena

* 24:20 Ema Jesús máechajisihahi eta ticasarahimuhu, tiquiv-amuhuhivare te jena mávasa Judea. Máechajisihahivare eta nayeherepi ena israelítana eta váhiquene náisapavahini tiyanana tipaicana te jácani sávarumuhua.

navayuaruanayare.

²⁵ Étisera vahi tivayuacaheanaimahi taicha numetacahevanehi puiti.

²⁶ Te náichahepuca: “Ímaha máenahi ema Cristo ánaqui te mávapahi apaquehe”, vahi ecuyana. Étaripa te náichahepuca: “Mararhipa jácani tayumururevaquenehi cuarto. Vicarichu viti vímatihí eta mávihahi”, váhiquenevare ecusuapavaca.

²⁷ Taicha te yátupinapa eta nítésirayare nútí, nucutiyare eta tájahúchirava títecapa eta térameca. Namutuyare ena achaneana te juca apaquehe tinecapanuanayare. Tacaheyare eta nuchavirayare nuti Manerejirunuhi ema Viya.

²⁸ Vahi ecueñamava távihapuca nítecapihaya. Nútí nítecapauchaheya te jácani íávihahi éti†.

*Eta machavirayare ema Manerejiruhi ema Viya
(Mr 13.24-27; Lc 21.25-33; 17.26-30, 34-36)*

²⁹ Tacahe, te táitavapa eta juca nacatajivairaya ena achaneana, enévanénapa témahainapa eta sache. Étaripa eta caje, témahainavarepa. Témiricanainapa eta jarairiquiana. Étaripa eta tiávihanahi te anuma vímaimahaqueneanahi énerichuvare tiyamuricanainapa, tiyejejecavanainapa.

³⁰ Tásiha, náimahainapa te anuma eta nícutiara nútí Manerejirunuhi ema Viya. Tíyahanainapa eta napisira namutu ena achaneana távacuanahi

† **24:28** Te máechajiriruvahi ema Jesús, áni macahehi: “Te jácani mávihahi ema máepenaquene, eta távihayare eta sipuquiana”. Eta juca mayehehi proverbio, tatiarihi eta tacayemaquenehi tayumurevahi.

eta avasareana te apaquehe. Tásiha, tímahanuanainapa núti. Tiámanuinapaipa eta úcaji eta núcupaisirayare. Tétavicavayare eta nujaraivayarépa, níñehinapaipa.

³¹ Nuvanecaya ema Arcángele, muracayare eta macachujairayapahi, apaesa ena ángeleana nacurujicainapa namutu ena nuchanerana nunerejiruanahi, tiásihanayare te tamutu eta juca apaquehe.

³² Tiuri puiti, nuvaraha nímicutichinahe eta jácani yucuqui. Eta táitsivachiravavacapa eta tapacajiana, te ímahapa eta tajimuyairapa eta tatavaqui, tiúchucayarepa eta tapacajianaya arairu, tímaticarehi tiánehiripa eta únemuhuirayarépa.

³³ Ene tacahehi, te ímahayarepa tacaecherapa eta júcana ecutiarareana, ímatiacainapa eta tánehirainapa eta nuchavira.

³⁴ Numetacahevanecha: Vuíchaha títavānaimahi ena achaneana náitareruaichaha te táitecapapa eta júcana ecutiarareanayare.

³⁵ Títavainapa eta anuma étapa eta apaquehe. Tativayaresera títauchava tamutu eta numetaruheanahi.

³⁶ Eta juca tiáramicareyarechucha. Nájina téchaimahi tájamuhuyarepuca eta táitauchiravayare, énaripa ena ángeleana vahi náechahini. Nútivanerécahipucáini néchahini. Macarichu ema Tata, ema téchahi.

³⁷⁻³⁸ Tacutiyare eta acane eta nájjahúchiravahi tépenana ena achaneana machamurianaini ema Noé. Ena nani tinicairihianarinecha, náematanerinecha térana, tímarerecanahi ena nachicha-

naveana. Vahi téñamavanaimahi eta náimairahi ema Noé eta masiapirahi tayehe eta ichapequene pacure.

³⁹ Tájina vahi natsecavahini eta táitecapauchirayarehi eta ichape une. Tacahe, eta táemirisirapa eta ichapequene tiquiva, tacapapajicavacahi namutu éna. Ene nacaheyare ena achaneana te jena sáchezare. Vahi natsecavahini tayehe eta nuchaviraya.

⁴⁰ Te jena sácheanayare, natiarihiyare ena apinana ajairana ticaemataneanahi te isaniti, ema émana tiáramicareyare tiára. Ema apana manasinapa.

⁴¹ Tacutiquene, apinanahipuca ena esenana cáemataneanahi tiyuvarecanahipuca. Énerichuvare esu ésuna tiáramicareya tiára. Esu apana sunasinapa.

⁴² Eta tacahe, etsecavahi ecauneuchava éti machu vahi ecunecapachava eta nítesirayarehi nuti Iáquenu.

⁴³ Nuvaraha ácaicutiaraquenéna. Machu ácutiriana mácani achane námeyeruhi ena tiámerahiana. Tájina máechapiavahini tájahapuca hóravayarehi eta náitecapauchiraya te mapena. Te máechapucaini, ticauneuchavaipahini éma, váipasare nacuameyechahini.

⁴⁴ Eta tacahe, éti ecuneuchavayare tamutu sácheana, taicha vahi échahini tájamuhuyarepuca eta nuchavirayare nuti Manerejirunuhi ema Viya, machu iáramecariana.

*Nararihi ena músuana tiúriana. Nararivare ena músuana máurirahana.
(Lc 12.41-48)*

45 Tiuri, nuvaraha nímicutichinaheyare eta apana. Macañárihipuca ema empleado máetaviuchahi eta máitupajijiasiravahi. Tisuapajirahivare éma. Ema máquenu tiyanayarehi te apana avasare. Táitusiava ema máquenu matuparacahi ema empleado eta máíjarasiraya eta tinicacareana ena apamuriana machamusuvanahi.

46 Tétavicava eta máuricacarevaya ema maca ticatuparahahi, te tamutuhi máítauchahi jácani machimapirana ema máquenu.

47 Németeaca, eta tamutuirahi tiuri eta machimapirahi, matuparacainapa éma téchayarehi tamutu eta máímahaqueneana. Eta tacahe, nuvaraha ácutipaini ema maca empleado tíúrihi eta máítauraivahi.

48 Téhesera váhipuca tiuri eta mapanereruana ema mácani empleado, máímijachaichucha tiyereyarehi eta máítecapirayarehi ema máquenu.

49 Tásiha, macaetemajiricavacapapuca ena machamusuvanahi. Máichapapuca eta piesta, tinahacavapa téra macachanevacahi ena macutiqueneana térrarahiana, téniricapa.

50 Tásiha, vaipa manecapauchavahini te títecapapa ema máquenu. Machimaracapa ema empleado eta mamapachichijisiraipa eta máímahaqueneana.

51 Eta tacahe, ema máquenu macavanairipinapa náéstacayare muraca. Tájina najapanuhini, tayanapane máiyahainepuca, macapitiquiahechavainepuca éma. Tásiha, machu ácutihini ema maca empleado máurirahahi, machu ecaquipaicasisami eta te yucu infierno.

25

Ena Jesús máimicutichina ena diésqueneana amaperuana esenachichana

¹ Puiti nuvaraha nímicutichinaheyare nayehe ena tiúchucuhanaya ticachanenuanayare eta néjasihaya eta návacureya, énapa ena vahi ticachanenuanaimahi. Ena nani nacutihi ena diésqueneana esenachichana amaperuana. Ticuchapanahi ena araimanayare, nácapirayare te nasamapa eta náitecapiraya. Tiámauchavavacapaipa eta namicahuana lámparinana.

²⁻⁴ Ena cincoqueneana, téchemarahianahi. Tiámauchavavacapahi eta nabotellana eta aceite natseruvapahi. Ena apamuriana cincoqueneanahivare máechemarairahana mapanererureana. Vahi námauchavapahina eta nahaceiteyarehi. Tásiha, tájinapa naviyahini.

⁵ Tacahe, vahi náitecapavanehini ena araimana. Navarahaipahi tímacana éna. Tavehapa eta ichapu, tímacanapa.

⁶ Tacahe, te enumuhupa yati nasamapa ema tipiaracahi. Ánipa macahe: “¡Nárajapa ena araimanayare! ¡Yare iácapa!” nacahepa.

⁷ Téchepucanapa namutu ena esenachichana. Náetupiricapa eta namicahuana.

⁸ Tásiha, ena cincoanavare tiájicuvacaipahi eta namicahuana. Tiyaseserecanapa eta aceite. Ánipa nacahe: “Ecatajicahavi ecajihavi eta eyehe aceite, taicha tiájicuvacaipahi eta juca vimícahuana, vémahaequenehaipa” nacahepa.

⁹ Énasera ena cincoqueneana najicapapa: “Vahi víjaracahémahi machu véchuriaca víti apanava. Vahi várataimahi. Tiúripa eyana evachareca eta ehaceitena” nacahepa.

¹⁰ Tásiha, tiyananapa tivacharepananayarehi eta aceite. Eta nayerevapahi, títecapananecha ena araimanayare. Tisiapanapa te tajuhe te távihayarehi eta piesta. Náehicapa ena cincoana natseruvanahi te távihayarehi eta piesta. Tacahe, ticaerapa eta tapaja.

¹¹ Te tiyerepa, títecapanapa ena apamuriana esenachichana. Náehahamecapa eta tapaja. Ánipa nacahe: “Tata, tata, pivejieuquenehahavi. Vi-varaha visiapa” nacahepa.

¹² Émasera ema arayenayare majicapapa: “Eti, ¿nájahahehipuca? Vahi nímatihe. Németeaca vahi étina tavanaranaina eta peti” máichavacapa ema arayenayarehi.

¹³ Tacahe, ema Jesús máichahavipa:

—Éti, vahi ecucuti ena máechemarairahana. Ecutiyaesera ena téchemarahiana. Ecunechavaicha éti, machu vahi ecunecapauchava eta jácani sácheyare eta nuchavirayare núti Manerejirunuhi ema Viya.

Ema Jesús máimicutichinavaca ena achaneana ticaijaracasianahi eta maplatane ema achane rico

¹⁴ Puiti nuvaraha nímicutichinahe tayehe eta níjarasiraheya eti nuchanerana eta evacurecana taicha eta táurirahi eta ecaemataneasiranuhi. Matiarahi ema achane rico. Tiyanayarehi te apana avasare. Máichuhavacapa ena mapanana mamusurana. Máijaracapa eta maplatane.

15 Ema achane máimativacahi eta náechemaraivahi ena mamusurana. Ema émana máijaracapa cinco millone. Ema apana máijaracapa apina millone. Ema apana máijaracapa étana millone. Nacaejapacayare eta plata. Tásiha, ema rico tiyanapa te macaijuheyarehi te apana avasare.

16 Tacahe, ema tijacapahi eta cinco millone, macaemataneacapa eta plata. Macaejapacapa eta plata. Diez millonepa maicha eta maplatane eta macaejapasirahi.

17 Ema apana, ema tijacapahi eta apina millone, énerichuvarepa macaejapacapa eta plata. Títucavavare éma eta cuatro millone eta plata.

18 Émasera ema tijacapahi eta étanaichu millone, vaipa macaejapacahini eta plata. Máecarapa eta plata, mapisirahi eta macaetehahini.

19 Tiyere eta mapairirisirahi ema náejaharu. Téhesera te tichavapa, mayaserecavacapa eta plata máijararuanahi éma.

20 Tacahe, tínapucapa ema tijacapahi eta cinco millone. Máijaracapa ema máquenu eta máiturevahi. Ánipa macahe: “Tata, píti píjaracanuhi cinco millone eta plata. Júchahisera cinco millonevare eta táejapasirahi”.

21 Ema máejaharu majicapapa: “Tiuri, nuchicha. Tájina táchava. Tétavicava eta piúriiva. Pítauchahi eta picaemataneasirahi eta nuplatane. Puiti vahi támapurujimahi eta piúrivahi tayehe eta juca ánimurichichahi níjararuvihí. Nutuparacavinapa eta camuriquene. Puiti pisiapainapa eta nuyehe. Piúrisamurereacaváinapa”.

22 Tásiha, títecapavarepa ema apana ema tijaca-

pahi eta apina millone eta plata. Máichavarepa: “Tata, júcahi eta apina millone eta plata píjararunuhi. Júchavare eta apinavare millone eta táejapasirahi”.

²³ Ema máejaharu majicapavarepa: “Tiuri, nuchicha. Tétavicava eta piúrivera píti apana. Puiti, váhivare támapurujimahi eta piúrivahi tayehe eta juca ánimurichichahi níjararuvíhi. Nutuparacavinapa eta camuripanaquene. Puiti pisiapainapa eta nuyehe. Piúrisamurereacaváinapa”.

²⁴ Tásiha, títecapavarepa ema tijacapahi eta étana millone. Máichapa ema máejaharu: “Tata, núti nímativíhi eta pímajapanuraivahi. Piverejicanuyarehi eta táejapasirayarehi eta piplatane. Pítahacanyarehiva eta nématanevachahi.

²⁵ Eta nupisirahi nácaetehahini eta piplatane, nécarapa. Puiti, júcahi nímicahava tamutu eta piplatane”.

²⁶ Ema máejaharu majicapapa: “Tétavicava eta pisunsuva, píti plújutataji. Te pímatinuhipuca eta numajapanuraivahi, nítaharahi eta apaematanevacha, téhevare pímiyachahi nuverejicaviyare eta táejapasirayarehi eta níjararuvíhi nuplatane;

²⁷ váhiyapa pinacapaini te banco eta nuplatane. Puiti váequeneipahini puiti eta táejahacaripahini eta nuchaviraipahi”.

²⁸ Tásiha, máichavacapa ena apamuriana mamusurana natiarihiqueneanahi: “Everejica ema mácatataji eta plata. Íjaraca ema ticayehehi eta diez millone.

²⁹ Taicha, mácani máituruequenehahi eta macaemataneasirava, tatuparacahi eta nímicatasiraya. Ticayeheyare camuripana.

Énasera nácani vahi náiturequenehahini eta nacaemataneasirava, ticaverejicasianayarehi eta nájaracasianahi.

³⁰ Émechareca muraca ema maca musu máurirahatataji. Vahi ecujapanu, tayanapane máiyahainepuca, macapitiquiahechavainepuca. Tásiha, iáquijica eta te cuarto tamapicujuhequenepanahi” macahepa ema achane rico.

Ena achaneana, te jena sácheyare ticayaseserehi-anainapa, étapa tiámavacaya eta náitátirahi ena apamuriana, ticaevatanainapa tayehe eta návihayare

³¹⁻³³ Te nuchava nuti Manerejirunuhi ema Viya, néjacainapa eta te nuyehe trono tacapicahuquene, Réynuina. Tásiha, névatacaya ena nuyeheana ángeleana nacurujicavacaya te numirahu namutu ena achaneana te avasareana. Tásiha, núti nunerejicavacainapa ena yátupiqueneanahi nuchanerana. Nunacainapa te nuvaure. Tásiha, ena vahi nuchanerainahini nunacainapa te sapa.

³⁴ Tásiha, nuti Rey ánipa níchayare ena nuchanerana tiávihanayarehi te nuvaure: “Yare, eti iúricacareanahi manerejiruanahi ema Tata. Níjaracahénapa eta etuparahayare, ícuchihi mayehe ema Tata acane te tépanavainapa eta apaquehe.

³⁵ Taicha te ímahanuhi eta nécuavahi, éti énicanuhi. Numaunepahi, éti íjaracanuhi néra eta une. Tájina nítecapihahini te nupaisihapahi, éti íjaracanuhi eta nítecapihayare.

³⁶ Tájina numuirihainapahini, éti emurichanuhi. Nucajumahi, éti ípuchapananuhi. Nucaeratahi te cárcel, éti ejirapananuhivare”.

37 Tásiha, ena níchuhaqueneanahi tijicapuanainapa: “Tata, ¿tájamuhu vímahavihi pécuhapahi, tásiha vénicavipa? ¿Tájamuhuvare vímahavihi pimaunepahi, tásiha víti véshavipa eta une?”

38 ¿Tájamuhuvare vímahavihi te pipaisirana tájina pítecapihahini, tásiha, víti víjaracavipa eta pítecapihahi? Váhivare vímahavihini mamuriarevinahini, tásiha víti vimuriachavipa.

39 ¿Tájamuhuvarehipuca picajumahi, tásiha víti vípuchapanavipa? ¿Tájamuhuvarehipuca picaeratahi, tásiha víti véjirapanavipa?” náichanupa.

40 Tásiha, nuti Rey nujicapainavarepa: “Nutupiruva numetacahe: Nútira íjaracanuhi tamutu eta ejapanuraivahi, ímicatasiravacahi ena echamuriana nuchaneranahivare, ena nani namaesachaqueneanahi najacpahini ena apamuriana ena achaneana” níchavacapa.

41 Tásiha, ena tiávihanahi te sapa, níchavacainapa: “Étiserá évuisiha te numirahu, eti masuapajirairahana ecaviurevanahi. Eyana tayehe eta yucu, acanevacahéna eta ecaicuñaira eta emuruiraya, máicuchihi ema íáquenuhi ema Váinaraji énapa ena majupahana ángeleanainihi.

42 Taicha te nécuhapahi, éti vahi íjaracanuhini eta nunica. Numaunepahi, váhivare ésichanuhini une.

43 Étaripa te nupaisiranapahi, váhivare íjaracanuhini eta nítecapihahini. Néchurihavare eta numuirihá, váhivare íjaracanuhini numuirihainahini. Nucajumahivare, nucaeratahare, váhivare éjirapananuhini” níchavacainapa éna.

44 Tacahe, éna náichanupa: “Tátachicha, ¿tájamuhu vímahavihi pécuhapahi, pimaunepahi,

pipairicapahi, mamuriarevihi, picajumapahi, picaeratahi, eta jácani vimáimicatasirávihipuca?”

⁴⁵ Nuti Rey nujicapainavarepa: “Nutupiruva numetacahe: Éti, vahi eJapanunuhini, taicha vahi áJapanuvacahini apaesainahini ena nani nuchan-erana emaesachaqueneanahi”.

⁴⁶ Emutu éti eyanayare tayehe eta ecaicuñai-yayare máitavacayare. Énaserá ena nunerejiruana, matapiravareanahi. Ná mavacainapa tayehe eta táurivayare eta náitaresira, máitavacacayareva.

26

Napanerechaipahi ena tuparairucana eta nacaratasirayare ema Jesús

(Mr 14.1-2; Lc 22.1-2; Jn 11.45-53)

¹ Te títapiricapa eta juca máimiturapianahi, máichahavipa viti máimitureana:

² —Écharichuhi éti eta apinarine sache eta Pascuáiraya. Tásiha, núti Manerejirunuhi ema Viya, ticaratacanuanainapa témetatarecanuanainapa — máichahavipa.

³ Tiuri, ena tuparairucana énapa ena aquenu-carahana, énapa ena escribánoana ticurujicacana-ripahi te tajuhe eta mayehe palacio ema Caifás, ema corregidor.

⁴ Tacahe, náechajisihaipahi eta nacaratasirayare ema Jesús. Navaraha éna navayuacayarehi eta nacaratasirayare, nacapasirayarehi.

⁵ Tipicacavanarichuchasera. Ánipa nacahehi eta náechajiriruvahi:

—Vuíchaha vicucarataca éma achichu juca piéstairaya. Taicha camurianayarehi ena

achaneana, machu tájahapuca náicharachavi taicha navarahayarehi nacatiucha éma. Vicuchapasera nayana —nacahepa.

Esu esena tiámasichahi ema Jesús te tájiyequene perfume

(Mr 14.3-9; Jn 12.1-8)

⁶ Tacahe, ema Jesús, tiyanapa tichava eta te avasarechicha Betania. Náichuhavahi eta manisiraya te mapena ema achane ticaijare Simón ema leprosoinihi.

⁷ Tacahe, eta manisirahi, sucahepaipahi esu ésuna esena. Suámapahi eta perfume te bótechicha. Táetaviuchahi eta tasivachavahi. Supauchapa éma. Sujucusicapa te machuti eta táetaviurehi eta tájiyeva.

⁸ Eta náimairahi ena nuchamuriana máimitureana ema Jesús, váiparinehi náuricahini eta suémepururesirahi eta tasivachaquene perfume sujucusisirahi ema Jesús. Ánipa nacahehi:

—¿Tájaha tacayema suémepurureca eta juca tasivachaquenehi perfume?

⁹ Tiúripanahipucani víjararecahini eta juca tájiyemaquenehi. Vivehahini eta camuriquene plata; tásiha, vímicatasihahini ena páureana —nacahepa.

¹⁰ Émasera ema Jesús máimatihini eta napaneruana. Tacahe, máichahavipa: Ésamirica esu suca esena. Tétavichavahi eta táuriva eta suíchiranuhi.

¹¹ Ena páureanasami, tamutuchucha sácheana eta ecachaneravacayare éna. Ímicatacayarehi te jácani ecaimahaquenérana. Nútisera vahi nánasique-némahi eta eyehe.

¹² Eta juca sujucusisiranuhi eta perfume, sucainapucahi ésu eta suíjiyechirahi eta náquehe tayeheyarehi eta nucaecarasirayare.

¹³ Nutupiruva numetacahe: Nácani ticametarairuanayare eta tiúrina echajirirucava, náechajisihayarevare eta juca suíchaquenahi esu suca esena. Témechanayare suyehe te tamutu avasareana te juca apaquehe —macahepa.

Eta máijarasesirahi ema Júlasí ema Jesús

(Mr 14.10-11; Lc 22.3-6)

¹⁴ Ema Júlasí, émarichu vichamurinihi éma vidocenénihí apóstole mayehe ema Jesús. Tíyanapa téchajiripanavahi nayehe ena tuparairucana.

¹⁵ Ánipa máichavacahi:

—Te yátupihípuca evarahahi ecarataca ema Jesús, núti nímechaheyare. Nucamunuhisera néchayare ¿áyanayarepuca eta evachachanuyare eta nímechiraheyare eta mávirare? —máichavacapa.

Tacahe, éna náijaracapa eta treinta reale.

¹⁶ Jéhevarepasera ema Júlasí matanucaipa eta máicharacayarehi eta máijarasesirayarehi ema Jesús.

Ema Jesús máenimuríhapa ena máimitureana

(Mr 14.12-25; Lc 22.7-23; Jn 13.21-30)

¹⁷ Tacahe, títecapapa eta piesta Pascua, étaripa eta tínapuca sache eta semana vinicahi eta pan mayehere levadura. Viti máimitureana viyaserecapa ema Jesús:

—¿Távihapuca pivarahahi vácaijuhe eta vétupirisiavahini eta vinisirayare eta uvesachicha eta viyeherepi? —nacahepa.

18 Éma tivanecahavipa:

—Eyana tayehe eta Jerusalén, te mapena ema nímaticasare. Ani íchayare: “Ema maestro tivane-cahavihi eta piyehe. Ani macahehi: Tiánehipa eta nítavirayare eta nématanehi. Te pipena eta nunisi-hayare eta uvesachicha eta viyeherepi, nénisi-hayare ena nímitureana” íchayare.

19 Tacahe, tiyananapa ena máimitureana. Éta paichuhi náichahi eta máimiturapianahi. Tinahacavanapa náetupiricahi eta naniruyare tayehe eta Pascua.

20 Tacahe, te jena yátiquenehi ema Jesús, ténica-havipa viti dócequeneana máimitureana.

21 Te vinicaripahi, máichahavipa éma:

—Jéhesareinehi, te etaracu éti, mararihi ema émana tíjararecanuyare —máichahavipa.

22 Tacahe, víti ichaperinehi eta máimipanereresirahavihi eta juca máichirahavihi. Vimutu viyase-recapa éma:

—¿Nútichupuca, Tata, jácani? —víchavacapahi víti éma.

23 Tásiha, éma máichahavipa:

—Mácani néniruyare eta pan néchipaejiruhi te juca nuplatura, émara ema tíjararecanuyare.

24 Tacahe, núti Manerejirunuhi ema Viya, éta paichuhi eta nacapasiranuyarehi, táitauchiravayarehi eta nuyehe eta táechajiriruvahi eta Sagrada Escritura. ¡Páuresamisera ema tíjararecanuyare! Tiúripanaichuhipucani vahi macuchuahini te sujuhe esu maena —máichahavipa.

25 Tacahe, téchajicapa ema Júlasí:

—Maestro, ¿nútipuca jácani níjararecaviyare?

Tásiha, ema Jesús majicapapa:
—Pítisami —máichapa.

Éma Jesús tímechahavi eta macaejasiraya eta matratune arairu mayehe ema Maiya
(1 Co 11.23-26)

²⁶ Tásiha, eta vinisirahi, mavehapa eta pan ema Jesús. Mahasulupayachapa ema Viya. Mayuветucapa, tíjaracahavivacapa viti máimitureana. Tásiha, máichahavipa:

—Eta juca neche. Enica —macahepa.

²⁷ Tacahe, mavehavarepa eta vasu vérirare, mahasulupayachavarepa ema Viya. Tásiha, tíjaracahavivare. Máichahavipa:

—Era eta juca ámutu éti.

²⁸ Taicha eta juca eta nítine, táepusiruvayare eta nucaepahairayare eta epecaturana emutu eti achaneana, esimutuqueneyarehi. Étarichuvare táicutiarayare eta nufirmachirayare eta arairu matratune ema Vicaiyaquene, nucaejasirayava eta matratune apaesa ámutu ejacapacare mayehe.

²⁹ Nutupiruva numetacahe: Vaipa nápechavaimahi nérahivaréni eta juca tachi eta uva. Tiámainucava te táitauchavapa eta nusiapiraya eta nucavacuréraya, nucajupahairaya ema Tata Nucaiyaquene. Te jena sache, níjaracaheya vérainapa eta aramaruama. Vicajupahainapa ema Tata.

Éma Jesús máimereucha ema Pedro tépiyacavayare vahi máimati ema Jesús
(Mr 14.26-31; Lc 22.31-34; Jn 13.36-38)

³⁰ Tásiha, eta vítanésirapa, vijirapa eta jirasare eta vihasulupayachirahi ema Viya. Te vítapi-ricapa, viyanapa vicaijuhe eta te huerta Getsemaní távihahi eta táemiripaisinehi eta cerro ticaijare Olivoquiji.

³¹ Eta vipaisirapahi, ema Jesús máichahavipa:

—Puiti juca yati ejunijicanuyare emutu éti. Ejunaracayare. Tásiha, títauchavayarehi eta máéchajiriruvahi ema Tata eta te Sagrada Escritura: “Nísapayare nacarataca ema Pastor, nacapasirasamiyare. Tásiha, tijunaracanainapa eta uvesana macurujiruanainihi” macahepa.

³² Téhesera te néchepucapa te nécari, nínapucainapa te Galilea. Ánaqui nucuchapiaheyare éti —máichahavipa ema Jesús.

³³ Tásiha, ema Pedro majicapapa:

—Tayanapanepuca, Tata, najunaracapuca ena apamuriana, nútisera vahi nujunaimahi —máichapa.

³⁴ Ema Jesús máichavarepa:

—Nutupiruva numetacavi piti Pedrosami: Puiti juca yati, te tamirahuinapaichaha eta táéchajisirayare eta varayu, mapahe eta pépiyasiravayare vahi pímatinu —máichapa.

³⁵ Ema Pedro macahevarepa:

—Tayanapanepuca pímicapacanu, váhiquesesera népiyacavaimahi vahi nucuimativihini, váhivare nínajiacavimahi —máichapa.

Viti apamuriana étarichuvare tacahehi eta véchajiriruvahi.

*Ema Jesús tiyujaraca te Getsemaní
(Mr 14.32-42; Lc 22.39-46)*

³⁶ Te vítecapapa víti tayehe eta huerta Getsemaní, máichahavipa ema Jesús:

—Éjacachaha eta ani te juca. Ecuchapanuchaha. Núti nuyanayare ánaquipana, nuyujaracayare — macahepa.

³⁷ Mapananaichu ena mámaqueneanahi: ema Pedro, ema Juan émapa ema Jacobo. Ema Jesús, ichape eta máeñamiravahi te masamure, ticatisamurevapa.

³⁸ Tásiha, máichavacapa:

—Tétavicava eta táeñamirava muraca eta nusamure. Tavaraha ticapacanu. Ácahéchaha ani te juca. Váhisera ecuimaca. Ecauneuchanuhi —máichavacapa.

³⁹ Tásiha, tipaipanapa ánaquipanachíhahi. Tiáquipaicavapa máetipaisinapa, macaitecapa eta mamira te apaquehe. Eta mayujarasirahi, ánipa macahe:

—Tátachicha Nucaiyaquene, picatajicanupaini. Váhini tacuitauchavaini eta níchavaquenevayare. Váhini picuisapaini eta nucatajivairaya. Níjaracavasera núti eta nítauchiraya eta pivarahaquenehi píti —macahepa.

⁴⁰ Tásiha, téchepucapa. Tichavapa eta te návihahi ena mapanaqueneana máimitureana. Máimaharinehi éna, tímacanaripa. Macajamicapa ema Pedro. Tásiha, máichapa:

—Váiparinehi ímicatacanuhini ejaneacavahini étanainahipucaini hora ácahehíni.

⁴¹ Éjamiuchava. Eyujarauchava apaesaina. Eyaseaca ema Viya eta étumevaina apaesa vahi macuiturucahe ema Satanás. Yátupihinéni eta

iáchanevana taratahahi ticaratacava. Étasera eta éche máteji, vahi taratahaimahi ticaratacava — máichapa.

⁴² Tásiha, tiápechavavarepa tiyanavarepa ema Jesús. Apihepa eta mayujarasirahi. Ánipa macahe:

—Tátachicha Nucaiyaquene, váhini tacuitauchavaini eta níchavaquenevayare. Tásihasera, níjaracava núti eta nítauchiraya eta pivarahaquenehi puiti. Nísapava nacapacanu —macahepa.

⁴³ Tásiha, tichavavare eta viyehe viti máimitureana. Tímahahavipa víti vímamurihaipa taicha taveharipa eta ichapu eta viúquihana.

⁴⁴ Tacahe, mapahequenepa tichavapa tiyuju-rapana. Étarichuhi eta máechajiriruvanahi.

⁴⁵ Te tichavapa, téchajicahavipa:

—¿Iápechavapa ímaca? ¿Vuíchahapuca enaracahini? Jéhesare, puiti títecapapa eta nutuparahahi nacaratasiranuyare ena ticatianacananahi.

⁴⁶ Ávane ema tíjararecanuyare. Échepuca. Viyana viácapavaca —máichahavipa.

Nacaratacapa ema Jesús

(Mr 14.43-50; Lc 22.47-53; Jn 18.2-11)

⁴⁷ Téchajiricavaichaha ema Jesús, macahe-painecha ema Júlasi, ema vichamurinihi. Mámamurihapaipahi ena camuriqueneana achaneana suntaruana. Ticaepuchiriquia-napaipahi, étapa eta nayeheana espada. Éna, vanairucanahi nayehe ena aquenucarahana.

48 Ema Júlasí, tatiarihihi eta máicutiarayarehi eta náimatirayarehi ena suntaruana ema Jesús. Ani macahehi eta máechajiriruvahi ema Júlasí:

—Ecunenuyare. Ema nétserareruyare, éma ecaratacaya —macahepa.

49 Tacahe, ema Júlasí témeñahavapa mayehe ema Jesús. Máichapa:

—Yátiheipa, tata Maestro —máichapa.

50 Tásiha, máetserarecapa. Ema Jesús majicapapa:

—Piti nímiturevihi, ¿tájaha tímitecavi? —máichapa.

Tásiha, ena suntaruana enevanepa nacaratacahi, napresuchapa.

51 Ema émana vichamuri mavehapa eta mayehe espada. Mayuchatipaisinapa eta machaca ema mamusura ema aquenuca Caifás.

52 Tásihasera ema Jesús macatiuchaichucha. Ánipa maicha:

—Pinaca te tatumaramuhi eta piyehe espada. Taicha namutu nácani ticaparecanahi tayehe eta espada, énerichuvare nacaheyare, espada eta ticapacayare.

53 Váhipuca pecha te návarahahini núti nuyaseacahini ema Tata, puítinaichuhini macacupaicahini ena 80,000queneana ángleana.

54 Váhisera nuvaraha nuyaseaca. Tatuparacahi títauchavayarehi eta táechajiriruvanahi eta Sagrada Escritura eta níchavaquenevayarehi —tásiha, máichavacapa ena suntaruana—.

55 ¿Tájaha tacayema ecasiña eta espada, ecaepuchiriquipaipahivare eta ecaratasiranuyare, tímicutijiricavapa námerahihini? Étayapasica

cape juca tamutuhi sácheana nucachanehehi nímitucahehi tayehe eta Templo. Váhivare epatsicavahini ecaratacanuhini.

⁵⁶ Títauchavahisera tamutu eta juca taicha tacahehi eta náechajiriruvahi ena profetanaini, tayehe eta Escritura táechajisihairanuhi —macahepa.

Tacahe, viti máimitureana vimutu vijunaracapa, vinaquicapa ema Jesús.

Nacatupihapa ema Jesús te namirahu ena tuparairucana

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Ena ticaratacanahi ema Jesús námapa te mamirahu ema Caifás, ema corregidorhi te jena áñohi. Natiarihivare ena escribánoana énapa ena aquenucarahana.

⁵⁸ Ema Pedro, máehiequenehapahi, mayerehipahisera. Te náimisiapapa, tisiapavarepa éma te tajuhe eta canchón mayehe ema Caifás. Téjacaipahi macachanevacaipahi ena suntaruana, mavarairahi máimahayarehi tájahapuca eta náicharacayarehi ema Jesús.

⁵⁹ Tacahe, ena tuparairucana énapa ena aquenucarahana natanucaipahi ena tépiyaequenehanayarehi ema Jesús, navarairahi tatiarihiyarehi eta tiviuchayarehi eta máepenirayare.

⁶⁰ Váhisera náichimavahini, camurianahinéni ena tépiyaequenehanahi. Tisiapananechasea ena apinana tépiyaequenehanayarehi.

⁶¹ Ánipa nacahe:

—Ema maca achane visamahi víti eta mavarairahi máquipaica eta Templo mayehe ema

Viya tacapichahuquenehi. Tásiha, máimichavaya-rehiji macaechepuca te mapanaquenenaji sache —nacahepa.

62 Tacahe, ema corregidor téchepurucainehi. Mayaserecapa ema Jesús. Ánipa maicha:

—¿Tájaha tacayema vahi pijicapavaca ena nani eta pépiyaequenehi? ¿Yátupipuca eta nacayemaquenehi? Taicha vímahavi vahi picatiuchavahini —máichapa.

63 Émasera ema Jesús vahi majicapavacahini. Tásiha, mápechavare mayasereca ema corregidor:

—Pímaha puiti, nuyaserecaviyare. Vahi nuvaraha pépiyahirahi. Némechavi máimahavihi ema Viya. Pátupiruva pimetacahavi te yátupihipuca pítiqunehi Cristo, Machichaquenevihi ema Viya —máichapa.

64 Tacahe ema Jesús majicapapa:

—Yátupi núti Cristonuhi. Nuti Manerejirunuhi ema Viya. Tásiha, numetacaheyare eta apana. Járajapaya eta sácheyare ímahanuyare eta néjasi-rayare te mavauere ema Viya máitupajijiáruvaquenehi. Ímahanuyareva núti eta núcupaisirayareva násihairayare te anuma, támiranuyarepahi eta úcaji —macahepa.

65 Tacahe, ema corregidor eta masamirahi, tise marinehi ichape. Tivetsayujicavapa eta mamuiraha eta masemanevahi. Tásiha, macahepa:

—¡Tétavicavaipa eta maviurevahi ema maca taicha macaecaahihi ema Viya! ¡Puiti émaquenepa visama éma tépiyacavahi Machicha ema Viya! ¡Váipa tácomesa vitanucahini ena

testígoanainahini! ¡Puiti esamaripa éti eta juca macayemaquenehi!

⁶⁶ ¿Tájaha vícharacayare puiti ema maca? — macahepa.

Tásiha, najicapapa éna:

—¡Ticaviurevapa! ¡Étaina táimicapaca! — nacahepa.

⁶⁷ Tacahe, náehavacapa ema Jesús. Nátutuquichapa. Náehamirahavare.

⁶⁸ Tásiha, náichapa:

—Vímahasejicacha, te yátupihipuca pítihi Cristo. Te pijarauquipuca, pímatihaviyare nájahahipuca ema téhamirahavíhi —nacahepa.

*Éma Pedro tépiyacavapa vahi máimati ema Jesús
(Mr 14.66-72; Lc 22.56-62; Jn 18.15-18, 25-27)*

⁶⁹ Tiuri, ema Pedro, matiarihichahahi eta te canchón. Téjacaipahi tiásacavahi. Tacahe, sucahepaipahi esu mavanara ema corregidor. Suímahapa éma. Tásiha, suíchapa:

—Németeaca pítirichu ñímiture eñi Jesús eñi ticavasahi te Galilea —suíchapa.

⁷⁰ Émasera majicapapa:

—Vahi nímati ema péchajisihaquenehi. ¿Távihapuca pímatinenuhi píti? —máichapa.

⁷¹ Tásiha, mavarahapa tiúchucavaneyarehini. Suímahavare esu apana vanaraca. Suíchavacapa ena natiarihiqueneanahi:

—Eñi ñica achane éñirichu ñichamuri eñi Jesús Nazareno. Nímahahi ñicachanepahi —suíchavacapa.

⁷² Tiápechavavarepa ema Pedro téchajica, ánipa macahe:

—Nujuracha te emirahu. Váhiquene nímati ema píchaquenehi —macahepa.

⁷³ Te tiyererehachichavarepa, náimahavarepa ena apamuriana. Náichavarepa:

—Yátupiquene pítirichu machamuri ema maena Jesús, taicha eta péchajisira éta tímereuchavihi —náichapa.

⁷⁴ Tásiha, macahevarepa:

—Máicuñacanuine ema Viya te vahi nucucahe yátupina. Váhiquenesera nímati ema achane échajisihaquenehi —macahepa.

Tásiha, enurujipa téchajicanecha eta varayu.

⁷⁵ Te masamapa eta varayu, enevanepa máechahi ema Pedro eta máichirahi ema Jesús: “Te tamirahuinapaichaha eta táechajisirayare eta varayu, píti mapaheyare eta pépiyacavayare vahi pímatinu”. Tásiha, tiúchucavanepa ema Pedro. Tíyahanepa taicha máimativanepa eta táichapevahi eta májecapiravahi.

27

Námapa ema Jesús te mamirahu ema Pilato

(Mr 15.1; Lc 23.1-2; Jn 18.28-32)

¹ Te tijarahipa, tiúrujicavanapa namutuyaréni ena tuparairucana énapa ena aquenucarahana. Ticaechacasipa eta náimicapasirayarehi ema Jesús.

² Nacuchucapa ticaitihapaipa eta námirapahi te mamirahu ema Poncio Pilato, ema aquenucahi prefectohiquene.

Eta macapasiravahi ema Júlasí

³ Tacahe, ema Júlasí eta máimairahi eta táichapevahi eta macatajivairahi ema Jesús étapa eta nacapasirayarehi, ichaperinehi ticatisamurevahi taicha eta máejecapiravarihi. Tiyanapa máimichavapanahi eta treinta reale eta plata mavachahi nayehe éna.

⁴ Tásiha, máichavacapa:

—Néjecapavahi ichape eta níjararesirahi ema maca achane matapiravarequene. Nuvaraha nímichavaya eta nuvachainihi —máichavacapa éna.

Énaserá najicapapa:

—Jéhepuca, vahi vecha víti. Péchaquenevaichuhi píti —náichapa.

⁵ Émasera ema Júlasí máquijimirauchavacapa eta te tajuhe eta Templo návihahi éna. Tásiha, tiúchucapa. Tiyanapa. Táichavenehi eta macatisamurevairahi, tichumucavapa.

⁶ Ena tuparairucana navehapa eta plata. Tásiha, nacahepa:

—Vahi táuricahini víyaracuhahini eta juca plata tayehe eta caja vinaquisirareva taicha mavachaequeneya eta máepenirayarehi ema maca achane —nacahepa.

⁷ Tásiha, eta plata máimichavaquenehi ema Júlasí, napanerechaipa eta navacharesirayarehi eta apaquehe nacaecarasirareyare ena apavasanana. Eta juca apaquehe naseresirarehi ena típuarecarahiana eta yupi.

⁸ Puiti éta ticaijarehi “Apaquehe máitinevacha ema Jesús”.

⁹⁻¹⁰ Tacahehi eta táitauchiravahi eta májurehi ema víyaraha profetaini Jeremías. Ani tacahehi:

“Navehapa eta treinta reale eta plata. Ena tuparairucana navacharecapa eta apaquehe nayehe ena típuarecarahiana. Tacahe eta juca mametasiranuhi ema Viya eta náichirayarehi eta juca” macahepa ema víyarahaini Jeremías.

*EMA PILATO MAYASERECAPA EMA JESÚS
(Mr 15.2-5; Lc 23.3-5; Jn 18.33-38)*

¹¹ Ema Jesús ticayaserehipa te mamirahu ema aquenucahi Pilato. Ánipa macahe eta mayaseresirahi:

—¿Jéhesareji réyvihi píti nayehe ena pijaneanana israelítana? —máichapa.

Ema Jesús majicapapa:

—Pitupiruvahi eta juca piyaseresiranuhi. Yátupihi eta nurreyvahi —máichapa.

¹² Tásihasera, te nametauchaipa ena tuparairucana, vahi majicapavacahini ema Jesús.

¹³ Tacahe, ema Pilato máichapa:

—¿Vahi péchajiuchava eta juca nametauchiravihi? Camurihi eta piviuerevana eta nayehe —máichapa.

¹⁴ Émasera ema Jesús váhiquene majicapahini. Tásiha, ema Pilato máramipa eta mamajicapirahi. Váipa máitucarehini.

*EMA PILATO MACAVANAIRIPIPA ETA NÁETATASIRAYA
EMA JESÚS*

(Mr 15.6-15; Lc 23.13-25; Jn 18.38-19.16)

¹⁵ Tiuri puiti, tatiarihi eta mayeherepi ema Pilato, te Páscuamuhuana, macaiticayarehi ema émana preso, mácani nayasearuyarehi ena achaneana.

¹⁶ Tiuri, matiarahi ema achane ticajare Barrabás, ichape eta maviurevahi.

17 Eta náurujisiravahi ena achaneana, mayaserecavacapa ema Pilato:

—¿Nájahapuca ema eyasesereruyare ema nucaitiruya? ¿Émapuca ema Barrabás, téhesera émapuca evaraha nucaitica ema Jesús, ema ticaijare Cristo —máichavacapa.

18 (Taicha máimatiacaripahi eta nametauchahi ema Jesús ena tuparairucana taicha nacapinaruhi éma.)

19 Eta máejasirahi ema Pilato tayehe eta mávacure, suímimetarecapa esu mayena: “Vahi picuimisiapava ñiyehé eñi ñira achane matapiravare taicha yati tametasiranuhi eta nuvapure eta ñíchararacavayare éñi” sucahepa.

20 Énaserá ena tuparairucana énapa ena aquenucarahana náimitumurihapa ena achaneana nayaseserecahi ema Barrabás, émainahini máuchucuha. Tásiha, nayaseserecapa máepenahini ema Jesús.

21 Máechajimurihavarepa ema Pilato, mayaserecavacapa:

—¿Nájahasica ema evarahaquenahi nucaitica? — macahepa.

Éna najicapapa:

—¡Émaina máuchucuha ema Barrabás! — nacahepa.

22 Ema Pilato mayaserecavarepa:

—¿Tájahasica nícharacaini ema Jesús ticaijare Cristo?

Éna najicapapa:

—¡Pémetatareca te crusu! —nacahepa.

23 Ema Pilato máichavacavarepa:

—¿Tájaha tacayemahi eyaseacahi eta németata-siraya ema maca? ¿Tájahasica eta maviurevahi? — máichavacapa.

Énasea tipiararemurihanavare muracapana:

—¡Pémetatareca te crusu! —nacahepa.

²⁴ Tacahe, máimahapa ema Pilato eta vahi máiturucahini macatiuchahini, taicha ena achaneana tivayuchavapaichucha eta nasemanevanahi. Tacahe, máemepanapa eta une, ticasipavahupa te namirahu ena achaneana. Tásiha, máichavacapa:

—Nuvaraha nímerrecava te emirahu vahi nútipa-racaina eta máepeniraya ema maca achane matapi-ravarehi. Éti échinavayarehi —máichavacapa.

²⁵ Tásiha, najicapapa namutu ena achaneana:

—Vítinarine vicitapirava, énapa ena vichichanaveana. Vítinarine taeha eta máepeniraya ema maca achane —nacahepa.

²⁶ Tacahe, ema Pilato macavanairipipa nacaitica ema Barrabás. Tásiha, macavanairipipa náestaca ema Jesús; tásiha náetatacayarevare te crusu.

*Nacavayuemarajipa ena suntaruana ema Jesús
(Mr 15.16-20; Jn 19.1-3)*

²⁷ Tásiha, ena suntaruana námapa ema Jesús tayehe eta náestasihayarehi te távirarehi eta guardia. Nachayacapa ena camuriqueneana suntaruana náumurivana.

²⁸ Navejamuhiacapa eta mamuiriha. Namuri-achapa eta muíriare tútsime.

²⁹ Náitsamemacapa eta itapepi eta majara-piyarehi náicha. Nanacavarepa te machuti.

Náimicaratacavarepa eta curina te mavahu vaure, matsucurúpayarehiji. Eta nacavayuemarajirahi, náepuyumirauchapajicacha. Ánipa nacahe:

—Tata, ¡pítitataji nayehevihíji Rey ena israelítana!
—náichapa.

³⁰ Tásiha, náutuquichapa. Náetetuvauchapa eta matsucurupahi, náepuchisicapa tayehe.

³¹ Te tamutupa eta nacaecahijirisirahi, navejamuhiacavarepa eta mamuiriha títime. Namuiriachapa eta mamuirihaichu. Tásiha, námapa tayehe eta macaetataiyarehi.

*Náetatacapa ema Jesús te crusu
(Mr 15.21-32; Lc 23.26-43; Jn 19.17-27)*

³² Eta napaisirapahi te calle, nácapajicapa ema achane ticaijare Simón ticavasahi te Cirene. Napamicapa éma manaracuha eta macurusura ema Jesús.

³³ Tacahe, nacaitecapapa tayehe eta masihi nacaetatairare ticaijare Gólgota.

³⁴ Ánaquipa náesichinehi ema Jesús eta vino tisu-careama ticasiriquiama eta ipuruji. Te masamaecapa ema Jesús, vaipa mávarahahini máerahini.

³⁵ Te náitauchapa eta náetatasirahi ema Jesús, ena suntaruana nasuertehachapa eta mamuiriha eta náijarajirisiracacahi. Tacahehi eta táitauchiravahi eta májurehi ema víyarahaini profetaini David. Ánipa tacahe: “Tíjarajiricanapa eta numuirihaini. Nasuertehachapa eta náijarasiricacairahi”.

³⁶ Tásiha, najaneacapa ema Jesús ena suntaruana.

37 Te tápusi eta macurusura, tatiarihihi eta ajureca táechajisihahi eta tiviuchahi. Ani tacahehi eta ajureca: “Ema Jesús, Rey nayehe ena israelítana”.

38 Natiarihihivare ena apinana tiámerahiana. Ticaetatanahivare te machacaya, ema émana te mavaure, ema apana te masapá.

39 Tásiha, ena tiánucumirauchanapahi, tépiupiu-sicavanapaipa eta nacaecahirapaipahi éma.

40 Ánipa nacahe:

—¡Pítitataji! Picahechajiriruvahi eta piáquipaisi-rayarehíji eta Templo, pirátahahivaréji pímuchava picatupiha eta arairu Templo te mapanayarerichuhíji sache. Puiti vivaraha vímaha eta pítupajijiasiravahi, te yátupipuca Machichavi ema Viya. Piúcupaica te jara crusu. ¡Picatiuchava pítijivaina! —náichapa.

41 Énerichuvare ena tuparairucana nacaecahijiricavare, énapa ena escribánoana énapa ena fariséoana, énapa ena apamuriana aquenucarohana. Náichajiricacapa:

42 —Ema mácacacha, macahehi eta máechajiriruvahi eta marátahairahíji macatiuchavaca ena apamuriana achaneana. Tásiha, puiti váhivare marátahahini émajivainahíni macatiuchavahini eta te jara mávihahi. Te yátupinahíni Réyinaíni viyehe viti israelítana, macatiuchavaipahini, ¿masi? Máucupaicaripahini te jara crusu, ¿masi? Visuapasarepaini eta vímairainahini.

43 Téhevare te yátupihipuca ticasañavahi me Viya, vivaraha vímaha macuchucuha éma puítinaríchu, te yátupihipuca máemunacahi éma. Taicha macahehi

eta máechajiriruvahi eta machichairahi ema Viya —nacahepa.

⁴⁴ Éna tiámerahiana ticaetatanahiyare te machacaya, énerichuvare nacaecahivare éna apanavare.

Eta máepenirahi ema Jesús

(Mr 15.33-41; Lc 23.44-49; Jn 19.28-30)

⁴⁵ Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi.

⁴⁶ Tásiha, te las trespa sache, tipiaracapa muraca ema Jesús, ánipa macahe:

—Elí, Elí, ¡lama sabactani! —te véchajiriruva, ani tacahe: “¡Tata Nucaiyaquene! ¡Tata Nucaiyaquene! ¡Vahi picujunijicanu!”

⁴⁷ Tacahe, ena natiarihiqueneanahi ena ti-samanahi, ánivarepa nacahe:

—Esama ema maca achane mapiaracahi ema víarahaini profeta Elías —nacahepa.

⁴⁸ Ema apana tiyanapa tijunapahi máepanapa eta machuchujiruyarehi eta tisisica vino. Máitiacapa te tiúqui curinaqui. Máimicapayacapa eta majaca ema Jesús, machuchujicayarehi.

⁴⁹ Énasea ena apamuriana, ánivarepa nacahe:

—Ésamiricachucha. Vímahayare te títecapaya-repuca macatiuchapana ema Elías —nacahepa.

⁵⁰ Tásiha, tiápechavavarepa tipiaraca muraca ema Jesús. Tásiha, tépenapa.

⁵¹ Tásiha, tíjahúchavapa tétsayumecapa eta cortina tayehe eta Templo. Tépanava te anuquehe, tíchecuha te apaquehe. Tiyayacarepa eta apaquehe. Étaripa eta ichapepuhiqueneana mari téjepuichavacavare.

52 Étaripa eta ecariana téjiacavacapa. Técheputanavarepa ena náepenaqueneana ena tisuapajirahianahi mayehe ema Viya.

53 Tásiha, te mapanaquenepa sache, téhevare te táequenepa eta máechepusirahi ema Jesús te máecari, éna apanavare tiúchucanapa tayehe eta náecariana. Tásiha, tisiapanapa tayehe eta avasare Jerusalén. Tichavanapa te napenana. Ichapemurianahi ena achaneana tímahanahi éna.

54 Tacahe, ena tijanearecanahi, émapa ema nacapitara, te náimahapa eta tayayacarevahi eta apaquehe, étapa eta apamuriana tiáramicareanahi, ichaperinehi eta napisirahi. Tásiha, nacahepa:

—Yátupiquenerichuyapa Machicha ema Viya ema maca —nacahepa.

55 Natiarihivare ena camuriana esenana. Tímararacanahi te tiyerehi. Ena nani esenana, éna téhicanahi ema Jesús. Téchapajiricanapahi ema Jesús eta mapaisirapahi te másihapa te Galilea.

56 Nacarichusera ticajuanahi eta náíjaruana esu María Magdalena, ésupa esu apana María, maena ema José émapa ema Jacobo. Sutiarihivare esu mayena ema Zebedeo, náena ena nuchamurianahi ema Juan émapa ema Jacobo, apóstoleanahi.

Nacucupaicapa te crusu ema Jesús, náecarayarepa (Mr 15.42-47; Lc 23.50-56; Jn 19.38-42)

57 Matiarhivare ema achane rico ticaijare José. Ticavasahi te avasare Arimatea. Émarichuhi téhicahi ema Jesús.

58 Te capererehipa, eta máimairahi máepeni-raipahi ema Jesús, tiyanapa mayehe ema Pilato. Mayaseapanahi eta máquehe ema Jesús, mavarairahi máecarayare. Tacahe, ema Pilato macavanairipipa náisapahini eta náecarairaya.

59 Nacucupaicasarepa eta máquehe ema Jesús tayehe eta crusu. Náyuruacapa tayehe eta ti-japuquene sávana.

60 Nanacapa tayehe eta máecari máemepiyaruruhi máecariyahini ema José. Eta juca ecari, nasecajueruhi eta mari. Najihachapa tayehe eta tajitacarequene márime. Te náitauchapa, tiyananapa.

61 Esu María Magdalena, ésupa esu apana María, téjacanahi éna, náimarararacaipahi eta ecari.

Ticavanahianapa ena suntaruana najaneaca eta ecari

62 Tásiha, te apanapa sache tiyananavarepa ena tuparairucana mayehe ema Pilato.

63 Náechajicapa ema Pilato. Ánipa nacahe:

—Tímitecahavihi, tata, vimetapanavi eta máechajiriruvahi ema Jesús te achanerichaha eta máechepusirayahiji te máecari te mapanaquenénapaji sache.

64 Puiti, vivarahahi picavanairipihini náeratahini muraca eta tapaja eta máecari, mapanainavare sache eta najaneasirayare ena suntaruana. Machu nayana te yati námechapana eta máquehe ena máimitureana. Machu nácaheriana “Téchepucaripa te máecari”. Tásiha, ena achaneana nasuapainapapuca, náimijachainapa

yátupi. Tisuapacarepanainapapuca tayehe eta máichaqueneanahi te achanerichaha —náichapa.

⁶⁵ Ema Pilato máichavacapa:

—Tiuri, níjaracahe ena nusuntarurana. Eyana iama. Evaneca najaneacaquenéna. Nachujichaquenéna muraca eta máecari —máichavacapa.

⁶⁶ Tacahe, tiyananapa nachujichapa muraca eta ecari. Nanacapa eta táicutiaranayarehi. Tásiha, najaneacahi ena suntaruana.

28

*Eta máechepusira ema Jesús te máecari
(Mr 16.1-8; Lc 24.1-12; Jn 20.1-10)*

¹ Te apanapa sache te tijararahichichapa eta lumíncuquenehi, tiyanapa esu María Magdalena, sucachanehi esu apana María, náimahapanayarehi eta ecari.

² Tíjahúchavapa tiyayacarehi eta apaquehe. Émahi ema ángele eta máucaupaisirahi te anuma. Te máitecapauchapa eta ecari, máequehepuichapa eta mari tajiainihi eta máecari. Máejahamecapa eta mari.

³ Tétavicava eta majaraivahi, tivayuhauquirahi. Eta mamuiraha, tétavicavavare eta tajapuva.

⁴ Eta náimairahi ena suntaruana, tiáquipapaicavanapa, tiyayacareanapa eta napisirahi. Tiánehini tépenaracana.

⁵ Tásiha, ema ángele máechajicavacapa ena esenana. Ánipa macahe:

—Vahi ecupicanu. Núti néchahi eta etanusi-rapahi ema Jesús ema macaetataquenénihini.

⁶ Májinaipahi eta te tajuhe eta máecari. Técheputaripahi taicha tacahehi eta máechajiriruvahi. Yare, ímaha eta juca mávinénihi.

⁷ Eyana púitinarichu, emetapanavaca ena echamurianahi máimitureana eta máechepusiraipahi tayehe eta máecari. Énerichuvare emetacavaca tiyanayare ema Jesús eta te Galilea. Ánaqui macuchapiaheyare emutu éti. Eta tímitecanuhi núti numetapanaheyarehi — máichavacapa.

⁸ Tacahe, ena esenana tiyananapa tichavanahi tijunaparanapaipa eta nametasirayarehi ena nachamuriana. Tipicanapaipa, tásihasera tacachanepahi eta náurisamurevapahi ichape.

⁹ Eta najunapirapahi, tíjahúchavapa tímerecava ema Jesús eta nayehe. Máechajicavacapa. Témeñahavanapa éna eta mayehe. Tépuycanapa natsiucepevacapa.

¹⁰ Éma máichavacapa:

—Vahi ecupicanu. Eyana emetapanavaca ena apamuriana echamuriana nímitureanahi. Eyanyare emutu te Galilea. Ánaqui nucuchapiaheyare —máichavacapa.

Eta nametarapianahi ena suntaruana

¹¹ Eta najunapirapahi ena esenana, ena suntaruana tijanearecanainihi tiyananapa éna, nametapanavacayarehi ena tuparairucana tamutu eta náimahaqueneanahi.

¹² Tacahe, ema corregidor ticurujiricapa namutu ena apamuriana aquenucarahana, mavarairahi téchajiricavana napanerechayare

eta náicharacavayarehi. Jéhesare, navachachavacapa eta camuriquene plata ena suntaruana.

¹³ Tásiha, náimitucavacapa, ánipa náicha:

—Te natiarihinapuca nayaserecahe, ecaheyare: “Tiyananahi ena máimitureana ema Jesús te yátimuhu; námechapanahi eta máquehe. Ticamapuravanahi eta vímasirahi víti” ecaheyare.

¹⁴ Émaripa ema aquenuca te máechapuca, vímaharinepa víti. Vitanucayare eta vivayuarasirayare, apaesa tacuija eviurevaina éti —náichapa.

¹⁵ Tacahe, ena suntaruana najacapapa eta plata navachahi. Tiyananapa. Jéhesare, étapaichuhi náechajisihapahi eta náimitucasivahi. Puíticha, ena israelítana, tanasirichuhi tacahehi eta nametarapi, te natiarihi ena tiyaserecana.

Ena Jesús mavanemurihapa ena máimitureana eta náimituresihaya te tamutu avasareana

(Mr 16.14-18; Lc 24.36-49; Jn 20.19-23)

¹⁶ Ene tacahehi eta viyanirahi viti óncequeneana apóstoleana tayehe eta Galilea te cerro taicha tacahehi eta mametarapihi éma Jesús.

¹⁷ Tacahe, te vímahapa ema Jesús, vépuyumurihavanepa. Vimutu vitsiucapa. Natiarihisera ena vuíchaha nasuapapajicahini.

¹⁸ Tásiha, ema Jesús témeñahavapa eta viyehé. Máichahavipa:

—Ema Tata te anuma tituparacaruhi núti néchayare tamutu te anuma étapa te juca apaquehe.

¹⁹ Eta tacahe, eyanayare puiti epaicayare tamutu eta avasareana. Ímitucayare ena achaneana, nuchaneranaina éna apanavare.

Ícachasicavacayarepahi te máijare ema Tata, nútípa nuti Machicha émapa ema Espíritu Santo.

20 Ímitucayareva eta nasuapiraina éna apanavare tamutu eta nímiturapianahi eta eyehe. Nútí, tayanapane nuyerehehi, nímicatacaheya-resera. Níjaracahénapaipa eta nítupajijasirava. Tamutu sácheana nuchanehevacyarehi. Váhiquene nujunijiacahéimahi —máichahavípa.

Tamutupa eta juca nájuchaquenehi eta nímahaquenehi nuti Mateo.

**Eta Táurinaquene máechajiriruvahi ema Viya eta viyehe, ticajare puito Eta Nuevo Testamento
New Testament in Ignaciano (BL:ign:Ignaciano)**

copyright © 2012 Wycliffe Bible Translators, Inc.

Language: Ignaciano

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ignaciano

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files
dated 29 Jan 2022

332465cd-916c-5bfc-8721-b0114be92360